

# ሉቃስ ፃፊዳ

## ዩሱስ ኪሪስቶስ ዋንጌላ

### ጋሳ ቆፋ

ዩሱስ ደሪዳ ታማኔ ናምዑ ሃዋሪታ ጊደን ሉቃስ ዳና። ሉቃስ ዋንጌላይ፣ ዩሱስ ኮይሮ ናቤታ ደናን ያና ጌቲቲዳ ኦዳቲዳይሳ፣ ኢሰራዔሌቲ ካሴፕ ናጊሼ ዳዒዳ «ኪሪስቶስ» ጊዳይሳኔ ኣሳ ዜሬሊ ኡባ ኣሼይሳ ጊዳይሳ ቆንጨሴስ። ሉቃስ፣ ባ ማፃፋን ዩሱስ፣ «ማንቆታስ ዋንጌላ ሳባካናው» ባ ኣዋፔ ከቲቲዳይሳ ጊዳይሳኔ ሄ ዋንጌላይ ኣሳስ ዳዒያ ዳማ ዳማ ሜቱዋፔ ኬሴይሳ ጊዳይሳ ኦዳስ። ሉቃስ ዋንጌላ ጊደን፣ ዩሱስ ዩሳባ ኦዲያ ኮይሮ ሹምፖታኒኔ ዩሱስ ፑዴ ሳሎ ኬዩዳይሳ ኦዲያ ወርሴላ ሹምፖታን ቆንጨዲ ኦዳቲዳይ ኡፋይሳባ። ዩሱስ ሳሎ ኬዩዳፔ ጉዩ ኣማናይ ዋኒዲ ዲጨዳኮኔ ዳልጊዳኮ ኦዲያ ታሪኪያ ሃ ዋንጌላ ፃፊይ ሃዋሪታ ኦሶ ማፃፋን ፃፊስ።

ከታንቸታ ማዘሙሪያባ፣ ዩሱስ ዩሌቲዳ ዋዴ ሄንላቸቲ ቢዲ ቤዒዳይሳ ኦዲያ ታሪኬይ፣ ዩሱስ ናፃቲላን ያሳ ኬሊ ቢዳይሳ፣ ቃዴቲያ ሳማሪ ኣዲያባኔ ቆዩዲ ቤንቲዳ ናፃባ ኦዲያ ታሪኬይ፣ ሉቃስ ዋንጌላ ፃላላን ቤንቲያ ታሪኬይ። ሉቃስ ዋንጌላን ጋፃፔ ጋፃ ጋካናው ዳዒያ ዋና ቆፋቲ ዋሳባ፣ ጌሻ ኣያናባ፣ ዩሱስ ኦሱዋ ጊደን ማጨሳታስ ዳዒያ ቤሳኔ ያሳይ ናጋራ ማሪይሳ።

#### ሉቃስ ዋንጌላ ኣይፌ ቆፋታ

- ጌሎ ቆፋ 1:1-4
- ፃማቂያ ዮሃኒሳኔ ዩሱስ ዩሌቲላ 1:5-2:52
- ፃማቂያ ዮሃኒሳ ኦሱዋ 3:1-20
- ዩሱስ ዊንቃቲያኔ ፓጨቴላ 3:21-4:13
- ዩሱስ ጋለላን ኦሊዳ ኦሱዋ 4:14-9:50
- ጋለላፔ ዩሩሳላሜ ጋካናው 9:51-19:27
- ወርሴላ ሳሚንታ ዩሩሳላሜ ሄራን 19:28-23:56
- ሃይቆፔ ዴንዶ፣ ቆንጨሳኔ ሳሎ ኬሳ 24:1-53

1 ቦንቸ ቲዋፊሎሳ፣ ኑ ጊደን ፖሌቲዳባስ ዳርቲ፣ ባንታው ዳንዳዔቲዳ ሜላ ፃፊደሶና።  
 2 ሄ ታሪኪያ ኤንቲ ፃፊዳይ ኮይሮፔ ደሚዲ ኣይፌ ማርካቲኔ ቃላ ሃጋዜይሳቲ ኦስ ኦዲዳይሳ።

3 ታካ ታ ባጋራ ኮይሮ፤ እኩካ ጻሊዳ፤ ጉዬ ሄ ታሪኪያ ሃኖታ ማሪያዳ ኔው ፃፎይ ታው ሎፖ ጊዲ ቤንቲስ።

4 ሄሲካ፣ ኔ ታማሪዳባይ ቱማ ጊዳይሳ ኤሪሳናሳ።

**ፃማቂያ ዮሃንሳ ዩሌቴላ**

5 ዩሁዳ ካዉዋ ሄሮዲሳ ዋዴ አቢያ ያራ፤ ጊዲዲ ዛካሪያሳ ጊያ አይሁዴ ካሂኔይ ዴዔስ። ኢያ ማቲያካ አሮና ሸሻ፤ ኢ ሱንላይካ ኤልሳቤዳ።

6 ናምዓይካ ጎዳ ዋጋኔ ኪታ ኡባ ናጊዲ ቦሬይ ባይና ያሳ ሲንላን ጂሎቴላን ዴዲዶሶና።

7 ሃኖ፤ አቲን ኤልሳቤዳ ማይንሳ ጊዲዳ ጊሾ ኤንታው ናዲ ባዋ። ናምዓይካ ቃሲ ጨሚዶሶና።

8 ኢሲ ጋላስ ዛካሪያሲ ባ ጊሹዋ ማራን ያሳ ሲንላን ካሂኔቴላን ሃጋዜስ።

9 ካሂኔቴላ ዋጋን ያሳ ኮሌ ጌሊዲ ኢፃኔ ጨዩሳናው ኢያ ሳሚ ጋከስ።

10 ኢፃኔይ ጨያ ዋዴ አሳይ ካሬን ዋሴስ።

11 ጎዳ ኪታንቸይ ያርሹዋ ያርሺያ ቤሳፌ ኡሻቻ ባጋራ ኤቂዲ ቤንቲስ።

12 ዛካሪያሲ ኢያ ቤዲዳ ዋዴ ዳጋሚዲ ዳሮ ያዩስ።

13 ሺን ኪታንቸይ ኢያኮ፣ «ዛካሪያሳ ያዮፋ፤ ኔ ዋሳይ ሲዔቲስ። ኔ ማቲያ ኤልሳቤዳ አዴ ናዓ ዩላና፣ ኢያ ዮሃንሳ ጋዳ ኔ ሱንላና።

14 ኢ ኔው ኢንጃኔ ኡፋይሲ ጊዳና፤ ዳሮቲ ኢያ ዩሌቴላን ኡፋይታና።

15 ጎዳ ሲንላን ኢ ጊታ ጊዳና፤ ዋይኔ ኡሻ ጊዲን ሃራ ማላያ ኡሻ ኡዬና። ባ አዬ ኡሎን ዴዲሽ ጌሻ አያናን ኩማና።

16 ኢሰራዔል አሳታ፤ ዳሮታ ባንታ ጎዳ፣ ያሳኮ ዛራና።

17 አዋታ ዋዛና ናይታኮ ዛራና፣ ኪቴቶናይሳታ ጂሎታ ጨንጫቴላኮ ዛራና ሚላ፣ ጎዳስ ቤሲያ ዴሬ ጊጊሳናው ኤሊያሳ አያናኒኔ ዋልቃን ጎዳ ሲንላን ባና» ያገሰ።

18 ዛካሪያሲ ኪታንቸዋኮ፣ «ታ ሄሳ አይቢን ኤራኔ? ታራኔ ታ ማቸራ ጨሚዳ» ያገሰ።

19 ኪታንቸይ ዛራዲ፣ «ታኒ ያሳ ሲንላን ኤቂያ ጋብሬሌ። ሃ ሚሺራቸዋ ኔው ኡዳናው ያሳፌ ኪቴታስ።

---

1:5 1ታሪ 24:10    1:15 ታይ 6:3    1:17 ሚሊ 4:5-6    1:19 ዳኔ 8:16፤ 9:21

20 ሄኑ፡ ዎዲያ ናጊዲ ፖሌቲያ ታ ቃላ ኔ አማኖና ኢዲዳ ጊሾ ሃይሲ ፖሌታና ጋካናው ኔኒ ሙሜ ጊዳና፡ ኦዴታናወካ ዳንዳዓካ» ያጊሰ።

21 ሄ ዎዴ ዛካሪያሲ ያሳ ከሌ ጌሊዲ ጋምዲዳ ጊሾ አይቢ ሃኒዴ ጊዲ አሳይ ካሬን ናጊሼ ጋምዲሰ።

22 ኢ ካሬ ከዬዲ ኤንታና ኦዲሳናው ዳንዳዲቤና። ማሊ ቤሶፔ አቲን ኦዴታናው ዳንዳዳናይሳ ቤዲዳ ዎዴ ቆንጨፍላ ቤዲዳይሳ ኤሪደሶና።

23 ዛካሪያሲ ሃጋዞ ዎዲያ ፖሊዲ ባ ሶ ሲሚሰ።

24 ሄሳፌ ጉዬ፡ ኢያ ማቺያ ኤልሳቤፃ ቃንገላታሱ። ኢቻሹ አጌና ኩሜሊ ባና ጌንላዳ ጋምዲሰ።

25 ኢያ፡ «ሳዳይ ባ ማሮታን ታ ቦሪያ አሳ ጊዶሬ ዲጋናው ቤዲዲ ሃ ዎዲያን ሃይሳ ኦሊሰ» ያጋሱ።

**ዩሱሳ ዩሌቴላይ ኮይሮቲዲ ኦዴቲሰ**

26 ኤልሳቤፃ ቃንገላቲን ኡሱፑንላ አጌናን፡ ያሳይ ኪታንቸዎ ጋብሬሌ ጋለላ ቢታን ዳዲያ ናዚሬቲ ካታማ ኪቲሰ።

27 ካወዎ ዳዊቲ ሼሻፔ ጊዲዳ ዮሴፋ ጊያ ኡሪሰ ኦይሼቲዳ ጌላዔኮ ኪቲሰ። ሄ ጌላዲያ ማይራዎ ጌቲታዉሱ።

28 ኪታንቸይ ኢኮ ቢዲ፡ «ዳሮ ዶሴቲዳሬ፡ ሳሮይ ኔው ጊዶ፡ ያሳይ ኔራ ዳዔሰ» ያጊሰ።

29 ማይራማ ኢያ ኦዳን ዳሮ ዳጋማዳ፡ «ሃይሲ አይቢ ሳሮሉ» ጋዳ ሄታሱ።

30 ኪታንቸይ ዛሪዲ፡ «ማይራሜ፡ ባቦፋ፤ ኔኒ ያሳ ሲንላን ሳባ ዴማዳሳ።

31 ሄኮ ኔኒ ቃንገላታና አዴ ናዓ ዩላና፡ ኢያ ሱንላካ ዩሱሳ ጋዳ ሱንላና።

32 ኢ ጊታ ጊዳና፡ ኡባፌ ቦላ ያሳ ናዓ ጌቲቲ ፃጌታና። ሳዳ ያሳይ ኢያ አዎ ዳዊቲ አራታ ኢያው ኢማና።

33 ኢ ያይቆባ ሼሻ ቦላ ሜሪናው ካዎታና፤ ኢያ ካዎቴላሰ ዛዊ ባዎ» ያጊሰ።

34 ማይራማ ኪታንቸዎኮ፡ «ሄሲ ዎኒዲ ሃናኔ? ታ አዴ ኤሪኬ» ያጋሱ።

35 ኪታንቸይ ዛሪዲ፡ «ጌሻ አያናይ ኔ ቦላ ዎጳና፡ ኡባፌ ቦላ ያሳ ዎልቃይ ኔ ቦላ ኩያታና። ሄሳ ጊሾ፡ ዩሌቲያ ጌሻ ናዓይ ያሳ ናዓ ጌቲታና።

36 ሄኮ፡ ኔ ደቢያ ኤልሳቤፃ ባ ጨማቴላ ላይላን ኣዴ ናዓ ቃንላታሱ። ኢያ ማይንሉ ጌቴቴዳር፣ ሺን ሃዒ ኡሱፑንላ ኣጌና ኦይካሱ።

37 ፆሳ ፆኒያባይ ባዎ» ያጊሱ።

38 ማይራማ፡ «ሄኮ፡ ታኒ ጎዳ ኣይሊው፡ ኔ ቃላዳ ታው ሃኖ» ያጋሱ። ሄሳፌ ጉዬ፡ ከታንቸይ ኢፔ ሻኬቲሱ።

39 ማይራማ ሄ ሳሚንታን ዴንዳዳ ዪሁዳ ቢታን ዴዒያ ኢሲ ጌዜ ካታማ ባሱ።

40 ዛካሪያሳ ሶ ጌላዳ ኤልሳቤፃ ሳርላሱ።

41 ኤልሳቤፃ ማይራማ ሳርሉዎ ሲዒዳ ዎዴ ኢ ኡሉዋን ዴዒያ ናዓይ ኡፋይሳን ጉፒሱ። ኤልሳቤፃ ጌሻ ኣያናን ኩማዳ፡

42 ባ ቃላ ጶቁ ኦላዳ፡ «ኔኒ ማጫሳ ጊደፌ ኣንጃቴዳር፡ ኔ ቃንላቴዳ ናዓይካ ኣንጃቴዳይሳ።

43 ሃኖሺን፡ ታ ጎዳ ኣዬ፡ ኔኒ ታኮ ያና ሜላ ታኒ ኦኔ?

44 ሄኮ ኔ ሳርሉዎ ታ ሲዒዳ ዎዴ ታ ኡሉዋን ዴዒያ ናዓይ ኡፋይሳን ጉፒሱ።

45 ጎዳይ ፖላና ጊዲ ኢሚዳ ቃላ ኣማኒዳራ፡ ኢያ ኣንጃቴዳር» ያጋሱ።

**ማይራማ ማዝሙሪያ**

46 ማይራማ ሃይሳዳ ያጋሱ፡

«ታ ሺምፒያ ጎዳ ቦንቻውሱ፡

47 ታ ኣያናይ ጳሊያ ፆሳን ኡፋይቴሱ።

48 ኢ ባ ኣይሌ ካዉሻቴላ ቤዒሱ።

ሃቸፌ ደሚዲ ዬሌቴሌ ኡባይ ታና ኣንጃቴዳር ጋና።

49 ኣይሱ ጊኮ፡ ዎልቃማ ጊዲዳ ኢ፡ ታው ጊታባ ኦሊሱ።

ኢያ ሱንላይ ጌሻ።

50 ኢያ ቦንቹይሳታ ቦላ፡

ኢያ ማርቴላይ ሜሪናፔ ሜሪና ጋካናሳ።

51 ባ ቄሲያን ሚኖባ ኦሊሱ፡

ባንታ ዎዛናን ኦቶርቴይሳታ ላሊሱ።

52 ዎልቃማ ካዎታ ኣራታፔ ካዉሺሱ፤

ባንታና ካዉሺዳይሳታ ካቦይሱ።

53 ኮሻቴዳይሳታ ሎዎባን ካልሲሱ፡

ሺን ዱሬታ ሜላ ኩሼ ዬዲሱ።

54 ባ ማርታ ቆፒዲ፥

ባ አይሊያ ኢስራዔል ማዲስ።

55 ሄሲካ ኑ አዋታስ አዲዳ ቃላ፥

አብራሃሜሴኔ ኢያ ሼሻስ ጊዳይሳ ሜሪናው ፖላናሳ»

ያጋሱ።

56 ማይራማ ኤልሳቤዳ ማታን ሄዡ አገና ሜላ ጋሞዓዳ ባ ሶ ሲማሱ።

**ፃማቂያ ዮሃንሳ ዩሌቴላ**

57 ኤልሳቤዳን ዩሌ ምድይ ጋከን አዳ ናዓ ዩላሱ።

58 ኢ ሾርቲኔ ኢ ዳቦቲ ጎዳይ ጊታ ማርታ ኦሊዳይሳ ሲዒዲ፥ ኢራ ኢሲፌ ኡፋይቲዶሶና።

59 ሆስፑንላ ጋላሳን ዮጋ ናዓ ቃፃራናው ዩዶሶና። ኢያ አዋ ሱንላን ዛካሪያሳ ጊዲ ሱንላናው ኮዩዶሶና።

60 ሺን አያ፥ «አካይ፥ ዮሃንሳ ጌቴታናው ቤሴስ» ያጋሱ።

61 ኤንቲካ፥ «ኔ ዳቦታፔ ሃ ሱንላን ያጌቴዳይ ኦኒካ ባዋ» ያጊዶሶና።

62 ኢያ አዋይ ኦና ጊዲ ሱንላኔኮ ኤራናው ኮዩዲ ኢያ ማላ ኦይቺዶሶና።

63 ኢ ፃፊያባ ኦይቺ ኤኪዲ፥ «ኢያ ሱንላይ ዮሃንሳ» ጊዲ ፃፊስ። ኡባይ ኢ ፃፊዳይሳ ቤዒዲ ማላሌቲዶሶና።

64 ኢራ ዛካሪያሳ ኢንፃርሳይ ቢሌቲስ፥ ያሳ ጋላቲሼ ኦዴቴላ ኦይኪስ።

65 ሾርቲ ኡባይ ያሻን ኩሚዶሶና። ሃ ሃኒዳባይ ጌዜ ዩሁዳ ቢታን ኦዴቲስ።

66 ሄሳ ሲዒዳ ኡባይ፥ «ሃ ናዓይ አይ ሃናንዳሻ» ጊዲ ባንታ ጊዶን ኦዴቲዶሶና። ጎዳ ኩሼይ ኢያራ ዳዔስ።

**ዛካሪያሳ ማዝሙሪያ**

67 ዮሃንሳ አዋይ ዛካሪያሲ ጌሻ አያናን ኩሚዲ ሃይሳዳ ያጊዲ ተንቢቲ ኦዲስ።

68 «ኢስራዔሊያ ጎዳይ ጋላቲቶ፥

ዩዲ ባ አሳ ዋዚስ።

69 ባ አይሊያ ዳዊቲ ኬላን

አቶቴላ ካጪያ ዳንሊስ።

70 ሄሲካ ቤኒ ዋዴ ጌሻ ናቤታ ዶናን ኦዴቲዳይሳ ሜላ፥

71 ኢያ አሾይ ኑ ሞርኬታፔኔ

- 72 ኑራ ኤቄቲያ ኡባ ኩሺያ፤  
ሄሳ ኢ ኦሊዲይ ኑ ኣዋታሰ ባ ማርታ ቤሳናሲኔ፥  
ባ ጌሻ ጫቁዋ ናጋናሳ።
- 73 ኑ ኣዋ ኣብራሃሚሰ ጫቁዳ  
ጫቁዋ ቆፓናሲኔ
- 74 ኑ ሞርኬታ ኩሼፔ ከሲዲ  
ያሺ ባይና ኢያ ሃጋዛና ማላሳ።
- 75 ኑ ለይላ ኡባን ጌሻቴላኒኔ ዓሎቴላን  
ባ ሲንላን ኑና ኤሳናሳ።
- 76 ቃሲ ላ ናዓው፥ ኔኒ ኡባፌ ቦላ ያሳ ናቤ ጌቴታና።  
ጎዳ ኦጊያ ሎይላናው ኔ ኢያ ሲንላን ባና።
- 77 ኤንታ ናጋራይ ቁሽቴን፥  
ኤንቲ ኣቶቴላ ዳማናይሳ ኔ ጎዳ ዳሪያሰ ኦዳና።
- 78 ኑ ያሳ ሎዖ ማርቴላፌ ዳንደይሳን  
ዋንታ ያልቄይ ኑሰ ሳሎዋፔ ከዪሰ።
- 79 ሄሲካ ቋሚኒኔ፥  
ሃይቆ ኩያ ጋርሳን ዳዔይሳታሰ ፖዒሳናሳ፥  
ኑ ቶሁዋካ ሳር ኦጊያኮ ዛራናሳ»

ያጊሰ።

80 ናዓይ ዲጪሰ፥ ኣያናን ሚኒሰ፥ ኢሰራዔሌ ኣሳሰ ቆንጫና ጋካናው ባዘ ቢታን ዳዒሰ።

## 2

### ዩሱሳ ዩሌቴላ (ማቶ 1:18-25)

- 1 ሄ ዋዳ ሮሜ ቢታን ዳዒያ ኣሳ ኡባይ ታይቤታና ማላኔ ሱንላይ ያፌታና ማላ ካዎይ ኣዉጊሰያሲ ከቲሰ።
- 2 ሄሲካ ቄሬኖሲ ሶሬ ቢታ ኣይሲያ ዋዳ ኦሴቴዳ ኮይር ታይቡዋ።
- 3 ሄሳ ጊሾ፥ ኢሲ ኢሲ ኣሲ ባ ሱንላ ያፌታናው ባ ዩሌቴዳ ቢታ ቢሰ።
- 4 ዮሴፊካ ዳዋቴ ከላፌኔ ያራፔ ጊዲዳ ጊሾ ጋለላ ናዚሬቴ ካታማፔ ዳንዲዲ ዳዋቴ ካታማ ጊዲዳ ዪሁዳ ቤቴሌሜ ቢሰ።
- 5 ቢሾ፥ ዩላናው ዋዳይ ዉሪዳ ኢ ኦይቺ ዋሊዳ፥ ማይራሚራ ዋላ ያፌታናው ቢሰ።
- 6 ኤንቲ ያን ዳዒሺን ኢው ዩሎ ዋዳይ ጋኪሰ።

7 ባ ባይራ ናዓ ዩላሱ። ጨርቃራ ፃፃዳ ኢማሊ ኣቂያሶን ቤሲ ቆዩዳ ጊሾ ዳራን ማሄ ሙዚያ ጎንጌን ዚንዒሳሱ።

**ሄንጻንቸታኔ ኪታንቸታ**

8 ሄ ጋዲያን ቃማ ዶርሳ ዉዲያ ናጊሼ ካሬን ኣቂያ ሄንጻንቸቲ ዴያሶና።

9 ጎዳ ኪታንቸይ ሃሳዮና ዩዲ ኤንታ ማታን ኤቂስ። ጎዳ ቦንቸይ ኤንታ ዩሹዋን ፖሊስ፤ ኤንቲካ ዎልቃማ ያሺ ያዩዶሶና።

10 ሺን ኪታንቸይ፡ «ያዮፊቴ! ሄኮ፡ ኣሳ ኡባስ ጊዲያ ጊታ ኡፋይሳ ሚሺራቸዎ ኤካዳ ያስ።

11 ሄሲካ፡ ዳዊቴ ካታማን ኣሺይሲ ሂንቴው ሃቺ ዩሌቲስ። ኢ ጎዳ ኪፊስቶሳ።

12 ዞቃሌ ናዓይ ጨርቃራ ፃፃቲዲ ጎንጌን ዚንዒዳይሳ ሂንቴ ዴማና፤ ሄሲካ ሂንቴው ማላ ጊዶ» ያጊስ።

13 ቆፖና ዳር ሳሎ ኪታንቸቲ ኪታንቸውራ ኢሲፌ ቆንጨዲ፤

14 «ቦንቸይ ያሳስ ቶቃ ሳሎዋን፡

ሳርይ ቢታ ቦላ ያሳይ ዶሲያ ኣሳስ ጊዶ»

ያጊዲ ጋላቲዶሶና።

15 ኪታንቸቲ ኤንታፌ ሻኬቲዲ ሳሎዋ ኬዩዳፔ ጉዬ ሄንጻንቸቲ፡ «ኣኔ ጎዳይ ኑስ ቆንጨሲዳባኔ ሃኒዳባ ቤዓናው ቤቴሌማ ቦስ» ያጊዶሶና።

16 ኤንቲካ ኤሌሲዲ ቢዶሶና። ማይራዎ፡ ዮሴፋኔ ዞቃሌ ናዓ ጎንጌን ዚንዒዳይሳ ቤዒዶሶና።

17 ቤዒ ሲሚዲ ናዓባ ኤንታው ኦዴቶይሳ፡ ቆንጨሲዲ ሄ ቤሳን ዴዒያ ኣሳስ ማርካቲዶሶና።

18 ሄሳ ሲዒዳ ኡባይ ሄንጻንቸቲ ኦዲዳይሳን ማላሌቲዶሶና።

19 ማይራማ ሃኒዳባ ኡባ ባ ዎዛናን ቆፓሽ ዴዓሱ።

20 ሄንጻንቸቲ ኤንታው ኦዴቲዳይሳዳ ሃኒን ቤዒዶሶና። ሄሳ ጊሾ፡ ባንታ ሲዒዳባሲኔ ቤዒዳባ ኡባስ ያሳ ቦንቸሽኔ ጋላቲሽ ሲሚዶሶና።

**ዩሱሳ ያሳ ኬሊ ኤፊዶሶና**

21 ሆስፑንሳ ቃማን፡ ቃፃር ዎዴይ ጋኪን፡ ኢ ቃንሳታናፔ ሲንሌ ኪታንቸይ ዎሊዳ ሱንሳን ዩሱሳ ጌቴቲስ።

22 ሙሴ ዋጋ ማላ ኤንታ ጌሻቴላ ዋዴይ ፖሌቴዳፔ ጉዬ ዮሴፋራኔ ማይራሚራ ዮጋ ናዓ ባንታ ጎዳስ ኢማናው ዬሩሳላሜ ቢደሶና።

23 ሄሲካ፣ ጎዳ ዋጋን፣ «አዴ ጊዲዳ ባይራ ናዒ ኡባይ ጎዳስ ዲማቴዳይሳ ጊዶ» ጌቴቴዲ ፃፊቴዳይሳ ፖላናሳ።

24 ቃሲ ጎዳ ዋጋን፣ ናሞ፡ ኩራቾ ዋይኮ ሆሌ ያርሻናው ኤፊደሶና።

25 ሄ ዋዴ ጌሺኔ አማኖራ ሚኖ ጊዲዳ ሲሞና ጌቴቴያ አሲ ዬሩሳላሜን ዴዔስ። ኢ ኢስራዔሌታ አቶቴላ ናጊሼ ዴዔስ። ጌሻ አያናይካ ኢያ ቦላ ዴዔስ።

26 ቃሲ ኪሪስቶሳ ቤዖና ሃይቆናይሳ ጌሻ አያናይ ኢያው ቆንጨሲን ኤሪዲ ዴዔስ።

27 ኢ ሄ ጋላስ አያናይ ካሌሊን ያሳ ኬሌ ቢስ። ናዓ አዬራኔ አዋራ ዋጋ ፖላናው ዮጋ ናዓ ዬሱሳ ኤኪዲ ጌሊዳ ዋዴ

28 ሲሞኒ ሞኪ ኤኪዲ ናዓ ኢዲሚዲ፣

29 «ጎዳው ኔ ታው ጌሊዳ ቃላ ማላ፣

ሃዒ ኔ አይሊያ ሳሮን ሞይዛ።

30 ታ አይፊይ አሳ ኡባ ሲንላን ኔ ጊጊሲዳ፣

31 ኔ አሹዋ ቤዒስ።

32 ሄሲካ ካዎቴላታ ኡባስ፣

ያሳ ኦጊያ ቆንጨሲያ ፖዖ፣

ኔ አሳ ኢስራዔሌስካ ቦንቾ»

ያጊዲ ያሳ ጋላቴስ።

33 ዮሴፋራኔ ማይራሚራ ኢያው ኦዴቴዳባን ማላሌቴደሶና።

34 ሲሞኒ ኤንታ አንጂስ። አዬ ማይራሚኮ፣ «ሄኮ ዳሮ አሳ ዋዛና ቆፋይ ቆንጨና ማላ፣ ኢስራዔሌን ዴዒያ ዳሮታስ ኤንታ ኩንዳሳሲኔ ዴንዲዋስ ያሳን ደሬቴስ።

35 ቃሲ ኤቄቴይሳታስ ማላ ጊዳና። ኔ ሽሞፑዋራካ ቃሲ ማሺ አቆና» ያጊስ።

36 ቃሲ አሴሪ ያራፔ ጊዲዳ ፋኑዔላ ናዒያ ሃና ጌቴቴያ ናቤይ ዴዓዉሱ። ኢያ ዳሮ ጨማሱ፤ ኢያ ባ ኮይሮ አዚናራ ላፑን ላይሌ ዴዓሱ።

37 ኢ አዚናይ ሃይቁን ሆስፑን ታማኔ አይዲ ላይሌ ጊዳና ጋካናው ቃማኔ ጋላስ ፓጩይ ባይና ዋሳኒኔ ያማን ያሳ ኬላን ሃጋዛሱ።



38 ኢያሁሳ ሄ ሳቲያን ባዳ ያሳ ጋላታሱ፤ ዩሩሳሌም ወዘክላና ስገራ ኡባሰ ዮጋ ናባባ ማርካታሱ።

39 ዮሴፋራኔ ማይራሚራ ጎዳ ሂጊያን ከቴቲዳ ዋጋ ኡባ ፖሊዳፔ ጉዬ ጋሊላ ቢታን ዳዒያ ባንታ ካታማ ናዚሬቴ ሲሚደሶና።

40 ናባይ ዲጨሽኔ ሚኒሽ ቢሰ። ጨንጫቴላን ኩሚሰ፤ ያሳ አቶ ከሃቴላይ ኢያ ቦላ ዳዔሰ።

**ዩሱሲ ያሳ ከሌ ቢሰ**

41 ዮሴፋራኔ ማይራሚራ ፋሲካ ባሌ ቦንቻናው ላይላን ላይላን ዩሩሳሌም ቦሶና።

42 ዩሱሳሰ ታማኔ ናምቡ ላይሌ ጊዲያ ዋዴ ካሴ ማዘቴዳይሳዳ ባሊያ ቦንቻናው ቢደሶና።

43 ባሊያ ቦንቻዳፔ ጉዬ ሶ ሲሚያ ዋዴ ናባይ ዩሱሲ ዩሩሳሌምን አቲሰ። ሺን ዮሴፋራኔ ማይራሚራ ኢ ዩሩሳሌምን አቶይሳ ኤሪቦኮና።

44 ኢ ሶ ሲሚያ አሳራ ዋላ ዳዒያ ዳኒን ኤንቲ ኢሲ ጋላሳ ኦጌ ቢደሶና። ኢ ባይናይሳ ኤሪዳፔ ጉዬ ባንታ ዳቦታኔ ላጌታ ማታን ኮዪደሶና።

45 ኢ ያን ቆዩን ኮዪሽ ጉዬ ዩሩሳሌም ጋካናው ቢደሶና።

46 ሄዡ ጋላሳፔ ጉዬ ያሳ ከላን አስታማሬታ ጊደን ኡቲዲ ኤንታባ ሲዲሽኔ ኤንታ ኦይቸሽ ዳዒሺን ዳሚደሶና።

47 ኢያ ሲዲያ ኡባይ ኢያ አከካኒኔ ዛሩዋን ማላሌቲደሶና።

48 ሶ አሳይ ኢያ ዳሚዳ ዋዴ ማላሌቲደሶና። ኢያ አያካ፣ «ታ ናባው፣ አይሰ ኩና ሃይሳዳ ኦላዲ? ኔ አዋራኔ ታራ ኔና ኮዪሽ ኤንዔቲዳ» ያጋሱ።

49 ዩሱሲ ኤንታኮ፣ «ታና አይሰ ኮዪቲ? ታ፣ ታ አዋ ከላን ዳናው ቤሴይሳ ኤሪከቲ» ያጊሰ።

50 ሺን ኢ ኤንታኮ ጊዳባ ኤንቲ አከኪቦኮና።

51 ሄሳፌ ጉዬ፣ ኤንታራ ኢሲፌ ናዚሬቴ ካታማ ቢሰ። ኤንታው ከቴቲሽ ዳዒሰ። ኢያ አያ ሄ ኡባ ባ ዋዛናን ዋላዳ ናጋሱ።

52 ዩሱሲ፣ ጨንጫቴላን፣ ጌሳኒኔ ቴማን ያሳ ሲንላኒኔ አሳ ሲንላን ዲጨሰ።

---

2:39 ማቶ 2:23    2:41 ከሳ 12:1-27፤ ዛሬ 16:1-8    2:52 1ሳው 2:26፤ ለሚ 3:4

### 3

ፃጃቁያ የሃኒሳ ቲሚርቲያ  
(ማቶ 3:1-12፤ ማር 1:1-8፤ ዮሃ 1:19-28)

1 ካዎይ ዲባርዮሲ ሮሜ ቢታን ካዎቲን፣ ታማኔ ኢቻሻንሉ ላይላን፣ ጳንጭ ጲላዎሲ ዪሁዳ ሃሪያ ዎዴ ሄሮዲሲ ጋሊላ ሃሪያ ዎዴ ኢያ ኢሻ ፊልጶሲ ኢጱሪያሳኔ ዲራኮንዶሳ ሃሪያ ዎዴ ሊሳኒዮሲ ኣብላኒሳ ሃሪያ ዎዴ

2 ሃናራኔ ቃያፋራ ካሂኔ ሃላቃ ጊዲ ዴቢሽን፣ ያሳ ቃላይ ዛካሪያሳ ናዓ የሃኒሳኮ ባዘ ቢታ ዪሰ።

3 የሃኒሲ፣ «ሂንቴ ናጋራፔ ሰሚቴኔ ፃጃቁቲቴ። ያሳይ ሂንቴ ናጋራ ኣቶ ጋና» ያጊዲ ታማርሲሼ ዮርዳኖሴ ሻፋ ሄራን ዴዒያ ቢታ ኡባ ቢሰ።

4 ሄሲካ ናቤይ ኢሳያሲ ባ ማፃፋን፣

«ባዘ ጊደን ባ ቃላ ጶቁ ኦሊዲ፣

ዋሲያ ኡራ ቃላይ፣

ናሳዳ ኦጊያ ጊሲሰቴ፣

ሆርጋካ ፒዲ ኦሊቴ።

5 ኣፎ ኡባይ ኩማና፣

ዙማይኔ ዴሪይ ዚቁ ጋና።

ዎቤ ኦጊይ ሉላና፣

ጊሳና ሆርጋይ ቁንዲ ጋና።

6 ኣሾ ማዒዳ ኡባይ፣

ያሳ ኣሾዋ ቤዓና »

ጊዲ ፃፊዳይሳዳ ሃኒሰ።

7 የሃኒሲ፣ ባ ኩሼን ፃጃቁታናው ዪዳ ኣሳኮ፣ «ሂንቴኖ፣ ሾሻ ናይቶ ያናው ዴዒያ ሃንቁዋሬ ኣታና ሜላ ሂንቴና ዘራዳይ ኦኔ?

8 ሂዛ፣ ሂንቴ ሲሙዋ ቆንጨሲያ ሎዎ ኦሶ ኦሊቴ፣ ሂንቴ ዎዛናን፣ ኩሰ፣ ኦ ኣዎይ ኣብራሃሜይ ዴዒሰ ጊዲ ጨቁቶፊቴ።» ሃ ሲባቴ፣ ሃ ሹቻታፔ ያሳይ ኣብራሃሜሰ ናዓ ኬሳናው ዳንዳዒሰ።

9 ሄኮ፣ ቤፃይ ሚላ ፃጶን ዴዒሰ። ሂዛ፣ ሎዎ ኣይፊ ኣይፎና ሚላ ኡባይ ቃንጭቲዲ ታማን ዬጌታና» ያጊሰ።

10 ኣሳይ፣ «ያቲን ኦኒ ኣይ ኦሊኖ?» ያጊዲ ኣይቺዶሶና።

11 የሃኒሲ ዛሪዲ፣ «ናሞዑ ኣፊሊ ዴዒያ ኣሲ ባይናይሳሰ ኣሞ። ካሊ ዴዒይሲ ባይናይሳሰ ኣሞ» ያጊሰ።

12 ቃራፃ ቃንጻሴይሳቲ ፃማቄታናው ዪዲ፡ «አስታማሪያው፡ ኑኒ አይ ኦሊኖ?» ያጊደሶና።

13 ኢ ዛሪዲ፡ «ሂንቴ ቃንጻሳናው ከቴቶይሳፊ አሊዲ ኤኮፊቴ» ያጊሰ።

14 ቃሲ ዋታዳሬቴ ዪዲ፡ «ኑኒ አይ ኦሊኖ» ያጊዲ ኦይቺደሶና።

የሂኒሲ፡ «ኦዳባካ ዋልቃን ዳፊዲ ኤኮፊቴ፡ ኦናካ ዋርደን ሞቶፒቴ፡ ሂንቴ ዳሞዜይ ሂንቴው ጊደ፤ ኦፋይቲዲ ዳዒቴ» ያጊሰ።

15 አሳይ ከሪሰቶሳ ናጊሼ ዳዒያ ጊሾ የሂኒሳ፡ «ኢ ከሪሰቶሳ ጊዳንዳሻ?» ጊዲ ቆፒደሶና።

16 የሂኒሲ ኡባሰ ዛሪዲ፡ «ታኒ ሂንቴና ሃላን ፃማቃይሰ፡ ሺን ታፔ አጁዲ ዋልቃሚይሲ ያና። ታኒ ኢያ ጫማ ዋደሩዋ ቢላናው ቤሶና አሲ። ኢ ሂንቴና ጌሻ አያናኒኔ ታማን ፃማቃና።

17 ዉዲማን ዳዒያ ካላ ፖሎ ጌሻናው ፒሌይ ኢያ ኩሼን ዳዒሴ። ጌሻ ካላ ባ ሻሊያን ቆላና፤ ካሊያ ቆየና ታማን ፀጋና» ያጊሰ።

18 ቃሲ የሂኒሲ አሳ ዳር ዘሬ ዛሪዲ ዋንጌላ \* ኦዲሰ።

19 ሺን የሂኒሲ ሄርዲሲ ባ አሻ ማቺው፡ ሄርዲያዳ፡ ኤኪዳ ጊሾኔ ሃራ ኢታ ኦሶታ ጊሾ ካጪዳ ዋዳ

20 ሄርዲሲ ካሴይሳ ቦላ ሃራባ ኡባ ጉጁዲ የሂኒሳ ዋይኔ ጌልሲሰ።

ዬሱሳ ፃማቄቲሳ  
(ማቶ 1:1-17፤ 3:13-17፤ ማር 1:9-11)

21 የሂኒሲ ቃሼታናፔ ሲንሌ አሳ ኡባ ፃማቄዲ ሲሚን፡ ዬሱሲካ ቃሲ ፃማቄቲሰ። ኢ ዋሲሺን ሳሎይ ደዬቲሰ።

22 ጌሻ አያናይ ሆሌዳ ቤንቲሼ ኢያ ቦላ ኡቲሰ። ሳሎፔ «ታኒ ደሲያ ናዒይ ኔና፤ ኔ ታና ኡፋይሳሳ ያጊያ» ቃላይ ዪሰ።

23 ዬሱሲ ታማርሶ ኦይኪያ ዋዳ ኢያው ሃሰታው ላይላ ጊዲሺን፡ አሳይ ኢያ የሴፋ ናዒ ጊዲ ቆፒሰ።

የሴፊ ኤሌ ናዒ፡

24 ኤሌይ ማቴ ናዒ፡

---

3:12 ሉቃ 7:29 \* 3:18 ዋንጌላ፡ ጌሪኬ ደናን ዋንጌላ ጊያ ቃላይ ዳር ኡፋይሲያ ኦዳ ዋይኮ ሚሺራቾ ጉሰ። ሄ ሚሺራቾይካ ከሪሰቶሲ አሳ ዜሬላ ኡባ ሚሪና ፐርዳሬ አሻናው ከቴቲዲ ዪዳ ገታ ኡፋይሳ (ሉቃ 1:19፤ 2:10)። 3:19 ማቶ 14:3-4፤ ማር 6:17-18 3:22 ሜዴ 22:2፤ ማዝ 2:7፤ ኢሳ 42:1፤ ማቶ 3:17፤ ማር 1:11፤ ሉቃ 9:35

ማቴይ ሌዌ ናባ፡ ሌዌይ ማልካ ናባ፡  
 ማልኬይ ዮና ናባ፡ ዮኒ ዮሴፋ ናባ፡  
 25 ዮሴፊ ማታቴ ናባ፡ ማታቴይ አሞጭ ናባ፡  
 አሞጭ ናሆሜ ናባ፡ ናሆሜይ አሲሊሜ ናባ፡  
 አሲሊሜይ ናጌ ናባ፡  
 26 ናጌይ ማዓቲ ናባ፡  
 ማዓቲይ ማታቴዬ ናባ፡ ማታቴዬይ ሳማዬ ናባ፡  
 27 ሳማዬይ ዪሁዳ ናባ፡ ዪሁዲ ዮናኔ ናባ፡ ዮናኔይ ራሴ ናባ፡  
 ራሴይ ዜሩባቤላ ናባ፡ ዜሩባቤላይ ሳላቲያሌ ናባ፡  
 ሳላቲያሌይ ኔሬ ናባ፡  
 28 ኔሬይ ማልካ ናባ፡  
 ማልኬይ ሃዳ ናባ፡ ሃዳይ ቆሳሜ ናባ፡  
 ቆሳሜይ ኤልሞዳኔ ናባ፡ ኤልሞዳኔይ ኤሬ ናባ፡  
 29 ኤሬይ ዮሴጌ ናባ፡ ዮሴጌይ አላዛራ ናባ፡  
 አላዛሪ ዮራሜ ናባ፡ ዮራሜይ ማቴ ናባ፡  
 ማቴይ ሌዌ ናባ፡  
 30 ሌዌይ ሲሞና ናባ፡  
 ሲሞኒ ዪሁዳ ናባ፡ ዪሁዲ ዮሴፋ ናባ፡  
 ዮሴፊ ዮናኔ ናባ፡ ዮናኔይ ኤሊያቄሜ ናባ፡  
 31 ኤሊያቄሜይ ማሊዬ ናባ፡ ማሊዬይ ማይናኔ ናባ፡  
 ማይናኔይ ማቴ ናባ፡ ማቴይ ናታኔ ናባ፡  
 ናታኔይ ዳዊቲ ናባ፡  
 32 ዳዊቲይ ኢሴዬ ናባ፡  
 ኢሴዬይ ኢዮቤዳ ናባ፡ ኢዮቤዳይ ቦዔዛ ናባ፡  
 ቦዔዛ ሳልሞና ናባ፡ ሳልሞኔይ ናባሶና ናባ፡  
 33 ናባሶኔይ አሚናዳቤ ናባ፡ አሚናዳቤይ ራሜ ናባ፡ ራሜይ አርኔ  
 ናባ፡  
 አርኔይ አሰሮሜ ናባ፡  
 34 አሰሮሜይ ፋሬሴ ናባ፡  
 ፋሬሴይ ዪሁዳ ናባ፡  
 ዪሁዲ ያይቆባ ናባ፡  
 ያይቆቤ ዪሳቃ ናባ፡ ዪሳቄ አብራሃሜ ናባ፡  
 አብራሃሜይ ታራ ናባ፡  
 35 ታሪ ናኮሬ ናባ፡  
 ናኮሬይ ሳሩጌ ናባ፡ ሳሩጌይ ሬሁ ናባ፡  
 ሬሁይ ፋሌቄ ናባ፡ ፋሌቄይ ኤቤራ ናባ፡  
 ኤቤሮይ ሰላ ናባ፡  
 36 ሰሊ ቃይናሜ ናባ፡  
 ቃይናሜይ አርፋኪሳዳ ናባ፡ አርፋኪሳዳይ ሴሜ ናባ፡

ሴሜይ ኖሄ ናዓ፣ ኖሄይ ለሜሄ ናዓ፣  
 37 ለሜሄይ ማቱሳላ ናዓ፣ ማቱሳሊ ሄኖኬ ናዓ፣  
 ሄኖኬይ ያሬዴ ናዓ፣ ያሬዴይ ማላልዔላ ናዓ፣  
 ማላልዔሊ ቃይናኔ ናዓ፣  
 38 ቃይናኔይ ሄኖሳ ናዓ፣  
 ሄኖሴይ ሴታ ናዓ፣ ሴቴይ ኣዳሜ ናዓ፣  
 ኣዳሜይ ዖሳ ናዓ።

# 4

**ዩሱሲ ፓጩቲስ**  
 (ማቶ 4:1-11፤ ማር 1:12-13)

- 1 ዩሱሲ ጌሻ ኣያናን ኩሚዲ ዮርዳኖሴ ሻፋፔ ሲሚዳ ሜላ ኣያናይ ኢያ ባዙ ኤፊስ።
- 2 ያን ኦይታሙ ጋላሲኔ ቃማ ዓላሄን ፓጩቲስ። ሄ ጋላሳታን ኣይኮካ ሞና ጋሞዲ ጊሾ ወርሴላን ኮሻቲስ።
- 3 ዓላሄይ ኢያኮ፣ «ኔን ዖሳ ናዓ ጊዲኮ ኣኔ ሃይሲ ሹቻይ ኡይሉ ጊዶ ጋዶ ኪታ» ያጊስ።
- 4 ዩሱሲ ዛሪዲ፣ «ኣሲ ኡይላ ዓላላን ዴና ጌቴቲዲ ዓፌቲስ» ያጊስ።
- 5 ሄሳፌ ጉዬ፣ ዓላሄይ ዩሱሳ ኣዲሳ ዴሬ ቦላ ኬሲዲ ሃ ኣላሚያ ካሞቲላታ ኣይፌ ቁጲ ዛራናው ቤሲስ።
- 6 ዓላሄይ፣ «ሃ ኡባስ ማታይኔ ቦንቾይ ታው ኣሜቲስ። ታኒ ዶሲዳ ኦዴሰካ ኢሚያ ጊሾ ኔው ኢማና።
- 7 ሄሳ ጊሾ፣ ኔኒ ታው ጎይኒኮ ኡባይ ኔው ጊዳና» ያጊስ።
- 8 ዩሱሲ ዛሪዲ፣ «ኔ ጎዳ፣ ኔ ዖሳ፣ ኢያ ዓላላ ጎይና ጌቴቲዲ ዓፌቲስ» ያጊስ።
- 9 ወርሴላን ዓላሄይ ዩሱሳ ዩሩሳላሚ ኤፊዲ ዖሳ ኬላስ ሁዒያ ቦላ ኤሲዲ፣ «ኔን ዖሳ ናዓ ጊዲኮ ኣኔ ዲጌ ሳዓን ኔና ዬጋ።
- 10 ኣይስ ጊኮ፣  
 ነና ናጊያ ኪታንቾታ  
 ዖሳይ ኔ ጊሾ ኪታና።
- 11 ኤንቲ ኔ ቶሆይ ሹቻን ጴቤቶና ሜላ፣  
 ባንታ ኩሺያን ጶቁ ኦሊዲ ኔና ዴንላና) ጌቴቲዲ ዓፌቲስ» ያጊስ።

12 ዩሱሲ ዛሪዲ፡ «ኔ ጎዳ ያሳ ፓጮፋ ጌቲቲዲ ፃፊቲስ» ያጊስ።

13 ፃላሄይ ዩሱሳ ፓጪያ ወርሲዳፔ ጉዬ ሃራ ኢንጄ ዋዴ ዴማና ጋካናው ኢያፔ ሻኬቲስ።

ዩሱሲ ጋሊላን ታማርሶ ኦይኪስ  
(ማቶ 4:12-17፤ ማር 1:14-15)

14 ዩሱሲ ኣያና ዋልቃን ኩሚዲ ጋሊላ ሲሚስ። ኢያ ሱንፋይ ሄራን ዴዒያ ቢታ ኡባን ኬዩስ።

15 ኢ ኣይሁዴ ዋሳ ኬሌ ጌሊዲ ታማርሲስ፤ ኣሳ ኡባይ ኢያ ጋላቲዶሶና።

16 ያፔ ኢ ዲጪዳ ካታማ ናዚሬቲ ዩስ። ካሴ ሜዜቲዳይሳዳ ሳምባታ ጋለስ ኣይሁዴ ዋሳ ኬሌ ጌሊስ። ናባባናዉካ ዴንዲ ኤቂስ።

17 ናቢያ ኢሳያሳ ማፃፋይ ኢያው ኢሜቲን፣ ዶዩዲ፣ ሃይሳዳ ያጊዲ ፃፊቲዳይሳ ዴሚስ።

18 «ጎዳ ኣያናይ ታ ቦላ ዴዒስ፣  
ማንቆታስ ዋንጌላ ኦዳና ሜላ  
ያሳይ ታና ዶሪስ።

ቃሽቲዳይሳታስ ቢሌቴላ፣  
ቆቂዳይሳታ ፃሊሳናሲኔ  
ኡንዔቲዳይሳታ ቢርሻና ሜላ፣

19 ያሳይ ኬሃናው ቆፒዳ ላይፋ ኦዳና ሜላ ታና ኪቲስ» ያጊስ።

20 ሄሳፌ ጉዬ፣ ማፃፋ ፃዲ ሃጋዜይሳስ ኢሚዲ ታማርሳናው ኡቲስ። ኣይሁዴ ዋሳ ኬላን ዴዒያ ኣሳቲ ኡባይ ጫዲ ፃሎሶና።

21 ኢ፣ «ሃይሲ ሂንቴ ሃይላን ሂንቴ ሲዒያ ሃ ማፃፋ ቃላይ ሃቺ ፖሌቲስ» ያጊስ።

22 ኡባይ ኢያባ ዳርሲዲ ኦዴቶሶና። ቃሲ ኢያ ዶናፔ ኬያ ኣጶ ኬሃቴላን ኩሚዳ ቃላን ማላሌቲሹ፣ «ሃይሲ ዮሴፋ ናባ ጌዴኔዬ?» ያጊዶሶና።

23 ኢ፣ « ሳኖ ቆሌ ኣዋው ኔና ኣሻ፣ ቂፊርናሆሜን ኔ ኦሊዳባ ኦ ሲያይሳ ቃሲ ሃይሳን ኔ ካታማን ኦላ» ያጊያ ለሚሱዋን ሂንቴ ታና ጋናይሳስ ሲጴይ ባዋ» ያጊስ።

24 ቃሲ፣ «ቱማ ኦዳይስ፤ ናቤይ ባ ዩሌቲዳ ቢታን ቦንቹቴና።

25 «ታ ሂንቲው ቱማ ኦዳይስ፤ ሳሎይ ሄቭ ላይሊኔ ባጋ ጎርዳቲን ሚኖ ኮቪ ቢታ ኡባን ዳዒያ ኤሊያሳ ዋዴ ዳሮ አምዔቲ ኢሰራዔልን ዳዖሶና።

26 ኤሊያሲ ኤንታፊ ኢሲኔኮካ ከቲቲቤና። ሺን ሳራፕታን ዳዒያ አምዔኮ ከቲቲስ።

27 ናቢያ ኤልሳዔ ዋዴ ኢሰራዔልን ዳሮ ባሮ ሃርጋንቸቲ ዳዖሶና። ሺን ሶሬ ኡራ ኒዒማኔፔ ኣቲን ኦኒካ ፓዲቤና» ያገሰ።

28 ኣይሁዴ ዋሳ ኬላን ዳዒያ ኣሳ ኡባይ ሄሳ ሲዒዳ ዋዴ ዳሮ ዩሎቲዶሶና።

29 ባንታ ኡቲዳ ቤሳፊ ዳንዲዲ ዙማ ቦላ ኬዳቲዳ ካታማፔ ጋዳ ኬሲዲ ሱጊ ዩዳናው ኣፎ ዶና ኤፊዶሶና።

30 ሺን ኢ ኤንታ ጊዶራ ካንሱዲ ኣጂስ።

**ዩሱሲ ቱና ኣያና ኬሲስ**  
(ማር 1:21-28)

31 ያፔ ጋሊላ ቢታን ዳዒያ ቂፊርናሆሜ ካታማ ቢስ። ያን ሳምባታ ጋላስ ኣሳ ታማርሲስ።

32 ኢ ታማርሲይ ማታራ ጊዲያ ጊሾ ኡባይ ኢያ ቲሚርቲያን ማላሊቲዶሶና።

33 ኣይሁዴ ዋሳ ኬላን ቱና ኣያናይ ኦይኪዳ ኡራይ ዳዔስ።

34 ኢ፣ «ናዚሬቲ ዩሱሳ ኦና ኣይስ ዋይሳይ ኦፔ ሃካ፤ ኔኒ ዩዳይ ኦና ጳይሳናሴዩ? ኔኒ ኦኔኮ ታኒ ኤራይስ። ኔኒ ያሳፊ ዩዳ ጌሻ» ያገዲ ዋሲስ።

35 ዩሱሲ ቱና ኣያናኮ፣ «ሲዒ ጋዳ ሃ ኡራፔ ኬያ» ያገዲ ሃንቂስ። ቱና ኣያናይ ኡራ ኣሳ ኡባ ሲንላን ሆሊ ዩጊዲ ኣይኮካ ቆሆና ዩዲዲ ኬዩስ።

36 ኣሳ ኡባይ ማላሊቲዶሶና። ዋሊኮ፣ «ሃናስ፣ ሃይሲ ኣይቢ ቲሚርቲ? ቱና ኣያናታ ማታኒኔ ዋልቃን ከቲስ፤ ኤንቲካ ኬዮሶና» ያገደሶና።

37 ኢያ ሱንላይ ሄራ ኡባን ኬዩስ።

**ዩሱሲ ዳሮ ሃርጋንቸታ ፓሊስ**  
(ማቶ 8:14-17፤ ማር 1:29-34)

38 ሄሳፊ ጉዩ፣ ዩሱሲ ኣይሁዴ ዋሳ ኬላፊ ኬዩዲ ሲሞና ሶ ጌሊስ። ሲሞና ማቸ ኣያ ሚኖ ቆዖ ሚሻ ሃርጌን ሳኬታሱ። ኢዮ ፓላና ሜላ ዩሱሳ ዋሲዶሶና።

39 ኢህዳስ ሸቂ ሆኪዲ ኢህርጊያ ሃንቁስ። ሚሻይ ኣገን ኤሌሳ ዴንዳዳ ኤንታ ሞካሱ።

40 ኣዋይ ወላና ሃኒሺን ዲማ ዲማ ሃርጊያን ኦይኬቲዳ ኣሳ ኢያኮ ኤሂዶሶና። ኢ ኢሱዋ ኢሱዋ ቦላ ባ ኩሺያ ዋሊዲ ፓሊስ።

41 ቱና ኣያናቲ ቃሲ፣ «ኔኒ፣ ያሳ ናዓ» ገዲ ዋሲሼ ዳር ኣሳፔ ኬዩዶሶና። ሺን ኢ ኤንታና ሃንቁስ። ኢ ኪሪሰቶሳ ገዴይሳ ኤንቲ ኤሪያ ገሾ ኢሲባካ ኦዴቶና ማላ ዲጊስ።

42 ቡር ዋንቲያ ዋዴ ዩሱሲ ኢሲ ጌማ ቤሲ ቢስ። ኣሳይ ኮዩሼ ኢ ዴዒያ ቤሳ ዩዶሶና። ኤንታፊ ኢ ሻኬቲዲ ቦና ማላ ቡቲቲዶሶና።

43 ሺን ኢ፣ «ታኒ ሃራ ካታማታ ባዳ ያሳ ካዋቲላ ዋንጌላ ማርካታናው ቤሴስ። ታ ኪቲቲዳይ ሄሳሳ» ያገሰ።

44 ዩሁዳ ቢታን ዴዒያ ኣይሁዴ ዋሳ ኬላን ሳባኪስ።

# 5

## ዩሱሲ ዶሪዳ ኮይር ታማሬታ (ማቶ 4:18-22፤ ማር 1:16-20)

1 ኢሲ ጋላስ ዩሱሲ ጌንሳሬዳ ኣባ ማታን ኤቁዳሺን ዳር ኣሳይ ኢያ ዩሹዋ ኤንዴሊዲ፣ ኢ ታማርሲያ ያሳ ቃላ ሲዶሶና።

2 ያን ሃላ ጋዳን ዴዒያ ናምቡ ዋንሎታ ቤዒስ። ሞሎ ኦይኪያ ኣሳቲ ዋንሎታፔ ዋዲላ ባንታ ገቲያ ሚጮሶና።

3 ሄ ዋንሎታፔ ሲሞናይሳን ጌሊዲ ቢታፊ ጉሊ ገዶ ሺሻና ማላ ኦይቸስ። ያቲዲ፣ ሄ ዋንሎታ ቦላ ኡቲዲ ኣሳ ታማርሲስ።

4 ባ ታማርሱዋ ኦንጊዳፔ ጉዬ ሲሞናኮ፣ «ጌዴ ጨሙዋኮ ሺሻዳ ሞሎታ ኦይካናው ሂንቲ ገቲያ ዩጌቲ» ያገሰ።

5 ሲሞን ዛሪዲ፣ «ኣስታማሪያው፣ ቃማ ኩሚላ ዳቡሪሼ ኣቁዲ ኣይኮካ ኦይኪሶኮ፣ ሺን ኔ ገኮ ገቲያ ዩጋና» ያገሰ።

6 ኤንቲ ገቲያ ዩጌዳ ዋዴ ገቲይ ዳኬታና ጋካናው ዳር ሞሎ ኦይኪዶሶና።

7 ሃራ ዋንሎታን ዴዒያ ባንታ ላጌቲ ዩዲ፣ ባንታና ማዳና ማላ ወቲዲ ያገዶሶና። ኤንቲ ዩዲ ናምቡ ዋንሎታ፣ ሃላን ሚቲታና ጋካናው ሞሎን ኩንሊዶሶና።

8 ሲሞን ጳዒርሲ ሄሳ ቤዒዳ ዋዴ ዩሱሳ ሲንላን ኩንዲዲ፣ «ሳዳው፣ ታኒ ናጋራንቾ ኣሲ ገዲያ ገሾ ታፔ ሻኬታ» ያገሰ።



9 ሃሳ ኢ ገዳይ ኢኔ ኢያራ ዴዔይሳቲ ኦይኪዳ ሞሉዋ ዳርቴላን ማላሌቲዳ ገሾሳ።

10 ቃሲ ሲሞና ላጌ ገዲዳ ዛብዲዮሳ ናይቲ ያይቆባራኔ ዮሃንሳራ ማላሌቲዳሶና። ዩሱሲ ሲሞና፡ «ባቦፋ! ሂዛፔ ኔኒ ኣሴ ኦይኪያ ኣሲ ገዳና» ያገሰ።

11 ኤንቲ ዋሳሎታ ጋፃ ሺሺዳፔ ጉዬ ኡባ ኣገዲ ዩሱሳ ካሊደሶና።

**ዩሱሲ ባር ሃርጋንቸዋ ፓሊስ**

(ማቶ 8:1-4፤ ማር 1:40-45)

12 ዩሱሲ ካታማታፔ ኢሱዋን ዴዒሺን ኢሲ ባር ሃርጌን \* ኦይኬቲዳ ኣሲ ሄ ካታማን ዴዔሰ። ሄ ኡራይ ዩሱሳ ቤዒዲ ኢያ ሲንላን ጉፋኒዲ፡ «ጎዳው፡ ኔ ሸኔ ገዲኮ ታና ጌሻናው ዳንዳዓሳ» ገዲ ዋሲሰ።

13 ዩሱሲ ባ ኩሺያ ዩዲ ቦቹዲ፡ «ኤ፡ ታ ሸኔ፤ ጌያ» ያገሰ። ኢራ ባር ሃርጌይ ኡራፔ ከቸሰ።

14 ዩሱሲ፡ «ሃይሳ ኦዴሰካ ኦደፓ፡ ሺን ባዳ ኔናቴላ ኣይሁዴ ካሂኒያ ቤሳ። ኔ ጌዩዳይሳሰ ማርካ ገዳና ማላ ሙሴይ ከቲዳ ያርሹዋ ያርሻ» ገዲ ከቲሰ።

15 ገደሺን፡ ኢያ ሱንላይ ካሴፔ ኣቋዲ ዳልገሼ ቢሰ። ዳር ኣሳይ ኢ ኦዲያባ ሲዓናዉኔ ባንታ ሃርጌያፌ ፓፃናው ዮሶና።

16 ሺን ዩሱሲ ዳር ዋዴ ጌማ ቤሲ ቢዲ ዋሴሰ።

**ዩሱሲ ጉንዳ ፓሊስ**

(ማቶ 9:1-8፤ ማር 2:1-12)

17 ኢሲ ጋላሰ ዩሱሲ ታማርሲሺን ጋሊላፔኔ ዩሁዳ ሄራ ኡባፌ ቃሲ ዩሩሳላሜፔካ ዩዳ ፋሪሳዌቲኔ ሂጌ ኣሰታማራቲ ያን ኡቲደሶና። ኣሳ ፓሊያ ጎዳ ዋልቃይካ ኢያራ ዴዔሰ።

18 ሄ ዋዴ ኣሳይ ኢሲ ጉንዳ ኣሲ ሃላራ ቶኪዲ ኤሂደሶና። ሶ ጌልሲዲ ኢያ ሲንላን ዋላናው ቆፒደሶና።

19 ሺን ኣሳ ዳርቴላፌ ዴንደይሳን ሶ ጌልሳናው ያኔቲዲ ኬላ ቦላ ከዩዲ፡ ካራ ቃዉዲዲ፡ ሃርጋንቸዋ ሃላራ ኣሳ ሻኪዲ ዩሱሳ ሲንላን ዩገደሶና።

20 ዩሱሲ ኤንታ ኣማኑዋ ቤዒዲ፡ «ላ ኣዲያው፡ ኔ ናጋራይ ቁሼቲሰ» ያገሰ።

\* 5:12 ባር ሃርጌ፡ ባር ሃርጌይ ኣሳ ጋልባ ቦላ ኬያ ሃርጌ። ኢሰራዔል ቢታን ባር ሃርጋንቸቲ ሃራ ኣሳፔ ዲማቲዲ ዴፖሶናፔ ኣቲን ኣሳራ ጋሃቶኮና። 5:14 ለዌ 14:1-32

21 ሂጌ አስታማሪቲኔ ፋሪሳዊቲ፣ «ሃይሲ ያሳ ቦላ ያጊዲ ኦዴቲይ ኦኔ? ኢሲ ያሳፌ ኣቲን ሃሪ ናጋራ ቁቻናው ዳንዳዔይ ኦኔ?» ያጊዲ ቆፒደሶና።

22 ዩሱሲ ኤንታ ቆፋ ኤሪዳ ጊሾ ኤንታኮ፣ «ሂንቲ ዎዛናን ሃሳሉ ኣይሰ ቆፔቲ?»

23 ኔ ናጋራይ ቁሼቲሰ ጌይሳፌኔ ዳንዳዳ ባ ጌይሳፌ ኣዉሲ ካዉዱ?)

24 ሺን ታ ሃሳ ጊዳይ ኣሳ ናዓይ ሳዓ ቦላ ናጋራ ቁቻናው ማቲ ዴዔይሳ ሂንቲ ኤሪና ማላሳ።» ሃሳፌ ካሊዲ፣ ጉንዳ ኡራኮ፣ «ዳንዳ፤ ኔ ኣልጋ ቶካዳ ኔ ሶ ባ» ያጊሰ።

25 ኢ ኤሌሲ ዳንዲዲ ኤንታ ሲንፋን ኤቂሰ፤ ኢ ቶኬቲዲ ዩዳ ኣልጋ ቶኪዲ ያሳ ጋላቲሼ ባ ሶ ቢሰ።

26 ሄ ዎዴ ኡባይካ ማላሌቲደሶና። ያሳ ጋላቲሼ፣ «ሃቺ ጊታ ማላታ ቤዒዳ» ያጊዲ ያሼቲደሶና።

**ዩሱሲ ለዌ ያጊሰ**  
(ማቶ 9:9-13፤ ማር 2:13-17)

27 ሃሳፌ ጉዬ፣ ዩሱሲ ያፔ ኬዩዲ ቢሰ። ለዌ ጌቲቲያ ኢሲ ቃራፃ ቃንዲሴይሲ ቃራፃ ቃንዲሴያ ቤሳን ኡቲዳይሳ ቤዒዳ፣ «ታና ካላ» ያጊሰ።

28 ኢ ኡባባ ኣጊ ዳንዲዲ ኢያ ካሊሰ።

29 ሄ ለዌይ ባ ሶን ጊታ ጊቢራ ጊጊሲሰ። ዳሮ ቃራፃ ቃንዲሴይሳቲኔ ሃራ ኣሳቲ ካሳ ማናው ኡቲደሶና።

30 ፋሪሳዊቲኔ ሂጌ አስታማሪቲ፣ «ቃራፃ ቃንዲይሳታራኔ ናጋራንቸታራ ኣይሰ ሜቲኔ ኡዬቲ?» ያጊዲ ዩሱሳ ታማሪታ ቦላ ዙዙሚደሶና።

31 ዩሱሲ ኤንታኮ፣ «ሃርጋንቸታሳፌ ኣቲን ፓፃታሰ ኣኪሜ ኮሼና።

32 ታኒ ናጋራንቸታ ማሮታኮ ዛራናሳፌ ኣቲን ጌሻታ ያጋናው ያቢኬ» ያጊዲ ዛሪሰ።

33 ኤንቲ ዩሱሳኮ፣ «ዮሃንሳ ታማሪቲ ዳሮ ዎዴ ያዎሶና፣ ዎሶሶና፤ ቃሲ ፋሪሳዊታ ታማሪቲካ ሃሳሉ ኦሶሶና። ሺን ኔይሳቲ ኡባ ዎዴ ዎሶናኔ ኡዮሶና» ያጊደሶና።

34 ዩሱሲ ኤንታኮ፣ «ሙሹራይ ኤንታራ ዳዒሺን ያጌቲዳ ኣሳይ ያማና ማላ ኦሳናው ዳንዳዔቲ?»

35 ሺን ሙሹራይ ኤንታፌ ሻኬታና ጋላሳይ ያና፣ ሄ ዎዴ ኤንቲ ያማና።»

36 ቃሲ ያገዱ ለሚሶ ኦዲስ፤ «ኦራላ ማዖፔ ፔዲዲ ጋልዓ ማዖ ቦላ ሲኬይ ኦኒካ ባዎ። ሃሳሶ ኦሊኮ ኦራላ ማዑዎ ፔዴስ። ኦራላይ ጋልዓስ ገኘና።

37 ማልዓንቶ ዎይኒያ ጋልዓ ኦጎሮን ቆሊያ ኦኒካ ባዎ። ሃሳ ኦሊኮ፣ ኦራላ ዎይኔይ ጋልዓ ኦጎሮዎ ቆሴስ፤ ዎይኔይ ጉኬስ ኦጎሮይካ ማደናባ ገደስ።

38 ሃሳ ገሾ፣ ኦራላ ዎይኔይ ኦራላ ኦጎሮን ቆሊታናው ቤሴስ።

39 ሂዛ፣ ጫላይ ሎዖ ገያ ገሾ ጫላ ዎይኔ ኡዩ ሲሚዲ ማልዓንቶ ኮዬይ ኦኒካ ባዎ» ያገሰ።

# 6

## ዩሱሲ ሳምባታባ ኦይሼቲስ (ማቶ 12:1-8፤ ማር 2:23-28)

1 ኢሲ ሳምባታ ጋላስ ዩሱሲ ገስቲ ጋዴ ገደራ ኦዴስ። ዩሱሳ ታማራቲ ቲያ ባንጋ ዱሊዲ ባንታ ኩሼን ሸርኪዲ ሞሶና።

2 ሺን ፋሪሳዌታ ገደፌ ኢሶቲ ኢሶቲ፣ «ሳምባታ ጋላስ ኦላናው ቤሶናባ ኦይስ ኦሌቲ?» ያገደሶና።

3 ዩሱሲ ኤንታኮ ዛሪዲ፣ «ዳዊቲይ ኮሻቲዳ ዎዴ ባራ ዴዔይሳታራ ኢሲፌ ኦላይሳ ናባቢቤኬቲ?»

4 ዖሳ ኬሊ ጌሊዲ ኦይሁዴ ካሂኔታ ዓላላስ ቤሲያ ዳቡዎ ሚስ፤ ባራ ዴዔይሳታስካ ኢሚስ» ያገሰ።

5 ቃሲ ዩሱሲ፣ «ኦሳ ናዓይ ሳምባታ ጎዳ» ያገሰ።

6 ሃራ ሳምባታ ጋላስ ዩሱሲ ኦይሁዴ ዎሳ ኬሊ ጌሊዲ ታማርሴስ። ሄ ቤሳን ኡሻቻ ኩሼይ ጉንዲዳ ኢሲ ኦሲ ዴዔስ።

7 ሂጌ ኦስታማራቲኔ ፋሪሳዌቲ ኢያ ሞታናው ጋሶ ኮዩዲ ሳምባታ ጋላስ ፓሊኮ ቤዓና ገዲ ናጎሶና።

8 ሺን ዩሱሲ ኤንታ ቆፋ ኤሪዲ ኩሼይ ጉንዲዳ ኡራኮ፣ «ዴንዳዳ ኦሳ ገዲዎን ኤቃ» ያገሰ። ኡራይካ ዴንዲ ኤቂስ።

9 ዩሱሲ፣ «ኦኔ ታ ሂንቴና ኢሲባ ኦይቻይስ፤ ሳምባታ ጋላስ ኦላናው ቤሴይ ሎዖባዬ ኢታባዬ? ሼምፖ ኦሾዬ ዎይኮ ቆይሶ?» ያገሰ።

10 ቃሲ ዩሱሲ ኢያ ዩሹዎን ዴዒያ ኦሳ ዩሺ ያሊዲ ኡራኮ፣ «ኔ ኩሼያ ፒዲ ኦላ» ያገሰ። ኡራይካ ኢ ገዲይሳዳ ኦሊን ኩሼይ ፓዲስ።

11 ሺን ሂጌ ኣስታማሬቲኔ ፋሪሳዊቲ ዳር ዪሎቲዶሶና። ዬሱሳ ቦላ ኣይ ኦሊኖ ጊዲ ባንታ ጊዶን ማቄቲዶሶና።

ዬሱሲ ታማኔ ናምዑ ሃዋሬታ ዶሪስ  
(ማቶ 10:1-4፤ ማር 3:13-19)

12 ሄ ዎዴ ጋላሳታፔ ኢሱዋን ዬሱሲ ዎሳናው ዴሪያ ቦላ ከዪሰ። ቃማ ኩሜላ ያሳ ዎሲሼ ኣቂሰ።

13 ዎንቴሌ ባ ታማሬታ ዪጊዲ ኤንታ ጊዶፌ ታማኔ ናምዓታ ዶሪዲ፣ ኤንታና፣ «ሃዋሬታ» ጊዲ ሱንሱስ።

14 ኤንቲካ፣ ዳዲሮሳ ጊዲ ሱንሱዳ ሲሞና፣ ኢያ ኢሻ ኢንዲሪያሳ፣ ያይቆባ፣ ዮሃኒሳ፣ ፊልጶሳ፣ ባርቶሎሚዮሳ፣

15 ማቶሳ፣ ቶማሳ፣ ኢልፊዮሳ ናዓ ያይቆባ፣ ባ ቢታስ ሚሹቲያ ሲሞና፣

16 ያይቆባ ናዓ ዪሁዳኔ ዬሱሳ ኣሉ ኢሚዳ ኣስቆርታ ዪሁዳ።

17 ዬሱሲ ኤንታራ ኢሲፌ ዴሪያፔ ዎዲዲ ዴንባ ቤሳን ኤቂሰ። ኢያ ታማሬታፔ ዳርቲ ሄ ቤሳን ዴዎሶና ዪሁዳ ቢታ ኡባፌ ዬሩሳላሚፔ፣ ዪሮሳፔኔ ሲዶና ኣባ ጋፃፔ ዪዳ ዳር ኣሳይ ዴዔስ።

18 ኤንቲ ዪዳይ ኢ ታማርሲያባ ሲዓናወኔ ባንታ ሃርጊያፌ ፓፃናሳ። ቱና ኣያናን ዎዬቲያ ኣሳቲካ ፓዲዶሶና።

19 ዎልቃይ ኢያፔ ከዪዲ ኣሳ ኡባ ፓሉያ ጊሾ ኣሳይ ኢያ ቦቻናው ኮዮሶና።

20 ባ ታማሬታኮ ዪሊዲ ሃይሳዳ ያጊሰ።

«ሂንቴኖ፣ ማንቆቶ፣ ሂንቴ ኣንጃቲዳይሳታ፤

ያሳ ካዎቴላይ ሂንቴሳ።

21 ሂንቴ ሃዒ ኮሻቴይሳቲ ኣንጃቲዳይሳታ።

ሂንቴ ካላና።

ሂንቴ ሃዒ ዬኬይሳቲ ኣንጃቲዳይሳታ

ሂንቴ ሚጫና።

22 ኣሳይ ሂንቴና ኣሳ ናዓ ጊሾ

ኢዲያ ዎዴ

ሂንቴና ሂሊያ ዎዴ

ሂንቴና ኤንቲ ቶቲያ ዎዴኔ፣

ኢታ ሱንሱ ኤንቲ ሂንቴው ኢሚያ ዎዴ

ሂንቴ ኣንጃቲዳይሳታ።

23 «ሄኮ፣ ሂንቴ ዎይቶይ ሳሎን ጊታ ጊዲያ ጊሾ ሄ ዎዴ ኡፋይሳን ጉፒቲ። ኣይስ ጊኮ፣ ቤኒ ኤንታ ኣዎቲ ናቤታ ቦላ ሄሳዳ ኦሊዶሶና።»

24 «ሺን ዱሬቶ ሂንቴና አይ፤  
ሂንቴ ሃዲ ሎዎ ዱሳ ኤኪዴታ።

25 ሃዲ ካሊዳይሳቶ ሂንቴና አይ፤  
ሂንቴ ኮሻታና።

ሃዲ ሚጩይሳቶ ሂንቴናሾ  
ሂንቴ ካዮታናኔ ዩካና።

26 አሲ ኡባይ ሂንቴ ሎዎቴላ ፃላላ ኦዲያ ዎዴ ሂንቴና አይ።  
ኤንታ አዋቲ ቤኒ ዎርዳንቾ ናቤታ ቦላ ሄሳዳ ኦሲደሶና።

**ሂንቴ ሞርኬታ ሲቂቴ**  
(ማቶ 5:38-48፤ 7:12)

27 «ሺን ታና ሲዲያ ሂንቴሰ ታ ኦዲይሰ፤ ሂንቴ ሞርኬታ ሲቂቴ፤  
ሂንቴና ኢፃይሳታሰ ሎዎባ ኦሲቴ።

28 ሂንቴና ቃንጌይሳታ አንጂቴ፤ ሂንቴና ናቂይሳታሰ ዎሲቴ።

29 ኢሲ ባጋ ሻካላ ባቂይሳሰ ሃንኮ ባጋካ ቤሳ። ኔ ላፃና ኤካና  
ጌይሳሰ ኔ ሻሚዚያካ ጉጃዳ ኢማ።

30 ኔና ዎሲያ ኡባሰ ኢማ፤ ኔፔ ኤኪዳ ኦናካ ዛር ጋዳ ኦይቾፋ።

31 አሳይ ሂንቴው ኦፋና ማላ ሂንቴ ኮያባ ኡባ ሂንቴካ አሳሰ  
ኦሲቴ።

32 «ሂንቴ ሂንቴና ደሲያ አሳታ ፃላላ ደሲኮ፤ አይ ጋላቲ  
ሂንቴው ዴዲ? ሃሪ አቶሺን፤ ናጋራንቾቲካ ባንታና ሲቂይሳታ  
ሲቆሶና።

33 ሂንቴው ሎዎባ ኦሴይሳታ ፃላላሰ ሎዎባ ኦሴኮ ሂንቴው  
አይ ጋላቲ ዴዲ? ናጋራንቾቲካ ሄሳዳ ኦሎሶና።

34 ታልዔ ዛራና አሳ ፃላላሰ ሂንቴ ታልዒኮ አይ ዲማ  
ጋላቲቴቲ? ናጋራንቾቲካ ጉዬ ዛራና አሲ ቤዲዲ ታልዎሶና።»

**ሃራታ ቦላ ፒርዶፊቴ**

35 «ሺን ሂንቴ ሞርኬታ ሲቂቴ፤ ኤንታው ሎዎባ ኦሲቴ። ጉዬ  
ኤካናው ቆፖና ታልዒቴ። ሄሳን ሂንቴ ኤካና ዎይቶይ ጌታ ጊዳና።  
ሂንቴ ኡባፌ ቦላ ያሳ ናይታ ጊዳና። ኢ ባና ጋላቶናይሳታሰኔ  
ኢታታሰ ኬሃ።

36 ሂንቴ አዎይ ኬሃ ጊደይሳዳ ሂንቴካ ኬሃ ጊዲቴ።

37 «አሳ ቦላ ፒርዶፊቴ፤ ሂንቴ ቦላ ፒርዶቴና። ሂንቴ ቦሬቶና  
ማላ ኦናካ ቦርፒቴ። አቶ ጊቴ፤ ያሳይ ሂንቴው አቶ ጋና።

38 ኢሚቴ፤ ሂንቴው ኢሜታና። ሂንቴ ማኪዳባን ሂንቴው ዛሬ ማኬታና፣ ኡባራካ ሎዎ ማኪያባን ባቁዲ፣ ሱዲ ኩንሊዲ፣ ላሌታና ጋካናው ሂንቴው ማኬቲ ኢሜታና» ያገሰ።

39 ቃሲካ ዩሱሲ ያገዱ ኤንታው ለሚሶ ኦዲስ፤ «ቆቄይ ቆቄ ካሌፋናው ዳንዳዒ? ካሌሊኮ ናምዓይካ ዋሊ ኤኪዲ አፎን ዉሎኮናዬ?»

40 ታማሬይ አስታማሬቴ አዴና። ሺን ሎይሊ ታማሪዳ ኡሪይ ባ አስታማሪያሉ ሃኔስ።

41 «ኔ አሻ አይፊያን ዳዒያ ቡሪያ አይስ ቤዓይ? ኔ አይፊያን ዳዒያ ቱሲ ዳኔይሳ አይስ ቤዒኪ?»

42 ኔ አይፊያን ዳዒያ ቱሲ ዳኔይሳ ቤያና ኔ አሻኮ፣ ታ አሻው ኔ አይፊያን ዳዒያ ቡሪያ ኬሶ ጋናው ዋና ዳንዳዒይ? ኔኖ ጩቡዋው፣ ኮይሮታዳ ኔ አይፊያን ዳዒያ ቱሲ ዳኔይሳ ኬሳ። ሄሳፌ ጉዬ፣ ኔ አሻ አይፊያን ዳዒያ ቡሪያ ኬሳናው ጌሻዳ ያለና።

**ሚላኔ ኢያ አይፊያ**

43 «ሎዎ ሚሊ ኢታ አይፌ አይፌና፤ ሄሳዳካ ኢታ ሚሊ ሎዎ አይፌ አይፌና።

44 አይፌ አይፊያ ሚሊ ኡባይ ባ አይፊያን ኤሬቴስ። አጉንሳፌ ባለሴ ሚላ አይፌይ ማፃቴና ቃሲ ላዴፔ ዋይኔ አይፌይ ማፃቴና።

45 ሎዎ አሲ ባ ዋዛናን ኩሚዳ ሎዎባፔ ሎዎባ ኬሴስ። ኢታ አሲ ባ ዋዛናን ኩሚዳ ኢታባፔ ኢታባ ኬሴስ። አሲ ባ ዋዛናን ኩሚዳ ፓላሂዳባፔ ባ ዶናን ሃሳዬስ።

**ኬሌ ኬዲያ ናምዑ አሳታ**

(ማቶ 7:24-27)

46 «ታ ጌይሳ ኦሌኬታ፣ ሺን ያቲን አይስ ታና፣ ሳዳው፣ ሳዳው፣ ጌቲ?»

47 ታኮ ዩይኔ ታ ቃላ ሲዒዲ ፖሊያ ኡባይ ኦና ዳኒያኮ ታ ሂንቴና ቤሳና።

48 ኢ ኬሌ ኬፃናው ዚቂ ኦሊ፣ ኦላ ቦኪዲ፣ ጋርሳን ዳዒያ ዛላ ቦላ ኬላ ኤሲዳ ጨንጫ ኡራ ዳኔስ። ዲያይ ዲዒዲ ሄ ኬላ ሱጊስ፣ ሺን ሚንሊዲ ኬፃዳ ጊሾ ቃፃናው ዳንዳዒቤና።

49 ሺን ታ ቃላ ሲዒዲ ኦላናይ ባ ኬላ ሻፌ ቢታ ቦላ ኬፃዳ ኡራ ዳኔስ። ዲያይ ዲዒዲ ሄ ኬላ ሱጊዳ ዋይ ኤሌሲዲ ኩንዲስ። ሄ ኬላይ ዋልቃማ ኩንዴሊ ኩንዲስ» ያገሰ።

# 7

ማቶ ሃላቃ አማኝቀ  
(ማቶ 8:5-13፤ ዮሃ 4:43-54)

1 ዩሱሲ ሄሳ ኡባ አሳ ሲንላን ታማርሲዲ ኦንጊዳፔ ጉዬ፥ ቁፊርናሆሜ ካታማ ቢስ።

2 ሄ ቤሳን ኢሲ ማቶ ሃላቃይ ዴዔስ። ኢ ዳር ደሲያ አይሌይ ሃርጌቲዲ ሃይቆስ ጋኪስ።

3 ኢ ዩሱሳባ ሲዒዳ ዎዴ ባ አይሊያ ፓላና ሜላ ኢያ ዎሶ ጊዲ ኢሲ ኢሲ አይሁዴ ጨማታ ዩሱሳኮ ከቲስ።

4 ከቴቲዳይሳቲ፥ ዩሱሳኮ ቢዲ፥ «ኔ ኢያው ሃይሳ ኦላናው ቤሴስ።

5 አይስ ጊኮ፥ ሃ ኡራይ ኑ አሳ ደሴስ፥ አይሁዴ ዎሳ ኬላካ ከፀሰ» ጊዲ ሚንሐ ዎሲደሶና

6 ዩሱሲካ ኤንታራ ቢስ።

ማቶ ሃላቃ ሶኮ ማቲያ ዎዴ ባ ላጌታ ኢያኮ ከቲዲ፥ «ጎዳው፥ ታ ካራፔ ጋርሳን ኔ ጌላናው ታ ቤሶና ጊሾ ዳቡርፓ።

7 ታካ ታና ኔ ሲንሐ ሸቃናው ቤሲያ አሲ ጋዳ ቆፒኬ። ሸን ኔ ኢሲ ቃላ ኦዳ፤ ታ አይሌይ ፓፃና።

8 ታው ታፔ ቦላራ ሃላቃይ ዴዔስ፥ ታፔ ጋርሳን ታ ከቲያ ዎታዳሬቲ ዴዎሶና። ኢሱዎ፥ «ባ» ጊኮ ቤስ፥ ሃንኩዎ፥ «ሃያ» ጊኮ ዩስ። ታ አይሊያኮ፥ «ሃኖ ኦላ» ጊኮ ኦሐስ» ያጊስ።

9 ዩሱሲ ሄሳ ሲዒዳ ዎዴ ማላሌቲስ። ጉዬ ሲሚዲ ባራ ያ አሳኮ፥ «ታኒ ሂንቴው ቱማ ኦዳይስ፤ ሃሪ አቶሺን ኢስራዔሌንካ ሃይሳ ሜላ ጊታ አማኖ ዴማቢኬ» ያጊስ።

10 ከቴቲዳይሳቲ ሶ ሲሚያ ዎዴ አይሌይ ፓፂን ዴሚደሶና።

## አምዔ ናዓ

11 ጉላ ዎዴፔ ጉዬ ዩሱሲ ናይኔ ካታማ ቢስ። ኢያ ታማሬታራኔ ሃራ ዳር አሳቲ ኢያራ ቢደሶና።

12 ኢ ካታማ ጌላና ሃኒያ ዎዴ አሃ ቶኪዳ ዳር አሳቲ ካታማፔ ከዮሶና። ሃይቁዳ ናዓይ ባ አይስ ኢሱዎ፥ ኢያካ አምዎ ጊዳዳ ዳዓዉሱ። ካታማ አሳፔ ዳርቲ ኢራ ዴዎሶና።

13 ጎዳይ ኢዮ ቤዒዳ ዎዴ ቃጴቲዲ፥ «ዩኮፋ» ያጊስ።

14 ሸቁዲ ሃላ ቦቺን ቶኪዳ አሳቲ ኤቁደሶና። ዩሱሲ፥ «ላ፥ ያላጋው ዴንዳ» ያጊስ።

15 ሃይቁዳይሲ ዴንዲ ኡቲዲ ኦዳ አይኪስ። ዩሱሲ ናዓ ኤኪዲ አይስ አሚስ።

16 አሳ ኡባይ ያሸቲዲ፥ «ጌታ ናቤይ ኑ ጌዶን ዳንዲስ፤ ያሳይ ባ አሳ ቤዒስ» ያጊዲ ያሳ ጋላቲዶሶና።

17 ኢያ ሱንሳይ ዪሁዳኒኔ ሄ ሄራን ዳዒያ ቢታ ኡባን ሲዔቲስ።

ዬሱሳኔ ፃማቂያ ዮሃንሳ

18 ፃማቂያ ዮሃንሳ ታማሬቲ ሄሳ ኡባ ዮሃንሳስ ኦዲዶሶና። ኢ ኤንታ ጊዶፌ ናምዓታ ፃጊዲ፥

19 «ያና ጌቲቲዳይ ኔኔዬ? ዎይኮ ሃራ ናጊኖ?» ያጊዲ ኦይቸቲ ጊዲ ጎዳኮ ከቲስ።

20 አሳቲ ዬሱሳኮ ቢዲ፥ ፃማቂያ ዮሃንሲ፥ «ያና ጌቲቲዳይ ኔኔዬ? ዎይኮ ሃራ ናጊኖ?» ጌቲ ጊዲ ኑና ኔኮ ከቲስ ያጊዶሶና።

21 ሄ ሳቲንካ ዬሱሲ ዳሮ አሳ ሃርጊያፌ ፓሊስ። ቱና ኣያናታ ኬሲስ፥ ቆቂዳ ኣይፊያካ ፃሊሲስ።

22 ዮሃንሳ ማታፔ ከቲቲዲ ዪዳይሳታኮ፥ «ቢዲ ሂንቲ ቤዒዳይሳኔ ሲዒዳይሳ ዮሃንሳስ ኦዲቴ። ኣይፌ ቆቂቲ ፃሎሶና፥ ጉንዳቲ ቢርሼቲዲ ሃሙቶሶና፥ ባሮ ሃርጋንቸቲ ጌዮሶና፥ ቱሊቲ ሲዖሶና፥ ሃይቂዳይሳቲ ሃይቆፔ ዳንዶሶና፥ ማንቆታስ ዎንጌላይ ሳባኬቲስ።

23 ታናን ቆቤቶና ኦኒካ ኣንጄቲዳይሳ።»

24 ዮሃንሲ ከቲዳይሳቲ ቢዳፔ ጉዬ ዬሱሲ ኣሳስ ዮሃንሳባ ያጊዲ ኦዲስ፥ «ሂንቲ ኣይ ቤዓናው ባዞ ቢታ ኬዪዳቲ? ጫርኮይ ቃሊያ ማታ ቤዓናሴዬ?»

25 ያቲን፥ ኣይ ቤዓናው ኬዪዳቲ? ኮይሴ ማዖ ማዒዳ ኣሳ ቤዓናሴዬ? ኮይሴ ማዖ ማዒዳይሳቲኔ ሳዒ ኢንጄቲዳ ኣሳይ ካዎ ኬላን ዳዖሶና።

26 ያቲን፥ ኣይ ቤዓናው ኬዪዳቲ? ናቢያ ቤዓናሴዬ? ኤ፥ ታ ያጋይሰ፥ ሂንቲ ቤዓናው ኬዪዳይ ናቤፔ ኣጼይሳ።

27 «ኔ ኦጊያ ኔ ሲንላን ጊጊሲያ ታ ከታንቸዎ ኔፔ ሲንጴ ታ ከታና»

ጌቲቲዲ ፃፊቲዳይ ኢያሳ።

28 ታ ሂንቲው ኦዲይስ፤ ማጫሳፔ ዬሊቲዳይሳታ ጊዶፌ ዮሃንሳፔ ኣጼይ ባዎ። ያሳ ካዎቴላን ኡባፌ ጉጃይሲ፥ ኢ ኡባፌ ጌታ ጊዳና» ያጊሰ።

29 ሃሪ ኣቶሺን፥ ዬሱሳ ቃላ ሲዒዳ ቃራፃ ቃንጂሴይሳቲ ኡባይ ዮሃንሳ ኩሺን ፃማቂቲዲ ያሳይ ጂሎ ጊዳይሳ ቆንጨሲዶሶና።

30 ሺን ፋሪሳዌቲኔ ሂጌ ኣስታማሬቲ ዮሃንሳ ኩሺን ፃማቂቶና ኢዲዲ ያሳ ዞሪያ ለቂሲዶሶና።



31 ዩሱሲ ካሊዲ ሃይሳዳ ያገለገለ፡ «ሂዛ፣ ሃ ዎዲያ ዩሌቴላ ኣይቢራ ዳኒሶ? ኤንቲካ ኦና ዳኖና?

32 ጊያ ጊደን ኡቲዲ ዎሊ ያገሊዲ፣ ሓ ሂንቲው ሱሱልዔ ቸኒን፣ ሂንቲ ዩክኮታ። ኑ ሳቢዲ ዜሌሊን፣ ሂንቲ ዩክኮታ» ያገሊያ ናይታ ዳኖሶና።

33 ፃማቂያ ዮሃንሲ ሞናኔ ኡዮና ዪን፣ ሓታ ኣያናራ ዴዔሰ ገዴታ።»

34 ኣሳ ናዓይ ሚሼኔ ኡዪሼ ዪን፣ ሓራሞባኔ ኡሻንቸ፣ ቃራፃ ቃንዲሴይሳታኔ ናጋራንቸታ ዳቦ» ገዴታ።

35 ሂዛ፣ ጨንጫቴላ ቱማቴላይ ኢያ ናይታ ኡባ ማታን ኤሬቲስ» ያገለገለ።

**ኢሲ ማጫሲያ ዩሱሳ ሺቶ ቲያሱ**

36 ኢሲ ፋሪሳዊይ ዩሱሳ ካሊ ሙዛናው ባ ሶ ያገሊስ። ኢ ፋሪሳዊያ ሶ ቢዲ ጋይታ ቦላ ኡቲስ።

37 ሄ ካታማን ኢሲ ናጋራንቸ ማጫሲ ዴዒያራ ዩሱሲ ፋሪሳዊያ ሶን ገቢራ ቦላ ዴዔይሳ ሰዒዳ ዎዴ ዳሮ ኣልዎ ጲልቃዪ ሺቶ ኤካዳ ያሱ።

38 ዩሱሳስ ጉዬ ባጋራ፣ ኢያ ቶሁዎ ማታን ኤቃዳ ዩካሼ ኢያ ቶሁዎ ባ ኣፋላራ ላከላውሱ። ባ ቢናናራ ኢያ ቶሁዎ ቁቻሼኔ ዩራሼ ሺቶ ቲያሱ።

39 ገቢራ ገቢሲዳ ፋሪሳዊይ ሄሳ ቤዒዳ ዎዴ ባ ዎዛናን፣ «ሃይሲ ናቤ ገዲያኮ ሃ ማጫሲያ ኢያ ቦቺያራ ኦኔኮ ቃሲ ኢያ ናጋራንቸ ገዴይሳካ ኢ ኡራናሺን» ያገለገለ።

40 ዩሱሲ፣ «ሲሞና፣ ታ ኔው ኦዲያባይ ዴዔሰ» ያገለገለ።

ኢ፣ «ኣስታማሪያው፣ ታው ኦዳ» ያገለገለ።

41 ዩሱሲ ኢያኮ፣ «ናሞው ኣሳቲ ኢሲ ኡራፔ ሚሼ ታልዒደሶና። ኢሶይ ኢቻሹ ያቱ ቢራ ሃንኮይ ቃሲ ኣሻታሙ ቢራ ታልዒደሶና።

42 ናሞዒይካ ታልዒያ ጨጋናው ያኔቲን፣ ናሞዒታስካ ታልዒያ ማሪስ። ሂዛ፣ ሃ ናሞዒታፔ ሄ ኡራ ዳሮ ደሳናይ ኔው ኣዉሳ ዳኒ» ያገለገለ።

43 ሲሞን፣ «ዳሮ ኣጮይ ማሪቲዳ ኡራይ ዳሮ ደሳና ዳኔስ» ያገለገለ። ዩሱሲ፣ «ኔ ቱማ ፒርዳዳሳ» ያገለገለ።

44 ሄሳፌ ጉዬ፣ ዩሱሲ ማጫሲኮ ሲሚ ያሊዲ፣ ሲሞናኮ፣ «ሃኖ ማጫሲው ቤዓይ? ታኒ ኔ ሶ ገሊን ሃሪ ኣቲን ኔ ታው ቶሆ

7:37 ማቶ 26:7፤ ማር 14:3፤ ዮሃ 12:3

ሃሌ አማባካ፣ ሺን ኢያ ታ ቶሁዋ ባ አፋላን ላኮላዳ ባ ቢናናን ቁቻሱ።

45 ኔኒ ታና ዬራ ኤካባካ፣ ሺን ኢያ ታ ኔ ሶ ጌሎዴፔ ደማዳ ታ ቶሁዋ ዬሮ አጋቡኩ።

46 ኔኒ ታ ሁዲያን ዛይቲ ቲያባካ፣ ሺን ኢያ ታ ቶሁዋ ሺቶ ቲያዉሱ።

47 ኢያ ታና ዳሮ ደሲዳ ጊሾ ኢ ዳሮ ናጋራይ አቶ ጌቲቲሰ። ኢያ ጉላ ናጋራይ አቶ ጌቲቲዳይ ጉላራ ዶሴሰ።»

48 ዬሱሲ ማጫሴኮ፣ «ኔ ናጋራይ አቶ ጌቲቲሰ» ያገሰ።

49 ኢያራ ኢሲፌ ጋይታን ኡቲዲ ሚያ ኢማላቲ፣ «ናጋራ አቶ ያገይ፣ ኢ ሃይሲ ኦኔ?» ያገዲ ባንታ ዋዛናን ቆፒዶሶና።

50 ዬሱሲ ማጫሴኮ፣ «ኔ አማኖይ ኔና አሺሰ፤ ሳሮ ባ» ያገሰ።

# 8

## ዬሱሳ ሞኪዳ ማጫሳታ

1 ሃሳፌ ጉዬ፣ ዬሱሲ ያሳ ካዎቱላ ዋንጌላ ሳባኪሼ ካታማራኔ ጉታራ አዲሰ። ሄ ዎዴ ታማኔ ናምዑ ሃዋሬቲ ኢያራ ዴዎሶና።

2 ቃሲ ቱና አያናፔኔ ዲማ ዲማ ሃርጊያፌ ፓዲዳ ኢሲ ኢሲ ማጫሳቲ ኢያራ ዴዎሶና። ኤንቲካ፣ ላፑን ቱና አያናቲ ከዩዳ ማግዳላ ማይራዎ።

3 ሄርዲሳ ሹማ ኩዛ ማቺው ዮሃና፣ ሶሲናራኔ ቃሲ ሃራ ዳሮቲ ኤንታና ሚሼን ማዴይሳቲ ዴዎሶና።

4 ዳሮ አሳይ ዲማ ዲማ ካታማፔ ኢያኮ ሺቂን ሌሚሶን ኤንታው ኦዲሰ።

5 «ኢሲ ጎሻንቸይ ዜሬላ ዜራናው ከዩሰ። ኢ ዜሪሺን ኢሲ ኢሲ ዜሬላይ ኦጌ ጋፃን ዎዲዲ ዬዴቲሰ፣ ሳሎ ካፎቲ ማዲዶሶና።

6 ሃራቲ ሻሎይ ጋርሳን ዴዲያ ቢታ ቦላ ዎዲዶሶና። ቡሮ ዶሊዳ ሚላ ቢታን ላሆይ ባይና ጊሾ ሚጨዶሶና።

7 ሃራ ዜሬላይ ቃሲ አጉንላ ጊዶን ዎዲሰ። አጉንላራ ዎላ ዲጨዳ ጊሾ አጉንላይ ጨሊዲ ቤሳን አሺሰ።

8 ሃራቲ ሎዎ ቢታ ቦላ ዎዲዶሶና። ዶሊዳ ዎዴ ዪቱ ኩሼ አይፊዶሶና።» ሄሳ ኦዲ ኦንጊዲ፣ ባ ቃላ ዶቁ ኦሊዲ፣ «ሲዲያ ሃይላ ዴዲያ ኡባይ ሲዎ» ያገሰ።

9 ኢያ ታማሬቲ፣ «ሃ ሌሚሱዋ ቢርሼላይ አይቤ?» ያገዲ ኦይቺዶሶና

8:2 ማቶ 27:55-56፤ ማር 15:40-41፤ ሉቃ 23:49

10 ኢ፡ «የሳ ካዎቲፋ ፀራ ኤራና ሜላ ሂንቲው ኢሜቲሰ፡፡ ሺን ሃራቲ ቤዒሼ ዴሞና ሜላ፡ ሲዒሼ ኣኬኮና ሜላ ለሚሶን ኦዳይሰ፡፡

11 «ሂዛ፡ ሃ ለሚሱዋ ቢርሼላይ ሃይሳ፡ ዜሬሌ ያጌቲዳይ ያሳ ቃላ፡፡

12 ኦጌ ጋፃን ዎዲዳ ዜሬላይ ቃላ ሲዒይሳታ፡፡ ጊዶሺን፡ ኤንቲ ኣማኒዲ ኣቶና ሜላ ፃላሂይ ቃላ ኤንታ ዎዛናፔ ማዲ ዲጌሰ፡፡

13 ሻሎይ ጋርሳን ዴዒያ ቢታ ቦላ ዎዲዳ ዜሬላይ ቃላ ሲዒዲ ኡፋይሳን ኤኬይሳታ፡፡ ኤንቲ ሃዒሰ ኣማናሶናፔ ኣቲን ፃፅይ ባይና ጊሾ ፓጩይ ጋኪያ ዎዴ ኤሌሲዲ ካዶሶና፡፡

14 ኣጉንፋ ጊዶን ዜሬቲዳይሳቲ ቃላ ሲዒይሳታ፡፡ ኤንቲካ ኣላሚያ ቆፋን፡ ዲሬቲላኒኔ ሳዓ ዲሳ ሚኮቲላን ጨሌቲዲ ቤሴይሳዳ ኣይፊቦኮና፡፡

15 ሎ? ቢታን ዎዲዳ ዜሬላይ ሎ? ዎዛናን ቃላ ሲዒዲ ናጌይሳታኔ ዳንዳዓን ሚኒዲ ኣይፌ ኣይፌይሳታ፡፡

16 «የምፔ የምፕዲ፡ ዳቾ ካሜይ ዎይኮ ኣርሳፌ ጋርሳን ዎሴይ ዴና፡፡ ጌሊያ ኣሲ ቤዓና ሜላ ዶቃ ቤሳን ዎሴሰ፡፡

17 «ሃሳ ጊሾ፡ ቆንጩ ኬዮና ቆሴቲዲ ኣቲያባይ፡ ኤሬቶና ጌሚዲ ኣቲያባይ ዴና፡፡

18 «ሂዛ፡ ሂንቲ ቃላ ዋቲ ሲዒያኮ ኣኬኪቲ፡፡ ዴዒያ ኡባሰ ጉዠቲዲ ኣሜታና፡ ባይናይሳሰ ሃሪ ኣቶሺን ኢያው ዴዒያ ጉሊያካ ኢያፔ ኤኬታና» ያጊሰ፡፡

**ዩሱሳ ኣዩራኔ ኢሻታራ**  
(ማቶ 12:46-50፤ ማር 3:31-35)

19 ዩሱሳ ኣዩራኔ ኢሻታራ ኢያኮ ዩዶሶና፡ ሺን ኣሳ ዳርቲላፌ ዴንደይሳን ኢያ ዴማናው ዳንዳዒቦኮና፡፡

20 ኢሲ ኣሲ ዩሱሳኮ፡ «ኔ ኣዩራኔ ኔ ኢሻታራ ኔና ኮዩዲ ካሬን ናጎሶና» ያጊሰ፡፡

21 ዩሱሲ ዛሪዲ፡ «የሳ ቃላ ሲዒዲ ኦሶን ፔሼይሳቲ ኡባይ ታው ኣዮኔ ታው ኢሻ» ያጊሰ፡፡

**ዩሱሲ ሃላ ዙሊያ ሴሪሰ**  
(ማቶ 8:23-27፤ ማር 4:35-41)

22 ኢሲ ጋላሰ ዩሱሳራኔ ኢያ ታማሬታራ ኢሲፌ ዎጎሎን ጌሊዲ፡ «ኣሳ ፒናሰ» ያጊሰ፡፡ ኤንቲካ ባናው ዴንዲዶሶና፡፡

---

**8:10** ኢሳ 6:9      **8:16** ማቶ 5:15፤ ሉቃ 11:33      **8:17** ማቶ 10:26፤ ሉቃ 12:2      **8:18** ማቶ 25:29፤ ሉቃ 19:26

23 አባ ቦላራ ኤንቲ ፒናናው ቢሺን ዩሱሲ ጰስኪስ። ቆፖና ሚና ጫርኮይ አባ ቦላ ዳንዲስ። ሃላይ ዋጎሎዋን ጌሊን ዋጎሎይ ሚቴቴሉ ኦይኪያ ዋዴ ኡባይ ባቢደሶና።

24 ኢያ ታማሪቲ ኢያኮ ሸቂዲ፡ «ኑ ጎዳው፣ ኑ ጎዳው፣ ኑ ጳዮስ ያጊዲ» ዩሱሳ ዳንሉደሶና።

ዩሱሲ ዳንዲዲ ጫርኮዋኔ ጎቲያ ሴሪስ። ኤሌሲዲ ጫርኮይኔ ጎቴይ ዋፑ ጊስ። ሳርቴላይካ ሲሚስ።

25 ዩሱሲ ባ ታማሪታኮ፡ «ሂንቲ አማናይ አወኔ» ያጊስ። ኤንቲካ፡ ያዩሼኔ ማላሌቲሼ ኢሶይ ኢሱዋኮ፡ «ጫርኮይኔ ሃላይ ከቴቴይሲ፡ ኢ ሃይሲ ኦኔ» ያጊደሶና።

ቱና አያናፔ ዩዴቲዳ ኡራ (ማቶ 8:28-34፤ ማር 5:1-20)

26 አባ ፒኒዲ ጋሊላ ባጋራ ዳዒያ ጌርጌሶኔ ቢታ ጋኪደሶና።

27 ዩሱሲ ዋጎሎዋፔ ከዪዲ ሳዒን ዋጰሺን ቱና አያናን ኦይኮቲዳ ኡራይ ካታማፔ ከዪዲ ኢያራ ጋሂቲስ። ዳር ላይሉ አፊሊ ማዖና ካሎ ዲፎን ደዴሲፔ አቲን ሶ ጌሊና።

28 ዩሱሳ ቤዒዳ ዋዴ ኢያ ሲንላን ጉፋኒዲ፡ ባ ቃላ ቆቁ ኦሉዲ፡ «ኡባፌ ቦላ ያሳ ናዓው ዩሱሳ ኔራ ታው አይቢ ኢሲፌቴሉ ዳዒ? ሃያና ታና ሃዒ ኡንዔሳፋርኪ» ያጊስ።

29 ሄሳ ኢ ጊዳይ፡ ቱና አያናይ ኡራፔ ከያና ማላ ዩሱሲ ሃንቁቲዳ ጊሾሳ። ዳር ዋዴ ቱና አያናይ ኢያ ሃሪዳ ጊሾ ሳንላላታኒኔ ቶሆ ቃቺያ ቢራታን ቃሼቲዲ ናጌቴስ። ሺን ቃሹዋ ዲሉዲ ቱና አያናን ሳጌቲዲ ባዘ ጌሊስ።

30 ዩሱሲ፡ «ኔ ሱንላይ ኦኔ» ያጊዲ ኦይቺስ።

ኢ፡ ዳር ቱና አያናቲ ኢያ ኦይኪዲ ጊሾ ባና፡ «ለጊዮና» ጊስ።

31 ቱና አያናቲ ባንታና ሲዖሌ ከቶና ማላ ዋሲደሶና።

32 ሄ ቤሳን ዘዜ ቦላ ሚያ ጉዲንሎ ዉዴይ ሃሙቴስ። ሂኒ ጉዲንሎታን ጌሊና ጊዲ ዋሲደሶና፡ ኢካ «ጌሊቱ» ጊስ።

33 ቱና አያናቲ ኡራፔ ከዪዲ ጉዲንሎታን ጌሊደሶና። ዉዴይ ዳሪያፔ ዲጌ ጉርጉዲዲ አባን ጌሊስ።

34 ሂንላንቸቲ ሃኒዳይሳ ቤዒዳ ዋዴ ዋዲ ቢዲ፡ ካታማኒኔ ጉታ ኡባን ኦዲደሶና።

35 አሳይ ሃኒዳባ ቤዓናው ከዪዲ ዩሱሳኮ ዪደሶና። ቱና አያናይ ከዪዲ ኡራይ ማዖ ማዒዲ፡ ኢያ ዋዛናይ ሲሚን፡ ዩሱሳ ቶሆ ማታን ኡቲዳይሳ ዳሚዲ ያዩደሶና።

36 ኢያ ቤዒዳ አሳይ ቱና አያናን ኦይኮቲዳ ኡራይ ዋኒዲ ፓዲዳኮ ኦዲደሶና።

37 ጌርጌሶኔ የሹዋን ዳዒያ አሳይ ጌታ ያሺ ያሸቲዲ ዬሱሲ ባንታ ማታፔ ባና ሜላ ዋሲደሶና። ኢ ዋጎሉዋን ጌሊዲ ጉዬ ሲሚሰ።

38 ቱና አያናይ ከዪዳ ኡራይ ዬሱሳራ ዳናው ዋሲሰ።

39 ሺን ዬሱሲ ኢያኮ፣ «ኔ ሶ ሲማ፣ ያሳይ አይ ሜላ ጌታባ ኔው ኦሊዳኮ ኦዳ» ያጌዲ ዋይዚሰ። ኡራይካ ዬሱሲ አይ ሜላ ጌታባ ኢያው ኦሊዳኮ ካታማ ኡባን ማርካቲሼ ቢሰ።

ሃይቂዳ ናዒዉኔ ዬሱሳ ማዑዋ ቦቹዳ ማጫሲው  
(ማቶ 9:18-26፤ ማር 5:21-43)

40 አሳይ ናጌዲ ጋምዒዳ ጊሾ ዬሱሲ ሲሚያ ዋዴ ዋኪ ኤኪደሶና።

41 አይሁዴ ዋሳ ከላ ሃላቃ ጌዲዳ ኢያርሳ ጌያ ኡራይ ባ ሶ ያና ሜላ ዬሱሳ ቶሁዋ ቦላ ዋዲዲ ዋሲሰ።

42 ኢያው ታማኔ ናምዑ ላይሊ ጌዲዳ ማጫ ናዒ ዳዒያራ ሳኬታዳ ሃይቆሰ ጋካዳ ዳዒዉሰ። ዬሱሲ ቢያ ዋዴ አሳይ ኢያ ኡንዔሊሰ።

43 ታማኔ ናምዑ ላይሊ ሱሊ ጎጊሼ ጋምዒዳ ማጫሲ ዳዒያራ ዳዒዉሰ። ኢያ ባው ዳዒያ ሚሺያ አከሚታሰ ኢማዳ ኦንጋሱ። ሺን ፓፃናው ዳንዳባቡኩ።

44 ኢያ ዬሱሳሰ ጉዬ ባጋራ ሺቃዳ፣ ኢያ አፊላ ማጫራ ቦቻሱ፣ ሶሁዋራ ጎጊያ ሱላይ ኤቂ ኣጊሰ።

45 ዬሱሲ፣ «ታና ቦቹዳይ ኦኔ?» ያጊሰ። ኡባይ «ኑ ቦቹቦኮ» ያጊን፣ ጳዒርሲ፣ «አሰታማሪያው፣ ዳር አሳይ ካሊሺኒኔ ኡንዔሊሺን ቤዓሼ ዋናዳ፣ (ታና ቦቹዳይ ኦኔ?) ጋይ» ያጊሰ።

46 ሺን ዬሱሲ፣ «ኢሲ አሲ ታና ቦቹሰ፤ ኣይሰ ጊኮ፣ ዋልቂ ታፔ ከዮይሲ ታው ኤሬቲሰ» ያጊሰ።

47 ማጫሲያ፣ አባይ ቆንጨዳይሳ ኤሪዳ ዋዴ ኮኮራሼ ያዳ ዬሱሳ ቶሁዋ ቦላ ኩንዳሱ። ኣይሰ ቦቹዳኮኔ ዋናዳ ኤሌሳዳ ፓዲዳኮ አሳ ኡባ ሲንሳን ማርካታሱ።

48 ኢ፣ «ታ ናቱ፣ ኔ አማኖይ ኔና ፓሊሰ፤ ሳርን ባ» ያጊሰ።

49 ዬሱሲ ኦዳ ኦንጎና ዳዒሺን፣ አይሁዴ ዋሳ ከላ ሃላቃ፣ ኢያርሳ ሶፔ ኢሲ አሲ ዪዲ፣ «ኢያርሳ፣ ኔ ናዒያ ሃይቃሱ፤ አሰታማሪያ ሜላ ዳኮሪሶፋ» ያጊሰ።

50 ሺን ዬሱሲ ሄሳ ሲዒዲ ኢያርሳኮ፣ «ባቦፋ! አማና፣ ኔ ናዒያ ፓፃና» ያጊሰ።

51 ዬሱሲ ኢያርሳ ሶ ጋኪዳ ዋዴ ጳዒርሳፔ፣ ዮሃኒሳፔ፣ ያይቆባፔ፣ ናዒ አዋፔኔ አዬፔ ኣቲን ሃሪ ጌላና ሜላ ኮዪቤና።

52 ሄ ቤሳን ዳዊስ አሳ ኡባይ ናዔስ ሚሹቲዲ ዩኪሺን፣ ዩሱሲ፣ «ዩኮፊቴ! ናዊስ ጳስካሱፕ ኣቲን ሃይቃቡኩ» ያገሰ።

53 አሳይ ናዊስ ሃይቂዳይሳ ኤሪያ ገሾ ኢያ ኦዳ ሌቂዲ ሚጨደሶና።

54 ሺን ዩሱሲ ናዔ ኩሺያ ኦይኪዲ፣ «ናቲ ዳንዳ» ያገሰ።

55 ናዔስ ሹምፖይ ሰሚን ዳንዳ ኤቃሱ። ዩሱሲ ኤንታኮ፣ «አዉ ሚያባ ኢሚቲ» ያገሰ።

56 ናዔ አዋራኔ አዩራ ማላሌቲደሶና። ሺን ዩሱሲ ሃይሳ፣ «ኦዳሰካ ኦደፕቴ» ያገሰ።

### 9

ዩሱሲ ታማኔ ናምዑ ሃዋሬታ ከቲስ

(ማቶ 10:5-15፤ ማር 6:7-13)

1 ዩሱሲ ታማኔ ናምዑ ሃዋሬታ ባኮ ጃጊዲ፣ ቱና ኣያናታ ኬሳና ሚላኔ ሃርጌ ኡባ ፓፋና ሚላ ዋልቃኔ ማታ ኢሚስ።

2 ያሳ ካዋቲላባ ማርካታናዳኔ ሃርጋንቾታ ፓፋናዳ ከቲስ።

3 ኢ ኤንታኮ፣ «ፃምባ ጊዲን ኦሳሮ ጊዲን ካሊ ጊዲን ሚሹ ጊዲን ላሚ ማዊስ ኣፊላ ጊዲን ኦጌስ ጊዲ ኣይኮካ ኦይኮፊቴ።

4 ሄ ካታማፔ ሂንቲ ኬያና ጋካናው ኢማላቴላን ሂንቲ ጌሊዳሱዋን ጋምዒቲ።

5 ኦኒካ ሂንቲና ሞኮና ኢጃኮ ሄ ካታማፔ ኬዩሹ ኤንታው ማርካ ጊዳና ሚላ ሂንቲ ቶሁዋን ዳዊስ ባና ፒቲዲ ኬዩቲ።»

6 ኤንቲካ ከቲቲዳይሳዳ ኬዩዲ ዋንጌላ ኦዲሹኔ ዲማ ዲማ ጉታታን ሃርጋንቾታ ፓሊሹ ኣጲደሶና።

7 ጋሊላ ቢታ ሃሪያ ሄሮዲሲ ዩሱሲ ኦሊዳባ ኡባ ሰዒዳ ዋዴ ዳጋሚስ። ኣይስ ገኮ፣ ኢሲ ኢሲ ኣሳቲ ዮሃኒሲ ሃይቆፔ ዳንደና ኣጌና ያጎሶና።

8 ባጋቲ፣ «ኤሊያሲ ቆንጨስ» ጎሶና፤ ሃራቲ ቃሲ፣ «ቤኒ ናቤታፔ ኢሶይ ሃይቆፔ ዳንዲስ» ያገዲ ኦዳቶሶና።

9 ሺን ሄሮዲሲ፣ «ዮሃኒሳ ቆጲያ ታ ቃንጃሳዳ ዋቆስ። ያቲን፣ ሃይሳዳ ያጌቲዲ ኢያባ ኦዳቴይ፣ ኢ ኦኔ?» ያገዲ ባ ኣይፊን ቤዓናው ኮዩስ።

ዩሱሲ ኢቻሹ ሙኩሉ ኣሳ ሙዚስ

(ማቶ 14:13-21፤ ማር 6:30-44፤ ዮሃ 6:1-14)

10 ታማኔ ናምዑ ሃዋሬቲ ጉዬ ሰሚ ዪዲ፣ ኤንቲ ኦሊዲባ ኡባ ዩሱሳስ ኦዲደሶና። ኢ ኤንታና ኤኪዲ ቤቴሳይዳ ካታማፔ ጋፃ ኤፊሰ።

11 ሺን ዳሮ አሳይ ዩሱሳ ገዴይሳ ኤሪዲ ኢያ ካሊደሶና። ኢ ኤንታ ሞኪ ኤኪዲ ፆሳ ካዎቴላባ ታማርሲስ፤ ፓፃናው ኮዬይሳታካ ፓሊስ።

12 ሳዒ ኦማርሲያ ዎዴ ታማኔ ናምዑ ሃዋሬቲ ኢያኮ ሸቁዲ፣ «ኑ ዴዔይ ባዞ ቢታ ገዲያ ገሾ አሳይ ዲማ ዲማ ጉታታኔ ካታማታ ቢዲ፣ ካሊኔ አቁያሶ ኮያና ሚላ አሳ ሞይዛ» ያገደሶና።

13 ሺን ኢ፣ «ኤንታው ሚያባ ሂንቴ ኢሚቴ» ያገሰ።

ኤንቲ፣ «ኑስ ዴዔይ ኢቻሹ ኡይሊኔ ናምዑ ሞሎ ገዲያ ገሾ ሃ አሳስ ገዲያ ካሊ ኑኒ ቢዲ ሻሞና ኢዳኮ ገዴና» ያገደሶና።

14 ሄ ቤሳን ኢቻሹ ሙኩሉ ገዲያ አዳቲ ዳፆሶና።

ዩሱሲ ባ ታማሬታኮ፣ «ኢሻታማን ኢሻታማን ሻኪ ሻኪ አሳ ኡቲሲቴ» ያገሰ።

15 ኢያ ታማሬቲ፣ ኢ ከቲዳይሳዳ አሳ ኡቲሲደሶና።

16 ኢ ኢቻሹ ኡይላኔ ናምዑ ሞሎታ ኤኪዲ፣ ሳሎ ያሊዲ፣ ፆሳ ጋላቲዲ፣ ማንሊዲ አሳ ኡባ ጋሳና ሚላ ባ ታማሬታስ ኢሚስ።

17 ኡባይ ሚዲ ካሊደሶና። ኤንታፊ አቲዳ ቲፊይ ታማኔ ናምዑ ጋይታ ኩሚሊ ገዲሰ።

ጳጳርሲ፣ ዩሱሲ ኦኔኮ ማርካቲስ  
(ማቶ 16:13-19፤ ማር 8:27-29)

18 ዩሱሲ ባ ፃላላ ዎሲሺን፣ ኢያ ታማሬቲ ኢያኮ ዪደሶና። ኢ፣ «አሳይ ታና ኦና ጎና?» ገዲ ኦይቸሰ።

19 ኤንቲ ዛሪዲ «ኢሶቲ ኢሶቲ፣ ሳማቂያ ዮሃኒሳ፣ ባጋቲ ኤሊያሳ፣ ሃራቲ ቃሲ፣ ቤኒ ናቤታፔ ኢሶይ ሃይቆፔ ዴንዲስ» ያገደሶና።

20 ኢ ዛሪዲ፣ «ያቲን ሂንቴ ታና ኦና ጌቲ» ያገሰ። ጳጳርሲ፣ «ኔኒ ፆሳፊ ከቴቲዳ ከሪሰቶሳ» ያገዲ ዛሪስ።

21 ዩሱሲ ሃይሳ ኦዴሰካ ኦደፒቴ ገዲ ሚንሊዲ ኦዲስ።

22 ቃሲካ ዩሱሲ፣ «አሳ ናዓይ ዳሮ ማቲዎ ኤካና። ቢታ ጪማታን፣ ካሂኔ ሃላቃታን፣ ሂጌ ኣስታማሬታን ኣጂ ኢማታና። ኤንቲ ኢያ ዎቆና፣ ሺን ኢ ሄቫንሶ ጋላስ ሃይቆፔ ዴንዳና» ያገሰ።

23 ዩሱሲ አሳ ኡባኮ፣ «ታና ካላናው ኮዬይ ኦኒካ ዴኒኮ ባና ካዶ፣ ባ ማስቃሊያ ጋላስ ጋላስ ቶኪዲ ታና ካሎ።

9:19 ማቶ 14:1፣ 2፤ ማር 6:14-15፤ ሉቃ 9:7-8      9:20 ዮሃ 16:20-28፤ ማር 8:30-9:1      9:23 ማቶ 10:38፤ ሉቃ 14:27

24 ባ ሸምጥው አሻናው ኮያ ኡባይ ኢዮ ዳይሴስ፣ ባ ሸምጥው ታ ጊሾ ጊዲ ዳይሴያ ኦኒካ ኢዮ አሼስ።

25 አሲ አላሜ ኡባ ሃሪዲ፣ ጊደሺን ባ ሸምጥው ዳይሴያባ ዋይኮ ቆሃያባ ጊዲኮ ኢያ አይ ማዲ?

26 ኦኒካ ታናኒኔ ታ ቃላን ዩላቲኮ አሳ ናዓይ ባ ቦንቹዋራ ሄሳዳካ አዋ ቦንቹዋራኔ ጌሻ ኪታንቸታ ቦንቹዋራ ያ ዋዴ ኢያን ዩላታና።

27 ታ ሂንቲው ቱማ ኦዳይስ፤ ሃይሳን ኤቁዳይሳታ ጊደፌ ያሳ ካዋቲላ ቤያናሺን ሃይቆና አሳቲ ዴያሶና» ያጊስ።

**ዩሱሳ ማላይ ላሜቲስ**  
(ማቶ 17:1-8፤ ማር 9:2-8)

28 ዩሱሲ ሄ ኦዳ ኦዲን፣ ሆስፑን ጋላሳፔ ጉዬ ጳዊርሳ፣ ያይቆባኔ ዮሃኒሳ ባራ ኤኪዲ ዋሳናው ዴሪያ ቦላ ኬዬስ።

29 ኢ ዋሳ ቦላ ዴዲሺን ኢያ አይፌ ካሬይ ላሜቲስ፤ አፊላይካ አዋ ማላ ጸሊዲ ቦዲስ።

30 ናምቡ አሳቲ፣ ኤንቲካ ሙሴራኔ ኤሊያሳራ ቦንቸን ቆንጩዲ፣

31 ዩሩሳላሜን ፖሌታናው ዴዲያባ፣ ሄሲካ፣ ኢ ሃ አላሜያፔ ሻኬታናባ ኢያራ ኦዴቶሶና።

32 ጳዊርሳኔ ኢያራ ዴዲያሳታ ዲስኮይ ኤፊን፣ ኤንቲ ዲስኮፊ ባርኪያ ዋዴ ኢያ ቦንቹዋኔ ኢያራ ኤቁዳ ናምቡ አሳታ ቤዲዶሶና።

33 አሳቲ ዩሱሳፔ ሻኬቲዲ ባና ሃኒሺን፣ ጳዊርሲ ዩሱሳኮ፣ «ሳዳው፣ ሃይሳን ጊዴይሲ ኑስ አይ ማላ ሎ? ኢሲኖ ኔው፣ ኢሲኖ ሙሴስ፣ ኢሲኖ ኤሊያሳስ ኦላዲ ሄቩ ሻቃራ ሻቃርስ» ያጊስ። ሺን ኢ አይ ጊዳኮ ኤሬና።

34 ኢ ያጊዲ ኦዴቲሺን ሻራይ ዬዲ ኤንታና ካሚስ። ኤንቲ ሄ ሻራ ጊደ ጌሊሼ ባቢዶሶና።

35 ሻራ ጊደፊ፣ «ታ ዶሪዳ ናዓይ ሃይሳ ኢያ ሲዒቲ» ያጊያ ቃላይ ሲዒቲስ።

36 ሄ ቃላይ ሲዒቲዳፔ ጉዬ ዩሱሲ ባርካ ዴዲሼ ቤንቲስ። ሄ ዋዴ ኤንቲ ቤዲዳባ ኦዴስካ ኦዶና፣ ባንታ ዋዳናን ኦይኪዲ ሲዒ ጊዶሶና።

---

9:24 ማቶ 10:39፤ ሉቃ 17:33፤ ዮሃ 12:25      9:28 2ሴፂ 1:17-18      9:35  
ኢሳ 42:1፤ ማቶ 3:17፤ 12:18፤ ማር 1:11፤ ሉቃ 3:22



ዩሱሲ ቱና ኣያና ኢሲ ናዓፔ ኬሲስ  
(ማቶ 17:14-18፤ ማር 9:14-27)

37 ዋንቴሌ ኤንቴ ዳሪያፔ ዋጂያ ዋዴ ዳሮ ኣሳይ ዩዲ ኢያራ ጋሂቲደሶና።

38 ሄ ዋዴ ኣሳ ጊደፌ ኢሲ ኣሲ፥ «ኣስታማሪያው፥ ታ ኢሲ ናዓ ያዳ ቤዓርኪ።

39 ቱና ኣያናይ ቆፖና ኦይኪዲ ዋሲሴስ፤ ጎፖንቶ ዩጊሲዲ ተኮሪሴስ፥ ኣሳቴላ ቆሂዲ ኡንዴሲዲ ዩዴስ።

40 ኔ ታማሪቲ ኬሳና ማላ ዋሳስ፥ ሺን ኤንቴ ዳንዳሲቦኮና» ያጊዲ ዋሲስ።

41 ዩሱሲ፥ «ኣማኖይ ባይና ጌላ ዩሌቴላቶ፥ ኣዉዴ ጋካናው ታ ሂንቴራ ዳኔ፥ ሂንቴና ዳንዳዓኔ? ኔ ናዓ ባዳ ሃ ኤካያ» ያጊስ።

42 ናዓ ኤኪዲ ያ ዋዴ ቱና ኣያናይ ሳዓን ሆሊ ዩጊዲ ኮኮርሲስ። ሺን ዩሱሲ ቱና ኣያና ሃንቂዲ ናዓፔ ኬሲስ። ናዓካ ናዓ ኣዋሰ ኢሚስ።

43 ኣሳይ ኡባይ ያሳ ጊታ ዋልቃን ማላሌቲደሶና። ኤንቴ ኢ ኦሊዳባን ማላሌቲሺን፥ ዩሱሲ ባ ታማሪታኮ።

44 «ሃይሳ ታ ሂንቴው ኦዴይሳ ሎይላ ሲዒቲ፤ ኣሳ ናዓይ ዋርኪታ ኩሺን ኣጂ ኢሚታና» ያጊስ።

45 ሺን ኢ ጊዳባይ ኤንታፌ ጌሚዳ ጊሾ ኣኬኪቦኮና። ሄሳ ጊሾ፥ ዛሪዲ ኦይቻናው ባቢደሶና።

ኡባፌ ጊታ ጊዳናይ ኦኔ?  
(ማቶ 18:1-5፤ ማር 9:33-37)

46 ዩሱሳ ታማሪቲ፥ «ኮ ጊደን ጊታ ጊዳናይ ኦኔ?» ጊዲ ፓላማ ኦይኪደሶና።

47 ዩሱሲ ኤንታ ዋዛና ቆፋ ኤሪዲ ዮጋ ናዓ ባ ማታን ኤሲዲ፥

48 «ሃ ዮጋ ናዓ ታ ሱንላን ሞኪያ ኦኒካ ታና ሞኬስ፥ ታና ሞኬይ ታና ኪቲዳይሳ ሞኬስ፥ ሂንቴ ኡባፌ ጉዴይሲ፥ ኢ ጊታ ጊዳና» ያጊስ።

49 ዮሃኒሲ፥ «ጎዳው፥ ኢሲ ኣሲ ኔ ሱንላን ቱና ኣያናታ ኬሲሺን ቤዒዲ ኢ ኩራ ጊደና ጊሾ ዲጊዳ» ያጊስ።

50 ዩሱሲ ዛሪዲ፥ «ሂንቴራ ኤቁቶናይሲ፥ ኢ ሂንቴ ባጋ። ሄሳ ጊሾ፥ ኢያ ዲንፊቴ» ያጊስ።

ሳማሬ ኣሳይ ዩሱሳ ኢዲደሶና

51 ዩሱሲ ሳሎ ቢያ ዋዴይ ማታቲዳ ጊሾ ዩሩሳሌሜ ባናው ቃንዲዲ ዳንዲሰ።

52 ሳማራ ቢታን ዳዲያ ኢሲ ጉታ ቢዲ፥ ኡባባ ኢያው ጊጊሳና ሜላ ኣሴ ያ ኪቲሰ።

53 ሺን ኢ ቤይ ዩሩሳሌሜ ጊዲያ ጊሾ ኤንቲ ኢያ ሞኪ ኤኪቦኮና።

54 ዩሱሳ ታማራቲ ያይቆባራኔ ዮሃንሳራ ሄሳ ቤዲዲ፥ «ጎዳው፥ ሳሎፕ ታሚ ዋዲዲ ኤንታ ሞ ጋና ሜላ ኔ ኮያይ» ያጊደሶና።

55 ሺን ዩሱሲ ጉዩ ሲሚ ኤንታ ሃንቁቲዲ፥ «ሂንቲ ጋርሳን ኣይቤ ኣያኒ ዳዲያኮ ሂንቲ ኤሬኬታ። ኣሳ ናዓይ ኣሴ ኣሻናው ዩሲፕ ኣቲን ሳይሳናሳ ጊዳና» ያጊሰ።

56 ያፕ ዳንዲዲ ሃራ ጉታ ቢደሶና።

**ዩሱሳ ካሎይ ጨገሲያ ጋቲያ**  
(ማቶ 8:19-22)

57 ኤንቲ ኦጊያራ ቢሺን፥ ኢሲ ኣሲ፥ «ኔ ቢያሶ ኡባ ታ ካላና» ያጊሰ።

58 ዩሱሲ ዛራዲ፥ «ዋርካናታሰ ኦሊ፥ ሳሎ ካፎታሰ ኬሊ ዳዴሰ፥ ሺን ኣሳ ናዓይ ባ ሁዲያ ሹምፒሲያሶይ ባዋ» ያጊሰ።

59 ሃንኩዋኮ፥ «ኔኒ ታና ካላ» ያጊሰ። ሺን ኡራይ፥ «ጎዳው፥ ኮይርታዳ ታ ኣዋ ሞጋዳ ያና» ያጊሰ።

60 ሺን ዩሱሲ፥ «ሃይቁዳይሳቲ ሃይቁዳይሳታ ሞጋና ሜላ ኤንታው ኣጋጋ፤ ኔኒ ባዳ ያሳ ካዋቴላ ሳባካ» ያጊሰ።

61 ቃሲ ሃራ ኣሲ፥ «ጎዳው፥ ታ ኔና ካላና፥ ሺን ኮይርታዳ ታ ሶ ኣሳ ሳሮላዳ ያና» ያጊሰ።

62 ዩሱሲ ዛራዲ፥ «ኮዳ ኦይኪዲ ጉዩ ያሊያ ኦኒካ ያሳ ካዋቴላሰ ቤሴና» ያጊሰ።

# 10

**ዩሱሲ ላፑን ታማኔ ናምዑ ታማራታ ኪቲሰ**

1 ሃሳፌ ጉዩ፥ ጎዳይ ሃራ ላፑን ታማኔ ናምዑ \* ኣሳታ ደሪሰ። ኢ ባናው ቆፒዳ ካታማኔ ጉታ ኡባ ሲንላቲዲ ባናዳ ናምዓ ናምዓ ኦሊዲ ኪቲሰ።

---

9:54 2ካዋ 1:9-16    9:61 1ካዋ 19:20    \* 10:1 ላፑን ታማኔ ናምዑ፡ ኢሲ ኢሲ ማፃፋቲ ላፑን ታማ ጎሶና፤ ቃሲ ፓይዶ 17 ያላ።

- 2 ዩሱሲ ኤንታኮ፡ «ሄኮ ሺቃና ካላይ ዳር ሺን ኦሳንቸቲ ጉላ። ያሲያ ገሾ፡ ካላ ጎዳይ ኦሳንቸታ ከታና ማላ ዋሲቴ።
- 3 ሂዛ፡ ቢቴ፡ ደርሳታዳ ሱዳሜታ ገዶ ሂንቴና ታኒ ዬዳና።
- 4 ሂንቴ ቢያ ኦጊያስ ኣይኮካ ኦይኮፊቴ፡ ሚሼ ገዲን ካላ ገዲን ጫማ ኦይኮፊቴ። ኦጊ ቦላ ኦናካ ሳርላፊቴ።
- 5 ሂንቴ ጌሊያ ከላ ኡባ ኮይርቲዲ፡ ሳርይ ሃ ከላስ ገዶ ያገቴ።
- 6 ሳር ዶሲያ ኣሲ ሄ ቤሳን ዴዒኮ፡ ሂንቴ ሳርይ ያን ሸምፓና፤ ኢዳስ ገኮ ሂንቴ ሳርይ ሂንቴው ሲማና።
- 7 ኦሳንቸስ ዳሞዜ ቤሲያ ገሾ ሂንቴ ጌሊዳ ከላን ሂንቴው ሸሸዳባ ኡባ ሚሼኔ ኡዩሼ ያን ጋምዒቴ። ኢሱዋ ሶፔ ኢሱዋ ሶ ዩዮፒቴ።
- 8 ኣይ ካታማካ ሂንቴ ጌሊያ ዋዴ ኣሳይ ሂንቴና ሞኪዲ፡ ሂንቴው ሸሸዳባ ኡባ ሚቴ።
- 9 ሄ ካታማን ዴዒያ ሃርጋንቸታ ፓላሼ፡ ሳሳ ካዋቴላይ ሂንቴኮ ማቲስ) ያገዲ ኦዲቴ።
- 10 ሺን ኢሲ ካታማ ጌሊያ ዋዴ ኣሳይ ሂንቴና ሞኮና ኢዳኮ ዳባባ ከዩዲ ሃይሳዳ ገቴ።
- 11 ሱ ቶሁዋ ቦላ ዴዒያ ሂንቴ ካታማ ባና ፒቶስ፡ ሺን ያሳ ካዋቴላይ ሂንቴኮ ማታቲደይሳ ኤሪቴ።»
- 12 ፒርዳ ጋላሳን ሃ ካታማፔ ሶዶሜ ካታማስ ፒርዳይ ካዉሼ ገዳናይሳ ታ ሂንቴው ኦዳይስ» ያገሰ።

**ኣማኖና ገሾ ቦሬቲዳ ካታማታ**  
 (ማቶ 11:20-24)

- 13 ካሊዲካ፡ ዩሱሲ፡ «ኔኖ ኮራዚኔ፡ ኔኖ ቤቴሳይዳ፡ ኣዬ፡ ሂንቴናን ኦሴቲዳ ማላታቲ ዲርሳኒኔ ሲዶናን ኦሴቲዳኮ ያን ዴዒያ ኣሳይ ካሌ ማዒዲ፡ ቢዲንሳ ቦላ ኡቲዲ ቤኒ ማርታን ጌሊ ኣጋናሺን።
- 14 ሄሳ ገሾ፡ ሂንቴፌ ኣሊዲ ዲርሳሲኔ ሲዶናስ ያሳ ፒርዳይ ካዉያና።

---

10:2 ማቶ 9:37-38    10:3 ማቶ 10:16    10:4 ማቶ 10:7-14፤ ማር 6:8-11፤ ሉቃ 9:3-5    10:7 1ቆሮ 9:14፤ 1ፂሞ 5:8    10:10 ሃ.ኦ 13:51  
 10:11 ማቶ 10:7-14፤ ማር 6:8-11፤ ሉቃ 9:3-5    10:12 ሜዴ 19:24-28፤ ማቶ 10:15፤ 11:24    10:13 ኢሳ 23:1-18፤ ሂዝ 26:1-21፤ ኢዩ 3:4-8፤ ኣሞ 1:9-10፤ ዛካ 9:2-4

15 ኔካ ቁፊርናሆሜ፥ ሳሎ ጋካናው ኔና ቶቁ ኦላናው ኮያይ? ኔ ዲጌ ሲገለ ሆሉታና» ያገለገለ።

16 ቃሲካ ዩሱሲ ባ ታማሬታኮ፥ «ሂንቴና ሲዔይ ታና ሲዔሰ፥ ሂንቴና ኤኮናይ ታና ኤኬና፥ ታና ኤኮናይ ታና ኪቲዳይሳ ኤኬና» ያገለገለ።

**ላፑን ታማኔ ናሞዓቲ ሲሚደሶና**

17 ላፑን ታማኔ ናሞዑ ታማሬቲ ኪቴቲዳ ቤሳፌ ከሂ ኡፋይቲሼ ሲሚደሶና። ዩሱሳኮ ሸቂዲ፥ «ጎዳው፥ ኔ ሱንላን ቱና ኣያናቲካ ኑሰ ኪቴቲደሶና» ያገለገለ።

18 ዩሱሲ ኤንታኮ፥ «ፃላሄይ ሳሎፔ ዋልዓንላዳ ዋዲሺን ታ ቤዓሰ።

19 ሂኮ፥ ሸሻኔ ኮርኔ ዩቆና ሜላኔ ሞርኪያ ዋልቃ ዛራና ሜላ ማታ ሂንቴው ኢማሰ። ሂንቴና ቆሃናባይ ኣይኮይካ ዴና።

20 ጊደሺን፥ ሂንቴ ሱንላይ ሳሎ ማዘጋባን ፃፊቲዳ ጊሾ ኡፋይቲቴፔ ኣቲን ቱና ኣያናቲ ኪቴቲዳ ጊሾ ኡፋይቶፊቴ» ያገለገለ።

**ዩሱሲ ባ ኡፋይሳ ቆንጨሲሰ (ማቶ 11:25-27፤ 13:16-17)**

21 ሄ ዋዴ ዩሱሲ ጌሻ ኣያናን ኡፋይቲዲ፥ «ሳሎዋ ሳዓ ጎዳው፥ ሃይሳ ጨንጫታፔ ኤራንቾታፔ ጌንላዳ ያላጋታሰ ቆንጨሲዳ ጊሾ ጋላቲታ። ኤ ታ ኣዋው፥ ሄሳ ኔ ኦላናው ሎጾ ሼኔ ጊዲሰ።

22 «ኡባባይ ታ ኣዋፔ ታው ኢሜቲሰ። ናባይ ኦኔኮ ኣዋፔ ኣቲን ሃሪ ዋይኮ ናባይ ቆንጨሳናው ኮዩይሳፌ ሃሪ ኦኒካ ኣዋ ኤሬይ ባዋ» ያገለገለ።

23 ካሊዲካ፥ ዩሱሲ ዲማ ባ ታማሬታኮ፥ «ሂንቴ ቤዔይሳ ቤዔይሳቲ ኣንጃቲዳይሳታ።

24 ቱማ ዳር ናቤቲኔ ካዋቲ ሂንቴ ቤዔይሳኔ ሲዔይሳ ቤዓናውኔ ሲዓናው ኣሞቲደሶና፥ ሺን ቤዒቦኮና፥ ሲዒቦኮና» ያገለገለ።

**ቱማ ሲቆ**

25 ሄኮ፥ ኢሲ ጋላሰ ሙሴ ዋጋ ኤሪያ ኢሲ ኡራይ ዴንዲዲ ዩሱሳ ያገዲ ፓጩ ኦይሾ ኦይቺሰ። «ኣሰታማሪያው፥ ሜሪና ዴዑዋ ላታናው ታኒ ኣይ ኦላ?» ያገለገለ።

26 ዩሱሲ፥ «ሙሴ ማፃፋን ፃፊቲዳይ ዋይጊ? ኔ ዋታ ናባባይ?» ያገለገለ።

---

**10:15** ኢሳ 14:13-15    **10:16** ማቶ 10:40፤ ማር 9:37፤ ሉቃ 9:48፤ ዮሃ 13:20    **10:19** ማዘ 19:13    **10:22** ዮሃ 3:35፤ 10:15    **10:25** ማቶ 22:35-40፤ ማር 12:28-34

27 አዴይ ዛሪዲ፥ « ሳይ ነ ሰላ፥ ነ ኩሜላ ዋዛና፤ ነ ኩሜላ ሸምጥዋፊ፥ ነ ኩሜላ ዋልቃፊኔ ነ ኩሜላ ቆፋ፤ ደሳ። ቃሲ አሴ ነ ሸሩዋ ነ ሁዲያዳ ደሳ) ያጌሰ» ያጌሰ።

28 ዬሱሲ ኢያኮ፥ «ኔኒ ሊኬ ዛራዳሳ፥ ኔካ ሄሳዳ ኦላ። ኔኒ ሜሪናው ዴያን ዳና» ያጌሰ።

29 ሺን ኡራይ ባና ዲሎ ኦላናው ኮዬዲ፥ «ሃናሰ ኢ ታ ሸርይ ኦኔ?» ያጌሰ።

30 ኢያ ኦይሻሰ ዬሱሲ ያጌዲ ዛር አሚሰ፥ «ኢሲ አሴ ዴዔይሲ ዬሩሳላሜ ካታማ፤ ዴጌ ኢያርኮ ካታማ ቢሺን ኦጌ ቦላ ፓንጋቲ ኬዬዲ ሸጪደሶና። ኢያ ማዑዋ ቃሪ ኤኪዲ ሃይቆፔኔ ፓፃፔ ጊደን ዬጊዲ ቢደሶና።

31 ጉዬ፤ አይሁዴ ካሂኔ ኢሶይ ሄ ኦጊያራ ባ ቡሱ ቢሽ ኡራ ቤዒዲ ዴሺ ጊዲ አዲሰ።

32 ቃሲ ኢሲ ለዌ ዴዔይሲ ሄ ቤሳ ጋኪሽ ኡራ ቤዒዲ ሃራሶራ አዲዲ ቢሰ።

33 ሺን፥ ኢሲ ሳማሪ ቢታ አሴ ዴዔይሲ ሄ ኦጊያራ ዩሽ ኡራ ቤዒዲ ኢያው ቃዴቲሰ

34 ኢያኮ ሸቀዲ፥ ኢያ ማዴንላ ቦላ ዛይቴኔ ዋይኔ ቲጊዲ ቃቸሰ። ባ ሃሪያ ቦላ ኡቲሲዲ ኢማሊ አቂያ ኬሊ ኤፊሰ። ሄ ቤሳን ኢያው ኮሺያባ ኡባ ኦሊሰ።

35 ዋንቴሌ ናምዑ ዲናሪ ኬሲዲ ኢማላ ኬላዋሰ ኢሚዲ፥ «ሃያና ሃ ኡራ ሎይላ ዲላ። ታኒ ኔው ኢሚዲይሳፊ ቦላራ ኔ ኬሲያባ ኡባ ታ ኔው ጪጋና) ያጌሰ።

36 «ሃዛ፥ ሃ ሄሹ አሳታ፤ ፓንጋቲ ሸጪዳ ኡራሰ ሸርቴይ ኔው ኦና ዳኒ?»

37 ኡራይ ዛሪዲ፥ «ኢያው ቃዴቲዳይሳካ» ያጌሰ። ዬሱሲ፥ «ኔካ ባዳ ሄሳዳ ኦላ» ያጌሰ።

**ዬሱሲ ማርታኔ ማይራሚ ሶን**

38 ዬሱሲ ባ ታማራታራ ኦጌ ቢሽ ኢሲ ጉታ ጋኪሰ። ያን ማርታ ጌቲቲያ ኢሲ ማጫሲያ ኢያ ባ ሶን ሞካሱ።

39 ኢዉካ ማይራሚ ጊያ ሚቺያ ዴዓዉሱ፥ ማይራሚ ቃላ ሲዓሽ ጎዳ ቶሁዋ ማታን ኡታሱ።

40 ሺን ማርታ ዳር ኦሶን ኡንዔታዳ ዬሱሳኮ ሸቃዳ፥ «ጎዳው፥ ታ ሚቺያ ኦሱዋ ታ ፃላላሰ ዬጋዳ ኡታ ኣጊን ታ ዳቡሪያ ዋይ ኔኒ ቤዓሽ ሲዒ ጋይ? ኢያ ታና ማዳና ሜላ ኦዲኪ» ያጋሱ።

---

10:27 ለዌ 19:18፤ ዛሬ 6:5      10:28 ለዌ 18:5      10:33 2ታሪ 28:15  
10:38 የሃ 11:1

41 ሺን ጎዳይ ሃይሳዳ ገዲ ዛሪስ፡ «ማርታ፡ ማርታ፡ ኔኒ ደርባን ኡንዔታሳኔ ሜቶታሳ።

42 ገደሺን፡ ኮዬቴይ ኢሲባ ፃላላ። ማይራማ ሎፖባ ዶራሱ፡ ሄሲካ ኢፔ ኤኬቴና» ያገሰ።

# 11

ዩሱሲ ዋሳባ ታማርሲስ  
(ማቶ 6:9-13፤ 7:7-11)

1 ኢሲ ጋላስ ዩሱሲ ኢሲ ቤሳን ዋሴስ። ዋሳ ዉርሲዳ ዋዴ ኢያ ታማራታፔ ኢሶይ፡ «ጎዳው፡ ዮሃንሲ ባ ታማራታ ዋሳ ታማርሲዳ ሜላ ኔካ ኑና ዋሳ ታማርሳ» ያገሰ።

2 ዩሱሲ፡ «ሃይሳዳ ያገዲ ዋሲቴ፡ ሳሉዋን ዴዲያ ኑ አዋው ኔ ጌሻ ሱንሳይ አንጃቶ፤ ኔ ካዋቴሳይ ዮ።

3 ኑ ጋላሳ ካላ ሃቺ ሃቺ ኑስ አማ።

4 ኑና ቆሄይሳታ ኑኒ አቶ ጌይሳዳ፡ ኑና ገራ አቶ ገ፤ ፓጩን ኑና ጌልሶፋ» ያገሰ።

5 ካሊዲካ፡ ዩሱሲ ባ ታማራታኮ ያገሰ፡ «ሌሚሶስ ሂንቴፌ ኢሱዋስ ላጌይ ዴዴስ። ኢ ገዲ ቢላሄ ባ ላጊያ ሶ ቢዲ፡ ታ ላጊያው፡ ሄቩ ሶሎ ታው ታልዓርኪ።

6 ታው ላጌ ገዲዳ ኢሲ አሲ ኦጌፔ ዪን፡ ኢያው አሊያባ ዳያስ» ያገሰ።

7 «ኢያ ላጌይ ከላ ገደን ገዲዲ፡ ሳያና ታና ዋይሶፓ፡ ዉላይ ጎርዴቲስ። ታ ናይቲካ ታራ አርሳ ቦላ ዚንዒደሶና። ያኒያ ገሾ፡ ዴንዳዳ ኔ ኮያባ አማናው ዳንዳዒኬ» ያገሰ።

8 ታ ሂንቴው ኦዳይስ፤ ላጌቴላ ገሾ ዴንዲዲ አማናው ኮዮና ኢዳኮካ ዋሳን ሳሌሊዳ ገሾ ዴንዲዲ ኮሺያባ ኡባ አሜስ።

9 «ሂሳ ገሾ፡ ታኒ ሂንቴው ኦዳይስ፤ ዋሲቴ ሂንቴው አሜታና፤ ኮዩቴ ሂንቴ ዴማና፤ ካሬ ዪዲ ያጌቴ ሂንቴው ዶዩታና።

10 ጋሶይካ ዋሲያ ኡባይ ኤኬስ፤ ኮዩይ ዴሜስ፤ ካሬ ዪዲ ያጌይሳስ ዶዩቴስ።

11 «ሂንቴና፡ አዋቶ ሂንቴ ገደፌ ናዒ ኡይሊ ዋሲን ሹቹ አሜይ ኦኔ? ሞሎ ዋሲን ሹሺ አሜይ ኦኔ?

12 ዋይኮ ጰጰሌ ዋሲኮ ኮርኔ አሚ?

13 ሂንቴ ኢታታ ጊዲሼ ሂንቴ ናይታስ ሎዖባ ኢሞ ኤሪኮ፡ ሳሎን ዴዲያ ሂንቴ ኣዋይ ዋሴይሳታስ ጌሻ ኣያና ዋቲ ኣሌ ኢሜኔ?» ያጊሰ።

**ዩሱሳኔ ቢዔልዜቡላ**

14 ኢሲ ጋላስ ዩሱሲ ዶና ሙሚሲዳ ቱና ኣያና ኢሲ ኡራፔ ኬሲሰ። ቱና ኣያናይ ኬዩዳ ማላ ሙሜ ኡራይ ኦዴቲሰ። ኣሳይካ ማላሌቲሰ።

15 ሺን ኢሶቲ ኢሶቲ፣ «ቱና ኣያና ሃላቃ፣ ቢዔልዜቡላ ዋልቃን ቱና ኣያናታ ኬሴሰ» ያጊደሶና።

16 ሃራቲ ቃሲ ፓጩሰ ሳሎፔ ማላ ቤሳና ማላ ኮዩደሶና።

17 ሺን ዩሱሲ ኤንታ ቆፋ ኤሪዲ ኤንታኮ፣ «ዋሊ ጊደን ሻኬቲያ ካዋቲሉ ኡባይ ቆዩሰ፤ ዋሊ ጊደን ሻኬቲያ ኬሌ ኩንዴሰ።

18 ዓላሂይ ዋሊ ጊደን ሻኬቲኮ ኢያ ካዋቲላይ ዋኒዲ ሚኒዲ ኤቃኔ? ሂንቴ ታና፣ (ኢ ቱና ኣያናታ ቢዔልዜቡላ ዋልቃን ኬሴሰ) ያጊታ።

19 ሂዛ፣ ታኒ ቱና ኣያና ቢዔልዜቡላ ዋልቃን ኬሲያባ ጊዲኮ ሂንቴ ናይቲ ኦዴ ዋልቃን ኬሶናሻ? ሄሳ ጊሹ፣ ኤንቴ ሂንቴ ቦላ ፕርዴይሳታ ጊዳና።

20 ሺን ታኒ ቱና ኣያናታ ያሳ ቢራዴን ኬሲያባ ጊዲኮ ሂዛ ያሳ ካዋቲላይ ሂንቴኮ ማቲዳይሳ ኤሪፔ።

21 «ሚኖ ኣሲ ዳንጩቲዲ ባ ኬላ ናጊያባ ጊዲኮ፣ ኢያ ሻሎይ ቦሹቲና።

22 ሃኖሺን፣ ኢያፔ ኣዲ ሚኖ ጊዲዳ ኣሲ ዩዲ፣ ኢያ ቆሂዲ ያኒኮ ኣማኔቲዲ ዳንጩዳ ዳንጩዋ ቢሊሲዲ፣ ኢያ ሻሎዋ ቦንቂዲ ሃራሰ ሻኬሰ።

23 «ታራ ጊደናይሲ ታና ኢዳሰ፤ ታራ ሺሾናይሲካ ላሌሰ።

24 «ቱና ኣያናይ ኣሳፔ ኬዩዳ ዋዴ ሸምፕያሶ ኮዩዲ ሃሌ ባይናሶራ ዩዩሰ። ሸምፕያሶ ቆዩዳ ዋዴ (ታ ኬዩዳሱዋ ሲማና) ያጊሰ።

25 ኢ ሲሚያ ዋዴ ኬላይ ፒቲቲዲ ሎዲዲ ዴዲሺን ዴሚሰ።

26 ሄሳፊ ጉዩ፣ ቢዲ ኢያፔ ኣዲ ኢቲዳ ሃራ ላፑን ቱና ኣያናታ ኤኪዲ ዩሰ። ኢያን ጌሊዲ ዲሱ ኦይኬሰ። ሄ ኡራሰ ኮይሮይሳፊ ጉዩይሲ ኣዲ ኢታ ጊዴሰ» ያጊሰ።

27 ዩሱስ ሄሳ ኦዳ ቦላ ዳዒሺን ኢሲ ማጫሲ አሳ ጋላፌ ዳንዳዳ፣ ባ ቃላ ቆቆ ኦላዳ፣ «ኔና ቶኪዳ ኡሎይኔ ኔኒ ቆሚዳ ቆንሳቲ አንጃቲደሶና» ያጋሱ።

28 ሺን ኢ፣ «አንጃቲዳይሳቲ ያሳ ቃላ ሲዒዲ ከቴቲይሳታ» ያገሰ።

**ዮናሳ ማላ**

29 ዳሮ አሳይ ሺቂዳ ዎዴ ዩሱሲ፣ «ሃ ዩሌቴላይ ኢታ፤ ኦራላ ማላ ኮዬሰ። ሺን ዮናሳ ማላታፔ አቲን ሃሪ ኤንታው ኢሜቴና።

30 ዮናሲ ናናዌ አሳሰ ማላ ገዲዳ ማላ አሳ ናዒይካ ሃ ዩሌቴላሰ ማላ ገዳና።

31 ዲጌሃ ካዊያ ፒርዳ ጋላሰ ሃ ዩሌቴላራ ዳንዳዳ ፒርዳና። ጋሶይካ፣ ኢያ ሶሎሞኔ ጨንጨቴላ ሲዓናው ቢታ ጋፃፔ ዳንዳዳ ያሱ። ሄኮ ሶሎሞኔፔ አጄይሲ ሃይሳን ዳዔሰ

32 ናናዌ አሳቲ ፒርዳ ጋላሰ ሃ ዩሌቴላራ ዳንዲዲ ኤንታ ቦላ ፒርዳና። ጋሶይካ ዮናሳ ሲብካቲያን ማርታ ጌሊደሶና። ሄኮ፣ ዮናሳቲ አጄይ ሃይሳን ዳዔሰ» ያገሰ።

**አሳቴላ ፖዩ**

33 «የሞፔ ያሞፒዲ ቆሳ ቤሳን ዎይኮ ኦቶ ገደን ዎሊያ አሲ ዳና። አሲ ፖዑዎ ቤዓና ማላ ቆቆ ቤሳን ዎሊሰ።

34 ኔ አሳቴላሰ ፖዩ ኔ አይፊያ። ኔ አይፊይ ሎዎ ገዲኮ፣ ኔ ኩሚላ አሳቴላይ ፖዔሰ። ኔና አይፊይ ሳኪኮ ኔ አሳቴላይ ኡባይ ቆሚሰ።

35 ሄሳ ገሾ፣ ኔ ጋርሳን ዳዒያ ፖዩ ቆሞና ማላ ናጌታ።

36 ሂዛ፣ ኔ ኩሚላ አሳቴላይ ፖዩ ገዲኮ፣ ኔ አሳቴላንካ ሃሪ ቆሚ ቤሲ ቆዩኮ፣ ኔ አሳቴላ ኩሚላይ ዎሊሌ ፖዩ ማላ ገዳሰ» ያገሰ።

**ኡሱፑን አዬታ**

(ማቶ 23:1-36፤ ማር 12:38-40)

37 ዩሱሲ ባ ኦዳ ኦንገዳ ማላ ኢሲ ፋሪሳዊይ ባራ ካሊ ማና ማላ ጃገሰ። ኢ ኢያራ ኢሲፊ ጌሊዲ ገቢራ ቦላ ኡቲሰ።

38 ፋሪሳዊይ ዩሱሲ ካሊ ማናፔ ሲንሌ ኩሼ ሚጮናይሳ ቤዒዲ ማላሌቲሰ።

39 ጎዳይ ኢያኮ፣ «ሂንቴ ፋሪሳዊቲ ቁሊያኔ ሻቲያ ቦላ ባጋ ሚጮታ። ሺን ሂንቴ ጋላይ ኡዜቴላኒ ኢታቴላን ኩሚሰ።



40 ሂንቴኖ፣ ኤያቶ፣ ካሬ ባጋ ሜዲዳይሲ ጋላ ሜዲዳይ ኢያ ጊዴኔዬ?

41 ሺን ቁሊያኒኔ ሻቴያን ዴዔይሳ ማንቆታስ ኢሚቴ። ሄ ዎዴ ሂንቴው ኡባባይ ጌሺ ጊዳና።

42 «ፋሪሳዊቶ ሂንቴና አዬ፣ ሳዎፕ፣ ፃሎቴፕ፣ ሄሳ ሜላባፕ አሰራታ ኬሴታ። ሺን ጊሎቴሊኔ ያሳ ዶሶይ ሂንቴናን ባዎ። ሃራታ አጎና ሃይሳታካ ኦላናው ቤሴስ፣ ሺን አጊዴታ።

43 «ፋሪሳዊቶ ሂንቴና አዬ፣ አይሁዴ ዎሳ ኬላን ቦንቾ ኦይዴ፣ ጊያ ጊዳን ቦንቾ ሳርሶ ዶሴታ።

44 «ማላይ ቆዩን አሳይ ኤሮና ቦላራ ቢያ ዱፎ ዳኔይሳቶ ሂንቴና አዬ» ያገሰ።

45 ሂጌ አስታማሬይ ዛሪዲ፣ «አስታማሪያው፣ ኔ ሄሳ ጋሼ ኑና ጫያሳ» ያገሰ።

46 ዬሱሲ፣ «ሂንቴኖ፣ ሂጌ አስታማሬቶ፣ ሂንቴናካ አዬ፣ አሳይ ቶካናው ዳንዳያና ዴያ ቶሆ ቶሴታ፣ ሺን ሂንቴ ሂንቴ ሁዔስ ሃሪ አቶሺን ቢራዴ ያራካን ቦቼኬታ።

47 «ሂንቴ አዋቴ ዎዲዳ ናቤታ ዱፋዎ ሂንቴ ገሊሲያ ጊሾ ሂንቴና አዬ።

48 ሂዛ፣ ሂንቴ አዋታ ኦሱዎ ሚንላናው ኤንቲ ዎዲዳ ናቤታ ዱፋዎ ሂንቴ ሎይሊያ ጊሾ ኤንታ ኢታ ኦሱዋስ ሂንቴ ማርካ።

49 ሄሳ ጊሾ፣ ያሳይ ባ ጨንጨቴላን፣ ሩናቤታኔ ሃዎሪታ ታ ሂንቴው ኪታና፣ ሺን ሂንቴ ባጋታ ዎቆና፣ ሃራታ ጎዳና» ያገሰ።

50 ሄሳ ጊሾ፣ ሃ ዬሌቴላይ አላሜይ ሜዴቶሳፕ ሃኖ ጋካናው ጉኪዳ ናቤታ ኡባ ሱላስ ኦይሼታና።

51 አቤላፕ ዶሚዲ ያርሾ ቤሳሲኔ ያሳ ኬላፌ ጊዱዋን ጉኪዳ ዛካሪያሳ ሱላ ጊሾ ሃ ዬሌቴላይ ኦይሼታና።

52 «ሂጌ አስታማሬቶ፣ ሂንቴና አዬ፣ ኤራቴላ ቁልፕያ ሂንቴ ኩሼን ኦይኪዴታ፣ ሺን ሂንቴው ጌሌኬታ ሃራታካ ጌልሴኬታ።» ያገሰ።

53 ዬሱሲ ያፕ ባናው ኬያ ዎዴ ሂጌ አስታማሬቲኔ ፋሪሳዊቴ ኢያራ ኤቄቴዲ ኦይሾን ዋይሶሶና።

54 ኢያ ዶናፕ ኬያ ቃላን ኢያ ኦይካናው ኮዪዲ ሄሳ ኦሊዶሶና።

# 12

## አያና ሚንጴሶ

(ማቶ 10:26-27)

1 ሄ ዎዴ ዳር ሙኩሉን ታይቤቲያ አሳይ ዎሊ ቦላ ዩጴታና ጋካናው አሲ አሳ ቦላ ሺቁዲ ዴዲሺን፣ ዩሱሲ ባ ታማሬታኮ፣ «ፋሪሳዊታ ኢርሹዎፌ ናጌቲቴ። ሄሲካ ኤንታ ጨቦቴላ።

2 ቆንጮና ቆሴቲዲ፣ ኤሬቶና ጌሚዲ አቲያባይ አይኮይካ ባዎ።

3 ሂዛ፣ ሂንቴ ቋማን ኦዲዳባይ ኡባይ ፖፖን ሲዔታና፣ ቆልዓ ጋላን ካልካሺዳባይ ዳባባን ኦዳታና።

4 «ታ ባጋቶ፣ ታ ኦዴይሳ ሲዒቲ፤ አሹዎ ዎጶሶናፔ አቲን ሃራ አይኮካ አላናው ዳንዳፖናይሳታስ ባቦፊቴ።

5 ሃናሺን፣ ሂንቴ ባባናው ቤሴይሳ ታ ሂንቴው ቆንጨሳና። ሄሲካ ዎጶዳፔ ጉዬ ጋናሜን ዩጋናው ዎልቃይ ዴዔይሳስ ኢያው ባቢቴ። ኤ፣ ቱማ ጋይስ፤ ኢያው ባቢቴ።

6 ኢቻሹ ቡቤቲ ኢሲ ሳንቲሜስ ባይዜቶኮናዬ? ሃናፔ አቲን ኤንታፊ ኢሲናካ ያሳ ሲንላን ዶጌቲኩ።

7 ሃሪ አቶሺን፣ ሂንቴ ሁዔ ቢናናይካ ፓይዳቲዲ ዴዔስ። ሂዛ፣ ባቦፊቴ፤ ዳር ቡቤታፔ ሂንቴ አጴታ።

8 «ታ ኦዴይሳ ሲዒቲ፤ አሳ ሲንላን ታው ማርካቲያ ኡባስ አሳ ናዓይ ያሳ ኪታንቸታ ሲንላን ማርካታና።

9 አሳ ሲንላን ታና ካዴይሳስ ያሳ ኪታንቸታ ሲንላን ታ ኢያ ካዳና።

10 አሳ ናዓ ቦላ ካጴ ቃላ ሃሳያ ኡባይ ማርታ ዴማና፣ ሺን ጌሻ አያና ቦላ ካጴ ቃላ ኦዴቲይሲ ማሬቴና።

11 «አሲ ሂንቴና ኦይኪዲ አይሁዴ ዎሳ ኬላን፣ ዳይናታ ሲንላኒ ካዎታ ሲንላን ጎሹቺያ ዎዴ አይ ኦዳኔኮኔ ዎይጊ ዛራኔኮ ሂርጎፊቴ።

12 ሄ ዎዴ ሂንቴ ኦዳናባ ጌሻ አያናይ ሂንቴና ታማርሳና» ያጊሰ።

## ዲሬ ኡራ ኤያቴላ

13 አሳ ጊዶፌ ኢሲ አሲ ዩሱሳኮ ዩዲ፣ «ታ ኢሻይ ታው ኦ አዎ ላታፔ ሻካና ማላ ኢያው ኦዳ» ያጊሰ።

12:1 ማቶ 16:6፤ ማር 8:15    12:2 ማር 4:22፤ ሉቃ 8:17    12:10 ማቶ 12:32፤ ማር 3:29    12:11 ማቶ 10:19-20፤ ማር 13:11፤ ሉቃ 21:14-15

14 ዩሱሲ ዛሬዲ፡ «ላ አዲያው፡ ሂንቴ ቦላ ታና ዳይናኔ ላታ ቫኪያ ጨማ ኦሊዲይ ኦኔ?» ያገሰ።

15 ቃሲካ ዩሱሲ፡ «አሳ ዴያይ ሻሎ ዳርቴላን ገደና ገሾ ያሬ አገዲ ሚንሉዲ ሂንቴና ናገቴ» ያገሰ።

16 ካሊዲካ ለሚሶን፡ «ጋዴይ ዳር ካሉ አሚያ ኢሲ ዱሬ ኡራይ ዴዔስ።

17 ሄ ኡራይ፡ ታ ካላ ታኒ ሺሻናው ቤሲ ጉዲዳ ገሾ አይ አሉ?» ያገዲ ባ ዋዛናን ቆገሰ።

18 ሂዛፕ ያታና፤ ካሴ ዴዒያ ሻሌታ ላላዳ ሃራ ዳልጋ ሻሌታ ከፃና። ካላኔ ታው ዴዒያባ ኡባ ኢያን ዩጋና።

19 ባ ሺምፔኮ፡ ታ ሺምፔቴ፡ ዳር ላይላስ ኔው ገዲያ ሻሎ ሺሻስ። ሂዛ፡ ሺምፓዳ ማ፡ ኡያ፡ ኡፋይታ) ያጋና።

20 «ሺን ያሳይ፡ ላ፡ ኤያ አዲያው፡ ሃቺ ቃማ ኔ ሺምፔያ ኔፔ ኤኬታዉሱ። ሂዛ፡ ኔ ሺሺዳባይ ኦዴሰ ገዳኔ?» ያገሰ።

21 «ሂሳ ገሾ፡ ባው ዱሬቴሉ ሳዓን ሺሺያ አሳስ፡ ያሳ ማታን ዱሬ ገደና አሳስ ወርሱላይ ሃ ኡራይሳ ሜላ» ያገሰ።

**ኡንዔቶፊቴ**  
(ማቶ 6:25-34)

22 ሄሳፌ ጉዬ፡ ዩሱሲ ባ ታማሬታኮ፡ «ሂዛ፡ ታ አዲያባ ሲዒቴ፡ ሂንቴ ሺምፔቀሰ አይ ሚኖ ሂንቴ ቦላስ አይ ማዒኖ ያገዲ ኡንዔቶፊቴ።

23 ሺምፖይ ካላፌ ቦሊ አፊላፔ አዴስ።

24 ካፎታ ቤዒቴ ዜርኮና፡ ኪሾኮና፡ ኤሌይካ ሻሌይካ ባዋ። ሺን ያሳይ ኤንታና ሙዜስ። ሂንቴ ካፎታፔ ዳር አዴታ።

25 ሃኖሺን፡ ሂንቴፌ ኡንዔቲዲ ባ ላይላ ቦላ ኢሲ ቃማ ጉጃናው ዳንዳዔይ ኦኔ?

26 ሂዛ፡ ሃ ጉላባ ኦላናው ዳንዳያና ሂንቴ ሃራባስ አይስ ኡንዔቴቲ?

27 አኔ ጨሻቲ ዋኒዲ ዲጨያኮ ቤዒቴ። ዋኮኮናኔ ሱቆኮና። ሃሪ አቶሺን፡ ሶሎሞኔይ ባ ዴዒያ ቦንቾ ኡባን ኤንታፊ ኢሱዋ ሜላካ ማዒቤና።

28 ሂንቴኖ፡ አማኖይ ፓጨዳይሳቶ፡ ሂዛ፡ ያሳይ ሃቺ ቤንቲዲ ዋንቶ ታማን ዩኔታና ጨሻታ ሃይሳዳ ማይዚኮ፡ ሂንቴና ዋቲ አሉ ማይዜኔ?

29 ሂሳ ገሾ፡ አይ ሚኖ ዋይኮ አይ ኡዩኖ ገዲ ኡንዔቶፊቴ።

30 ሄ ኡባስ የሳ አማኖና አሳቲ ኡንዔቶሶና። ሺን ሂንቴ አዋይ የሳይ ሄሲ ኡባይ ሂንቴው ኮሼይሳ ኤሬሰ።

31 ኡባሬ አሊዲ የሳ ካዎቴላ ኮዪቴ ሄሲ ኡባይ ሂንቴው ጉጂ ኢሚታና።

32 «ሂንቴና፣ ጉላ ዳሬቶ፣ ያዮፊቴ፤ ሂንቴ አዋ የሳይ ካዎቴላ ሂንቴው ኢማናው ኡፋይቴሰ።

33 ሂንቴው ዳዒያሳ ባይዚዲ ማንቆታሰ ኢሚቴ። ካይሶይ ኤኮናሶን፣ ቢሊ ሞናሶን፣ ጨሞና ካርዒታን፣ ዉርና ሻሉዋ ሳሉዋን ሺሺቴ።

34 ሂንቴ ዎዛናይ ሂንቴ ሻሎይ ዳዒያሱዋን ገደና።

**ባርኪዲ ናጎ**

35 «ቃንላን ዳንጨዲ ገቤቴቴ፤ ሂንቴ ያምፔይ ፖዒዳይሳ ገደ።

36 ባንታ ጎዳይ ያጋኖፔ ሲማና ጋካናው ባርኪዲ ናገይሳታዳ፣ ጎዳይ ዪዲ ያገያ ዎዴ ኤሌሲዲ ደያናው ገገዳ አሳታ ዳኒቴ።

37 ባንታ ጎዳይ ሲሚያ ዎዴ ጳሰኮና ዳዒሺ ናገይሳቲ አንጃቲዳይሳታ። ቱማ ጋይሰ፤ ጎዳይ ቃንላን ዳንጨዲ ጋይታ ዩሹዋን ኡቲሲዲ ሞኬሰ።

38 ጎዳይ ላዴ ገዲን ገዲ ቢላሄ ገዲን ዎይኮ ዎንቲማፍ ገዲን ዪዲ፣ ሄሳ ሜላ ጳሰኮና ናገሺን ዳሚያ ሄ አይሌቲ አንጃቲዳይሳታ።

39 ሺን ሃይሳ ኤሬቴ፤ ካይሶይ አዉዴ ያኔኮ ኬላዎይ ኤሪያኮ ኬላይ ቦኬቲያ ዎዴ ሲዒ ገዲ ቤዔና።

40 ሂንቴካ ገገዲ ናገቴ፤ አሳ ናዓይ ሂንቴ ቆፖና ዎዴ ያና» ያገሰ።

41 ጳዒርሲካ፣ «ጎዳው ሃ ለሚሱዋ ኑ ፃላላሰ ኦዳዬ ዎይኮ አሳ ኡባሴ?» ያገሰ።

42 ጎዳይ ዛሪዲ፣ «ሂዛ፣ ካላ ሙዛናው ቤሲያ ዎዲያን ኢማና ሜላ ጎዳይ ባ አይሌታ ቦላ ሹሚዳ አማንፍይሲኔ ዎዛናማ ሃላቃይ ኦኔ?»

43 ጎዳይ ሲሚያ ዎዴ ሄሳ ሜላ ኦሊሺ ቤንቲያ አይሌይ ኢ አንጃቲዳይሳ

44 ታ ሂንቴው ቱማ ኦዳይሰ፤ ባ ጎዳሰ ዳዒያ ሻሎ ኡባ ቦላ ኢ ሹሚታና።

45 ሺን ሄ አይሌይ፣ ተ ጎዳይ ኤሌ ዩና) ያጊዲ ባ ዎዛናን ቆፒዲ፣ ማጫ አይሌታኔ ኣዳ አይሌታ ዎዲኩ፣ ቃሲ ባው ኮዩዲ ማላ ሚሼኔ ኡዩሼ ማሉቲኮ፣

46 ሄ አይሌያ ጎዳይ ኢ ቆፖና ጋላሳኒኔ ሂርጎና ዎዴ ያና። ዩዲ ኢያ ቃንፀሬሳዲ፣ ኢያ ቃዳ አማኖና አሳታራ አላና።

47 «ጎዳ ሹኒያዳ ገጎናይሲኔ ኢያ ጎዳይ አይ ደሲያኮ ኤሪሼ ኦላና አይሌይ ዳር ጋራፊታና።

48 ሺን ባ ጎዳ ሹኒያ ኤርና አቲዲ ጋራፊታናው ቤሴይሳ ኦላዳይ ጉላራ ጋራፊታና። ጋሶይካ ዳር አማቲዳይሳፊ ዳር ኮዬቲስ፣ ዳር ሃዳራ ኤኪዳይሳፊካ ዳር አማና ጊዲ ናጌቲስ።

**ሳርቴላስ ጊዶናሺን ሻኬቲላሳ**  
(ማቶ 10:34-36)

49 «ታኒ ዩዳይ ቢታ ቦላ ታማ ኦይላናሳ። ሃዲ ታማይ ኦይኪያኮ ታና ዎቲ ኡፋይሳንዴሻ!

50 ሃኖሺን፣ ታ ሃዲ ፃማቄቲያ ዊንቃቲይ ዳዔስ። ኢ ፖሌታና ጋካናው ታ ዳር ኡንዔታይስ።

51 ሳዓ ቦላ ሳርቴላ ኤሃናው ዩዳ ሂንቲው ዳኒ? ጊዴና፣ ታ ዩዳይ ሻካናሳ።

52 ሃዲፊ ደሚዲ ዎሊ ጊዶን ሻኬቲዳ ኢቻሹ ኬላ አሳቲ ኢሲፊ ዴያሶና። ናምዓቲ ሄሻታ ቦላ፣ ሄሻቲካ ናምዓታ ቦላ፣ ዴንዲዲ ሻኬቶሶና።

53 አዎይ ናዓ ቦላ፣ ናዓይካ አዎ ቦላ፣ ኢያ ናዔ ቦላ፣ ናዓያ አዬ ቦላ፣ አዚና ኢያ ናዓ ማቺ ቦላ፣ ናዓ ማቺያ አዚና አዬ ቦላ፣ ዴንዲዲ ሻኬታና።»

**ላይላታ ማሎ**  
(ማቶ 16:2-3)

54 ቃሲካ አሳኮ፣ «ዉሎሃ ባጋራ ሳሎይ ሻራቲያ ዎዴ ቤዒዲ፣ ኤሌሲዲ፣ (ኢሪ ያና) ያጌታ፣ ሄሳዳካ ሃኔስ።

55 ዲጌሃ ጫርኮይ ጫርኪያ ዎዴ (ሳዓይ አዎና) ያጌታ፣ ሄሳዳካ ሃኔስ» ያገሰ።

56 ሂንቲኖ፣ ጨቦቶ፣ ሳሎባኔ ሳዓባ ሻኪ ኤሬታሺን ሃ ዎዲያ ሻኪ ኤርይ ሂንቲና ዎኒዲ ያኒዴ?

57 «ያቲን፣ ሂንቲ ሁዔስ አይስ ቱማ ፒርዴኬቲ?

58 ኔ ሞርኪያራ ዋላ ዳይና ሲንፋን ኤቃናው ባሼ ኦጌ ቦላ ገጋናው ኮያ። ኔ ገገና ኢዲኮ ጎሼቺዲ ዳይና ሲንፋ ኔና ኤፋና። ዳይናይ ኔና ፖሊሴስ አሉ ኢማና። ኢ ኔና ዋይኔን ዬጋና።

59 ሲዲቲ፥ ኢሲ ባካኒ ኣቶና ጨጋ ኣንጋና ጋካናው ኔ ያፔ ከዮናይሳ ኤራ» ያገሰ።

# 13

## ናጋራፔ ሲሞ

1 ሄ ዋዴ ዬሱሳኮ ኣሳይ ዪዲ ጲላዖሲ ዋዲዲ ኤንታ ሱፋራ ኤንታ ያርሹዋ ዋላኪዳ ጋሊላ ኣሳባ ኦዲዳ ኣሳቲ ሄ ቤሳን ዴዖሶና።

2 ኢ ሃይሳዳ ያገዲ ዛሪስ፤ «ያቲን ሄ ጋሊላ ኣሳቲ ሄ ኢታ ሃይቆ ሃይቂዳ ገሾ ጋሊላን ዴዲያ ኣሳ ኡባፌ ኣዲዳ ናጋራንቸ ዳኖና?

3 ገዴና! ገደሺን፥ ሂንቴካ ማርታን ሲሞና ኢዲኮ፥ ኡባይ ሄሳዳ ዳያና።

4 ዋይኮ ቃሲ ሳሊሆሜ ገያ ቤሳን ገምቤይ ዋዲዲ ዋዲዳ ታማኔ ሆስፑን ኣሳይ ዬራሳላሜን ዴዲያ ኣሳ ኡባፌ ኣዲዳ ናጋራንቸ ዳኖና?

5 ገዴና! ሺን ሂንቴካ ማርታን ሲሞና ኢዲኮ ኡባይ ሄሳዳ ዳያና።»

6 ቃሲካ ዬሱሲ ሃይሳዳ ገዲ ሌሚሶ ኦዲሰ፡ «ኢሲ ኡራሰ ዋይኔ ጋዴን ቶኬቲዳ ባላሴ ሚሊያ ዴዳዉሱ። ኢ ኢፔ ኣይፌ ኮዩ ዪዲ ኣይኮካ ዴሚቤና።

7 ጋዲያ ጎዳይ ዋይኔ ኦሳንቸዋኮ፥ ላይፌ ዴማናው ኮያዳ ሄቩ ላይሊ ሲሜሬታዳ ኣይኮካ ዴማቢኬ። ሄሳ ገሾ፥ ቃንፃ ዲጋ፤ ኣይሰ ቢታ ማሊሳይ?» ያገሰ።

8 «ሺን ኦሳንቸይ፥ ሳዳው፥ ኢ ዩሹዋ ኦፋዳ ኦሻ ዬጋና ጋካናው ሃ ላይላስ ኣጋርኪ።

9 ሃ ላይሊ ኣይፊኮ ሎዖ፥ ኢዲኮ ቃንፃ ኣጋ» ያገዲ ዛሪስ።

## ዘኮ ኩኒዳ ማጨሲያ ፓፃሱ

10 ዬሱሲ ሳምባታ ጋላስ ኣይሁዴ ዋሳ ኩፋን ታማርሴስ።  
11 ሄ ቤሳን ታማኔ ሆስፑን ላይሊ ቱና ኣያኒ ዘኮ ኩኒሲዳ ኢሲ ማጨሲያ ዴዳዉሱ። ኢያ ኩናፔ ዴንደይሳን ሱሬ ኤቃናው ዳንዳዑኩ።

12 ዬሱሲ ኢዮ ቤዒዳ ዋዴ ያገዲ፥ «ሃ ማጨሴቲ፥ ኔ ሃርገያፌ ፓፃዳሳ» ያገሰ።

13 ባ ኩሺያ ኢ ቦላ ዋሊን፣ ኢያ ሶሁዋራ ሱራዳ ኤቃሱ።  
ፆሳካ ጋላታሱ።

14 ሺን ኣይሁዳ ዋሳ ኩላ ሃላቃይ ዩሎተዲ ኣሳኮ፣ «ኦሶ ኦሊያ ኡሱፑን ጋላሳቲ ዳፆሶና። ሄሳ ጊሹ፣ ሄ ጋላሳታን ዩዲ ፓፂቴፔ ኣቲን ሳምባታ ጋላስ ጊዴና» ያጊሰ።

15 ጎዳይ፣ «ጨቦቶ፣ ሂንቴ ጊደፌ ቦሪ ዋይኮ ሃሬ ሳምባታ ጋላስ ዛዳሎፔ ቢሊዲ ሃሌ ኡሻናው ኤፎናይ ኦኔ?

16 ያቲን፣ ሃ ማጫሲያ ኣብራሃሜ ናዓ ጊዳሺ ፃላሄን ቃሽታዳ ታማኔ ሆስፑን ላይሊ ኩሜሊ ዳዒዳሪስ ሳምባታ ጋላስ ቢርሼቴሊ ኮሼኔ?» ያጊዲ ኦይቺሰ።

17 ኢ ሄሳ ኦዲዳ ዋዴ ኤቁቴይሳቲ ኡባይ ዩላቲደሶና። ሺን ኣሳ ኡባይ ኢ ኦሊዳ ማላሊሲያ ኦሶ ኡባን ኡፋይቲደሶና።

18 ሄሳፌ ጉዬ፣ ዩሱሲ ሃይሳዳ ያጊሰ፣ «ፆሳ ካዋቴላይ ኣይ ዳኒ? ኢያ ኣይቢራ ዳኒሶ?

19 ፆሳ ካዋቴላይ ኢሲ ኣሲ ባ ጎሻን ቶኪዳ ዋላ ኣይፌ ማላ። ኢ ዲጨዲ ሚሊ ጊዲሰ። ሳሎ ካፎቲ ኢያ ታሺያ ቦላ ሽምፒደሶና።

20 ቃሲ፣ «ፆሳ ካዋቴላ ኣይቢራ ዳኒሶ?

21 ኢሲ ማጫሲያ ዳር ጴሌራ ዋላካዳ ሙኑቂዳ ጉላ ኢርሾ ዳኔሰ» ያጊሰ።

**ፀንገሳ ወላ**

22 ሄሳፌ ጉዬ፣ ዩሱሲ ዩሩሳላሚ ቢሼ ኢ ካንሊያ ኦጊያን ዳዒያ ካታማታኒኔ ጉታታን ታማርሲሼ ኣጲሰ።

23 ኢሲ ኣሲ ዩሱሳኮ፣ «ጎዳው፣ ኣታናይ ጉላ ኣሳ ፃላሌ?» ያጊዲ ኦይቺሰ።

ዩሱሲ ኤንታኮ፣

24 «ሰዒቲ፣ ፀንገሳ ወላራ ጌላናው ባፃቲቲ። ዳርቲ ጌላናው ኮዮሶና ሺን ኤንታው ሃኔና።

25 ኩላዋይ ዳንዲዲ ወላ ጎርዲዳፔ ጉዬ ሳሰ ደያርኪ) ያጊሼ ካሬን ኤቁዲ ፃሲ ኦይኬታ። ሺን ኢ፣ ሂንቴ ኦኔኮኔ ኣወፔ ዩዳኮ ታ ኤሪኬ) ጊዲ ዛራና።

26 ሄ ዋዴ ሂንቴ፣ ሳራ ዋላ ሚዳ፣ ኡዩዳ፣ ኦ ዳባባንካ ታማርሳዳሳ) ያጋና።

27 «ኢ ዛሪዲ፣ ሂንቴ ኦኔኮኔ ኣወፔ ዩዳኮ ኤሪኬ። ሂንቴና፣ ጌላቶ ታፔ ሃኪቲ) ያጋና።

28 አብራሃም፣ ዩሳቃ፣ ያይቆባኔ ናቤታ ኡባ ያሳ ካዎቱላን ቤዓና፣ ሺን ሂንቲ ካሬን ዎጲዲ አቲያ ዎዴ ሂንቲው ዩሆኔ አቼ ጋርጬሌ ገዳና።

29 እሳይ ደሎሃ፣ ዉሎሃ፣ ፑዴሃ፣ ዲጌሃ፣ ዩዲ ያሳ ካዎቱላን ገቢራ ቦላ አታና።

30 ሄሳ ገሾ፣ ሃዲ ዳላን ጉዬ ገዲዳይሳታ፣ ሲንጼ ገዳናይሳቲ፣ ሲንጼ ገዲዳይሳታ፣ ጉዬ ገዳናይሳቲ ዳዎሶና» ያገሰ።

**ዩሱሲ ዩሩሳሌሜስ ዩኪስ**  
(ማቶ 23:37-39)

31 ሄ ዎዴ ፋሪሳዊታ፣ ኢሶቲ ኢሶቲ ዩዲ፣ «ሄሮዲሲ ኔና ዎጻናው ኮያ ገሾ ሃ ቤሳፌ ዳንዲዳ ባ ገደሶና።

32 ኢ ዛሪዲ፣ «ቢዲ፣ ሄ ዎርካናስ ሄኮ፣ ሃቸኔ ዎንቶ ቱና አያናታ ኮሳና፣ ሃርጋንቾታ ፓላና፣ ሄቫንላ ጋላሳን ኩሻ ቦላ ጋካና) ያገሰ ገቲ።

33 ሃኖ፣ አቲን፣ ናቤይ ዩሩሳሌሜ፣ ካሬን ሃይቃናው ቤሴና። ሄሳ ገሾ፣ ሃቸ፣ ዎንቶኔ ዎንቲ ፔዲን ሄ ቤሳ ባናው ዳንዲስ።

34 «ዩሩሳሌሜ፣ ዩሩሳሌሜ፣ ናቤታ ዎጲያሬ፣ ኔኮ ኪቲቲዳይሳታ ሹቻን ጫዲያሬ፣ ኩቶይ ባ ናይታ ባ ቁፊያ፣ ጋርሳን ሺሺያዳ ኔ ናይታ ታ ቁሲያ፣ ጋርሳን አፑን ቶሆ ሺሻናው ኮያዲና፣ ሺን ሂንቲ ኢፃስ ገዳታ።

35 ታ ሂንቲው ኦዳይስ፣ ሂንቲ ኬላይ ካይሳታና። ጎዳ ሱንላን ዩይሲ አንጃቲዳይሳ ሂንቲ ጋና ጋካናው ታና ዳሜኬታ» ያገሰ።

# 14

**ዩሱሲ ፋሪሳዊያ ሶን**

1 ኢሲ ሳምባታ ጋላስ ዩሱሲ ኢሲ ፋሪሳዊታ ሃላቃ ሶ ካሌ ማናው ጌሊያ ዎዴ እሳይ ጫዲ ዪሎሶና።

2 ሄ ቤሳን ሻዉሄ ሃርጌን ዎዬቲያ ኢሲ አሲ ኢያው ሲንላ ባጋራ ዚንዲስ።

3 ዩሱሲ ፋሪሳዊታኮኔ ሂጌ አስታማሬታኮ፣ «ሳምባታ ጋላስ ሃርጋንቾ ፓሶይ ዎጌዬ ዎጋ ገዳኔ?» ያገዲ አይቸስ።

4 ኤንቲ ሲዲ ገደሶና። ዩሱሲ ሃርጌቲያ ኡራ ቦቺ ፓሌዲ ዎይዚስ።

---

13:29 ማቶ 8:11-12፤ 22:13፤ 25:30      13:30 ማቶ 19:30፤ 20:16፤ ማር 10:31      13:35 ማዝ 118:26፤ ኤር 22:5



5 «ቃሲካ ሂንቴፌ ኢሱቀስ ናዒ ዎይኮ ቦሪ ሳምባታ ጋለስ ኣፎን ወሊኮ ኤሌሲዒ ኬሶናይ ኦኔ?» ያጊዒ ኦይቸሰ።

6 ኤንቲ ኢሲባካ ዛራናው ዳንዳዒቦኮና።

7 ዩሱሲ ኢማቱቀስ ጭቴዳይሳቲ ቦንቾ ቤሲ ዶሪሸን ቤዒዲ፥ ሃ ለሚሱቀ ኦዲሰ።

8 «ኢሲ ኣሲ ኔና ያጋኖ ጭኮ ቦንቾ ቤሳን ኡቶፋ። ኔፔ ኣጂ ቦንቹቲያ ኣሲ ጭታናው ዳንዳዒሳ።

9 ሂንቴና ናምባታካ ጭቴዳይሲ ዩዲ፥ ሳ ቤሳ ሃ ኢማሳስ ዩዳ) ያጊያ ዎዴ ኔኒ ዩላታሼ ዚቃ ቤሲ ዎቆሳ።

10 ጊዶሺን፥ ኔ ጭቴዳ ዎዴ ኮይርታዳ ዚቃ ቤሲ ቤዒዳ ኡታ። ጭቴዳ ዩዲ፥ ታ ላጊያው፥ ሃ ቦንቾ ቤሳን ኡታ) ያጋና። ሄ ዎዴ ኔራ ኢሲፌ ጭቴዳ ኣሳ ኡባ ሲንሳን ኔ ቦንቹታና።

11 ባና ቶቁ ቶቁ ኦሊያ ኡባይ ካወያና፤ ባና ዚቁ ዚቁ ኦሊያ ኡባይ ቶቁ ቶቁ ጋና።»

12 ቃሲ ዩሱሲ ኢያ ሞኪዳ ኬላ ኣዎኮ፥ «ቁማ ዎይኮ ካሆ ኢማቶ ጭቴዳ ዎዴ ኔኒ ኩሼ ዛር ጭና ማላ ኔ ላጌታ ዎይኮ ኔ ኢሻታ ዎይኮ ኔ ዳቦታ ዎይኮ ኔ ዱሬ ሾርታ ኢማቶ ጭገ።

13 ጊዶሺን፥ ኔ ኢማቶ ገጊሲዳ ዎዴ ማንቆታ፥ ዎቤታ፥ ጉንዳታኔ ቆቁታ ጭገ፤ ኔኒ ኣንጂታና።

14 ሃይሳቲ ኩሼ ዛራናው ዳንዳዖና ጊሾ ኩሼ ዛርይ ጌሻታ ዳንዶ ጋላሳን ኔው ሲማና» ያጊሰ።

**ጊታ ኢማቱቀ**  
(ማቶ 22:1-10)

15 ዩሱሳራ ዎላ ኢማቶ ቦላ ኡቶይሳታ ጊዶፌ ኢሶይ ሄሳ ሲዒዲ፥ «ዖሳ ካዎቴላን ኢማቶ ቦላ ኡቴይሲ ኣንጂቲዳይሳ» ያጊሰ።

16 ዩሱሲ፥ «ኢሲ ኣሲ ጊታ ኢማቶ ገጊሲዲ ዳር ኣሳታ ጭገሰ።

17 ኢማቶይ ሞኬቲያ ሳቴይ ጋኪያ ዎዴ ጭቴዳ ኢማሳታ፥ ሳኮ ኡባባይ ገገሰ፥ ሃ ዩቴ) ያጊዒ ጭጋናዳ ባ ኣይሊያ ከቲሰ።

18 «ሺን ኡባይካ ባንታ ጋሶ ጋሶ ሜጂዶሶና። ኢሶይ፥ ሳዒ ቡር ጋዴ ሻሚዳ ጊሾ ባዳ ቤዒናው ኮሼሰ ሃያና ታና ኣጋርኪ ያጋ) ያጊሰ።

19 ሃንኮይ፥ ሳቻሹ ዎላ ቦሪ ሻማሰ ኤንታና ዎፃ ቤዒና ጊሾ ሃያና ታና ላንጮፋ) ያጊሰ።

20 ቃሲ ሃራይ፣ ሓኒ ቡሮ ሜዳን ዳዒያ ገሾ ያናው ዳንዳዒኬን ያገሰ።

21 «አይሌይ ሲሚ ዪዲ ሄ ኡባ ባ ጎዳሰ ኦዲሰ። ሄ ዋዴ ያጋኖ አዋይ ሃንቁቲዲ አይሊያኮ፣ ለሌላዳ ካታማን ዳዒያ ዋጋ ኦኔታኔ ዳጋላታ ባዳ፣ ማንቆታ፣ ዋቤታ፣ ቆቁታኔ ጉንዳታ ሃ ኤሃ» ያገሰ።

22 «አይሌይ፣ ሓ ጎዳው፣ ኔ ከቲዳይሲ ኡባይ ፖሌቲስ፣ ሺን ሃዒካ ቤሲ ዳዒሰ» ያገሰ።

23 «ጎዳይ አይሊያኮ፣ ለሆሮጋታ ቦላኔ፣ ጋዴ ጊዶ ኦኔታ ኬያ፣ ታ ኬላይ ኩማና ጋካናው ዴሚዳ ኡባ ያና ሜላ ኦላ።

24 ታ ሂንቴው ኦዳይሰ፤ አማቶቲዳይሳታፔ ኦኒካ ታ ገቢራፔ ሞናይሳ ኤሪቴ» ገሰ» ያገሰ።

ጎዳ ካሎይ ያርሺሴስ

25 ዳር አሳይ አያራ ዋላ ቢሺን ዩሱሲ ኤንታኮ ጉዬ ሲሚዲ፣

26 «ታኮ ያ ኡባይ ባ አዋኔ ባ አዪው፣ ባ ማቺዉኔ ባ ናይታ፣ ባ አሻታኔ ባ ሚቼታ፣ ሃሪ አቶሺን ባ ዴዐ-ዋ አያናይ ታ ታማሬ ገዳናው ዳንዳዒና።

27 ባ ማሰቃሊያ ቶኪዲ ታና ካሎናይ ታ ታማሬ ገዳናው ዳንዳዒና።

28 «ሂንቴፌ ኢሲ አሲ ሹቻ ኬላ ኬፃናው ኮይኮ፣ ኬላ ኬፀዲ ኦንጋናው አይ ሜላ ሚሼ ኮሺያኮ ኮይሮቲዲ ኤራናው ቆፒ ቤዳናይ ኦኔ?»

29 ሄሳ ገዳና አዲኮ፣ ሃ ኡራይ ባሶ ሹቻ ሂዲን ቁሰቴላ ያኒኮ፣

30 ቤዒያ ኡባይ፣ ሃ ኡራይ ገምቤላ ኦይኪን ቁሰታናው ኢያ ያኒሰ» ያገዲ ቦሮሶና።

31 «ዋይኮ ኢሲ ካዋይ ሃራ ካዋራ ኦሌታናው ዳንዲሽ ላታሙ ሙኩሉ ኦላንቸታ ኤኪ ያ ካወዋራ ታሙ ሙኩሉ ኦላንቸታራ ኤቁታናው ዳንዳዳናይሳኔ ዳንዳዳናይሳ ኡቲዲ ዞሪቶናይ ኦኔ?»

32 ኤቁታናው ዳንዳዳቶናባ ገዲኮ፣ ሄ ሃራ ካወዋራ ሃሆን ዳዒሺን ገጋናው ኮይሮቲዲ ጨማ ዩዲዲ ኦይቼሰ።

33 ሄሳዳካ፣ ሂንቴፌ ኦኒካ ባው ዳዒያባ ኡባ አጎና አዲኮ ታ ታማሬ ገዳናው ዳንዳዒና።

34 «ማዲኔይ ሎዎ፣ ሺን ማዲኔይ ባ ማልዑዋ አገኮ፣ ዋኒዲ ማዲኔ ጌቲታናው ዳንዳዒና?»

14:26 ማቶ 10:37      14:27 ማቶ 10:13፤ 16:24፤ ማር 8:34፤ ሉቃ 9:23

35 ቢታቴላስካ አራዳቴላስካ ማደናባ ጊዲያ ጊሾ ዎራ ዩጌቴስ። ሂዛ፣ ሲዒያ ሃይሉ ዳዒያ ኣሲ ሲያ» ያገሰ።

# 15

## ጳዩዳ ደርሳ

(ማቶ 18:12-14)

1 ኢሲ ጋላስ ቃራፃ ቃንፃይሳትኔ ናጋራንቸቲ ዬሱሳ ቲሚርቲያ ሲዓናው ኢያ ዩሹዋን ሸቂደሶና።

2 ሺን ፋሪሳዊቲኔ ሂጌ ኣስታማሬቲ፣ «ሃይሲ ኡሪይ ናጋራንቸታ ሸሺዲ ኤኬስ፣ ኤንታራ ኢሲፌ ሜስ» ያገዲ ዙዙሚደሶና።

3 ዬሱሲ ያገዲ ሃይሳ ለሚሶ ኤንታው ኡዲስ፡

4 «ሂንቲ ጊደፌ ኢሱዋስ ፃቲ ደርሳቲ ዳዒያባ ጊዲኮ ኤንታፌ ኢሶይ ጳዩኮ ኡዲፋን ታማኔ ኡዲፋናታ ባዘን ኣገዲ ጳዮይሳ ዳማና ጋካናው ኮዮናይ ኦኔ?

5 ዳሚዳ ዎዳ ኡፋይቲዲ ባ ጋናን ቶኪዲ፡

6 ባ ሶ ሲሜስ። ባ ላጌታኔ ሾርታ ኢሲፌ ፃጊዲ፣ «ጳዩዳ ታ ደርሳ ዳማስ፣ ታራ ኢሲፌ ኡፋይቲቲ» ያገሰ።

7 ሃሳዳካ፣ ማርቲ ኮሾና ኡዲፋን ታማኔ ኡዲፋን ፃሎታፔ ኣሉዲ ማርታን ጌሊያ ኢሲ ናጋራንቸታ ጋሶን ሳሎን ጌታ ኡፋይሲ ጊዳስ።

8 «ዎይኮ ታሙ ቢሪ ዳዒያ ኢሲ ማጫሲያ ታማፌ ኢሲያ ጳዩኮ ዳማና ጋካናው ያምፔ ኦይላዳ ኬላ ፒታዳ ሚንላ ኮዮናራ ኦኔ?

9 ዳሚዳ ዎዳ ባ ላጌታኔ ባ ሾርታ ፃጋዳ «ጳዩዳ ታ ኢሲ ቢራ ዳሚዳ ጊሾ ታራ ኡፋይቲቲ» ያጋዉሱ።

10 ሲዒቲ፣ ሃሳ ሜላ ኢሲ ማርቲላን ጌሊያ ናጋራንቸታን ያሳ ኪታንቸታ ሲንላን ኡፋይሲ ጊዳስ» ያገሰ።

## ጳዩዳ ናባ

11 ዛሪዲ ዬሱሲ፣ «ኢሲ ኡራስ ናምዑ ናይቲ ዳዎሶና።

12 ኤንታፌ ካሎ ናዓይ ባ ኣዋኮ፣ «ታ ኣዋው፣ ኔ ሻሉዋፔ ታ ጊሹዋ ታው ኢማ» ያገሰ። ኣዋይ ባ ሻሉዋ ባ ናይታሰ ሻኪስ።

13 ጉላ ጋላሳፔ ጉዬ ካሎ ናዓይ ባ ጊሹዋ ኡባ ቃቺ ኤኪዲ ሃሆ ቢታ ቢስ። ያን ኣልታጫን ሻሉዋ ቶቺዲ ኦንጊስ።

14 ኢ ባው ዳዒያባ ኡባ ዉርሲዳፔ ጉዬ ሄ ቢታ ኡባን ሚኖ ኮሺ ኬዩን ሚቶቲስ።

15 ሄሳ ጊሾ፣ ሄ ቢታ ኣሳፔ ኢሱዋ ሶ ጋታ ጌሊሰ። ኡራይ ኢያ ጉዲንሶ ሄማና ማላ ባ ሞላ ዬዲሰ።

16 ጉዲንሶቲ ሚያ ሃርቁዋፌ ማናው ኣሞቲሰ፣ ሺን ኢዮካ ኢያው ኢሚያ ኣሲ ቤንቲቤና።

17 ዋዛኒ ሰሚን፣ ሳፑን ታ ኣዋ ኣይሌታሰ ካሊ ዋራ ዋዲን ታ ሃይሳን ኮሻራ ሃይቃናው ጋካዲና?

18 ዴንዳዳ ታ ኣዋኮ ባዳ፣ ታ ኣዋው፣ ሳሎን ምሳ፣ ሳዓን ኔና ቆሃሰ።

19 ሂዛፔ ኔ ናዓ ጌቲታዳ ፃጌታናው ታው ቤሶና ጊሾ ኔ ሶን ዴዓያ ኣይሌታፔ ኢሱዋዳ ታና ፓይዳ» ያጊሰ።

20 ሄሳ ጊሾ፣ ዴንዲዲ ባ ኣዋኮ ቢሰ። «ሃኖሺን፣ ኢ ቡር ሃሆን ዴዒሺን ኣዋይ ቃዴቲዲ፣ ኢያኮ ዋዒ ቢዲ ኢዲሚዲ ዬሪሰ።

21 ናዓይካ፣ ታ ኣዋው ሳሎን ምሳ፣ ሳዓን ኔና ታ ቆሃሰ። ሂዛፔ ኔ ናዓ ጌቲታዳ ፃጌታናው ቤሲኬ» ያጊሰ።

22 «ኢያ ኣዋይ ኣይሌታ ፃጊዲ፣ ሎሌሲዲ ኡባፌ ሎጋ ጊዲዳ ማጋ ኤሂዲ ኢያ ማይዚቲ፤ ኢያ ቢራዴን ሳጋዮ፣ ኢያ ቶሁዋን ጫማ ኣሳፔ።

23 ሞዶ ጋታርሜንሶ ኤሂዲ ሹኪቲ፣ ሞሰ፣ ኡፋይቶሰ።

24 ታ ናዓይ ሃይሲ ሃይቁሰ፣ ሺን ሃዒ ፓዒሰ፤ ዳይሰ፣ ሺን ቤንቲሰ» ያጊሰ። ሄሳፌ ጉዬ፣ ኡፋይቲሊ ኦይኪደሶና።

25 «ሄ ዋዴ ባይራ ናዓይ ሳሻ ጋዴን ዴዔሰ። ያፔ ዪሼ ሶ ማቲሺን ዬሊ ኔ ጉፋ ጊርሲ ሲዒሰ።

26 ኢ፣ ኣይሌታፔ ኢሱዋ ፃጊዲ ሃኒያባይ ኣይቤኮ ኤራናው ኦይቺሰ።

27 ኣይሌይ፣ ሳ ኢሻይ ሳር ዪዳ ጊሾ ኔ ኣዋይ ሞዶ ጋታርሜንሶ ኢያው ሹኪሰ» ያጊሰ።

28 «ባይራ ኢሻይ ዪሎቲዲ ሶ ጌላናዉካ ኮዪቤና። ኣዋይ ካሬ ከዪዲ ሶ ጌላና ሚላ ኢያ ዋሲሰ።

29 ሺን ኢ ባ ኣዋኮ፣ ሳካ፣ ሃይሳ ሚላ ላይሊ ታ ኔው ኣይሌታዳ ኔ ከታፔ ኢሱዋካ ፓጪሶና ኔው ከቲቲን ታ ታ ላጌታራ ኡፋይታና ሚላ ሃሪ ኣቶሺን ኢሲ ላቃ ዴሼ ኢማባካ።

30 ሃኖሺን፣ ሃይሲ ኔ ናዓይ ኔ ሻሉዋ ላይማታራ ደሚሲዲ ዪን ሞዶ ጋታርሜንሶ ሹካዳሳ) » ያጊሰ።

31 «ኣዋይካ፣ ታ ናዓው፣ ኔኒ ኡባ ዋዴ ታራ ዴዓሳ፣ ታባይ ኡባይ ኔሳ።

32 ሃይሲ ኔ ኢሻይ ሃይቁሰ፣ ሺን ፓዒሰ፤ ዳይሰ፣ ሺን ቤንቲሰ። ሄሳ ጊሾ፣ ዳር ኡፋይታናው ቤሴሰ» ያጊሰ።

# 16

## አማኔቶና ሹማ ለሚሶ

1 ዬሱሲ ባ ታማሪታኮ፡ «ኢሲ ዱሬ ኡራስ ኢያፔ ጋርሳራ ኢሲ ሹማይ ዳዔስ። ሄ ሹማይ ባ ጎዳ ሻሉዋ ቶቼስ ያገያ ዋሬይ ኬላዋ ጋኪስ።

2 ኬላዋይ ሹማ ያገሲዲ፡ ታኒ ዋይገያባ ሲዳዲና? ሂዛፔ ኔኒ ታ ኬላስ ሹማ ገዳዳ ኦላናው ዳንዳዖና ገሾ ታ ሻሉዋ ታው ሹቆ) ያገሲ።

3 «ሄ ሹማይካ ባ ዋዛናን ሃይሳዳ ያገዲ ቆፒስ። ታ ጎዳይ ታና ሹማቴላፌ ዋላና ሃኔስ፡ ጎያ ኣቃናው ዋልቂ ባዋ፡ ዋሳ ማናው ዬላዬስ፤ ያቴን ታ ዋና?

4 ሹማቴላፌ ታ ዋጂያ ዋዴ ኣሳይ ታና ሞካና ሚላ ኦላናባ ታ ኤራይስ) ያገሲ።

5 «ሄሳ ገሾ፡ ኢያ ጎዳ ኣጮይ ዳዔያ ኣሳ ኢሱዋ ኢሱዋ ያገ ኤሂዲ ኮይሮ ኡራኮ፡ ኔ ቦላ ታ ጎዳ ኣጮይ ኣይ ሚሊ ዳዒ?» ያገዲ ኦይቹስ።

6 «ኢ፡ (ላታሙ ባርሚሌ ዛይቴ ኣጮይ ዳዔስ) ያገሲ።

«ሹማይ፡ (ዉሌ ዋርቃቴያ ሄዔ፡ ኤሌሳዳ፡ ታሙ ባርሚሌ ዛይቴ ኣጮይ ዳዔስ ጋዳ 94) ያገሲ።

7 «ሄሳፌ ካሊዲ ናሞዓንሉዋኮ፡ (ኔው ኣፑኒ ዳዒ?) ያገሲ።

«ኢ፡ (370 ኩንታሌ ገስቴ ኣጮይ ዳዔስ) ያገሲ።

«ሹማይ፡ (ኔ ዉሌ ዋርቃቴያ ሄዔ፡ ኤሌሳዳ፡ 296 ኩንታሌ ያጋዳ 94) ያገሲ።

8 ኬላዋይ አማኔቲቦና ሹማ ኢያ ቢላማቴላስ ናሺስ። ሃ ኣላሚያ ናይቲ ኣሴ ኦይላን ፖዖ ናይታፔ ኣጂዳ ዋዛናማታ።

9 «ሄሳ ገሾ፡ ታ ሂንቴው ኦዳይስ፤ ሃ ኣላሚያ ሚሹይ ዉሪያ ዋዴ ሚሪና ኬላን ሞኬታና ሚላ ሃ ሚሹያራ ሂንቴው ላኔታ ሻሚቴ።

10 ኡባፌ ጉላባን አማኔቲዳይ ዳርባን አማኔቲዳይሳ ገዳስ። ቃሲ ኡባፌ ጉላባን አማኔቶናይሲ ዳርባን አማኔቲና።

11 ሂዛ፡ ሃ ኣላሚያ ሚሹን ሂንቴ አማኔቶና ኢዲኮ ቱማ ሚሹ ሂንቴው ኦኒ ሃዳራ ኢማኔ?

12 ሂንቴ ሃራ ኣሳ ሚሹን አማኔቶና ኢዲኮ፡ ሂንቴ ቡዘ ሚሹ ሂንቴው ኦኒ ኢማኔ?

13 «ኢሲ አይሌይ ናሞው ጎዳታስ ሃሬታናው ዳንዳዔና። ኢሱዋ ኢዲኮ ሃንኩዋ ደሴስ ዋይኮ ኢሱዋኮ ሸቁኮ ሃንኩዋ ካጴስ። ሃሳዳካ፣ ሂንቴ ያሳሲኔ ሚሽስ ሃሬታናው ዳንዳዔኬታ።»

14 ሚሽ ደሴያ ፋሪሳዌቲ ሃሳ ሲዒዳ ዋዴ ዬሱሳ ቁልቁሲደሶና።

15 ኢ፣ «ሂንቴ ሂንቴና ኣሳ ሲንሳን ዓሊሴታ፣ ሺን ያሳይ ሂንቴ ዋዛና ኤሬስ። ኣሳ ሲንሳን ቦንቲዳይሲ ያሳ ሲንሳን ቦሬቲዳይሳ።

16 «ሙሴ ሂጌይኔ ናቤታ ከታይ ዮሃኒሳ ጋካናው ሂንቴው ኦዴቲሽ ጋምዒስ። ሃሳፌ ጉዬ፣ ያሳ ካዎቲላ ዋንጌላይ ሳባኬቲሽ ጋምዒስ። ኢሲ ኡባይ ያ ጌላናው ዳፌቲስ።

17 ጊደሺን፣ ሂጊያፌ ኢሲ ላፋ ፒዳሌይ ኣታናፔ ሳሎይኔ ሳዓይ ኣጴይሲ ካዉዬስ።

18 «ባ ማቺው ዬዲዲ ሃራ ኤኪያ ኡባይ ላሜስ። ባ ኣዚናፔ ኣንጃቲዳሮ ኤኬይሲካ ላሜስ» ያጊስ።

**ዱሬ ኡራ ኣላዛሪ**

19 «ኣልዖኔ ኣሌቆ ኣፊላ ማዒያ፣ ሳዒ ኢንጃቲን ጋላስ ጋላስ ኡፋይሳን ዴዒያ ኢሲ ዱሬ ኣሲ ዴዒስ።

20 ሃሪ ቃሲ ኣሳቲላይ ኩሜሊ ማዲንዲዳ ኢሲ ኣላዛሪ ጌቲቲያ ማንቆይ ሂ ዱሬ ኡራ ካሬን ዬጌቲዲ ኣቲዳይሲ ዴዒስ።

21 ኮሻፔ ዴንደይሳን ዱሬ ኡራ ጋይታፔ ዋጲያ ቲፊያ ማናው ኣሞቲሽ ዴዒስ። ሃሪ ኣቶሺን፣ ካናቲ ዬዲ ኢያ ማዲንላ ላጮሶና።

22 «ሂ ማንቆይ ሃይቁስ፤ ከታንቸቲ ኢያ ኣብራሃሜ ከዑዋ ኤፊደሶና። ቃሲ ዱሬ ኡራይካ ሃይቁዲ ሞጌቲስ።

23 ሲዖሌን ኡንዔቲዲ ዴዒሽ ቶቁ ጊዲ ሃሆን ኣብራሃሜኔ ኢያ ከዖን ዴዒያ ኣላዛሪ ቤዒስ።

24 ኢ፣ ሳዋው ኣብራሃሜ፣ ታው ቃጴታርኪ፤ ሃ ላጮ ታማን ኡንዔታዳ ዴዒያ ጊሾ ኣላዛሪ ባ ቢራጲያ ሃላን ዬዲዲ ታ ኢንፃርሳ ላኮላና ሜላ ሃያና ኢያ ዬዳርኪ) ያጊዲ ዋሲስ።

25 «ሺን ኣብራሃሜይ ኢያኮ፣ ታ ናዓው፣ ኔ ሳዓን ዴዒያ ዋዴ ሎዖታ ኤኪዳይሳ፣ ቃሲ ኣላዛሪ ኢታባታ ኤኪዳይሳ ኣኬካ። ሺን ሃዒ ኢ ሃይሳን ኡፋይቲስ፣ ቃሲ ኔኒ ዋዬታሽ ዴዒሳ) ያጊስ።

26 ሃ ኡባፌ ኣጲዲ፣ ሳሃፔ ሂንቴኮ፣ ሂኒፔ ሃ ኑኮ ኣጳናው ኮዬይሳቲ ፒኖና ሜላ ኑሲኔ ሂንቴስ ጊደን ጊታ ኣፎይ ዴዒስ) ያጊስ።

---

16:13 ማቶ 6:24    16:16 ማቶ 11:12-13    16:17 ማቶ 5:18    16:18 ማቶ 5:32፤ 1ቆሮ 7:10-11

27 «ዱሬ ኡራይ፣ ሳዋው፣ ያኮ አላዛራ ታ አዋ ሶ ኪታና ማላ ታ ኔና ዋሳይሰ።

28 ታው ኢቻሹ ኢሻቲ ዳዒደሶና፣ ኤንቲካ ሃ ዋዬ ቤሳ ዮና ማላ ኤንታው ቢዲ ማርካቶ» ያገለገሉ።

29 «ሺን አብራሃማይ፣ ሳዊንታው ሙሴራኔ ናቤታራ ዳዎሶና፣ ኤንቲ ኦዲያባ ሲዎና» ያገለገሉ።

30 «ዱሬ ኡራይ፣ ሳዋው አብራሃማ፣ ሄሳሶ ገዳና፣ ኢሲ አሲ ሃይቆፕ ዳንዲዲ ቢኮ ኤንቲ ማርታን ጌላና» ያገለገሉ።

31 «አብራሃማይ፣ ሙሴኔ ናቤታ ሲዎና ኢዲኮ፣ ሃሪ አቶሺን ሃይቆፕ ኢሲ አሲ ዳንዲ ኦዲኮካ አማኖኮና» ያገለገሉ።»

# 17

## እይሺሲያ አዋቴላ

1 ዬሱሲ ባ ታማሬታኮ፣ «አሴ ቆቤላዲ ናጋራን ጌልሲያባይ ዮና አጌና። ገደሺን፣ ናጋራን ጌላና ማላ ኦሊያ ኡራ አዬ» ያገለገሉ።

2 ሄ ኡራይ ካሎታፕ ኢሱዋ ባሌላናፕ ዋፃ ባ ቆዴን ቃቺዲ አባን ወሊኮ ኢያው ሎዎ።

3 ሄሳ ገሾ ናጌቲቴ።

«ኔ ኢሻይ ናጋራ ኦሊኮ ሃንቄታ፣ ቂርቲዲ ማርቴላን ሲሚኮ፣ ኢያው አቶ ያጋ።

4 ኢሲ ጋላሳን ላፑን ቶሆ ቆሃዲ፣ ላፑን ቶሆ፣ ሳቲ ታ ባላ ኤራሰ ታና ማራ» ያገለገሉ ኔኮ ዩኮ ኢያው አቶ ጋ።»

5 ሃዋሬቲ ጎዳኮ፣ «አማኖ ኑስ ጉጃርኪ» ያገለገሉ።

6 ጎዳይ፣ «ጋሼ አይፌ ማላ አማኖይ ሂንቲው ዳዒኮ ሳይሳ ዋላ ሸዳታዳ አባ ገደን ቶኬታ» ያገለገሉ ሂንቲው ከቲታና» ያገለገሉ።

7 ጉጃዲካ ዬሱሲ፣ «ሂንቲ ገደፌ ኢሱዋሰ ጎሻንቸይ ዋይኮ ደርሴ ሄሚያ አይሌይ ዳዒኮ ኦሶ ጋዴፕ ዋይኮ ወዴፕ ሶ ሲሚያ ዋዴ ሳሌ ሃያዳ ካሊ ማናው ኡታ» ያገለገሉ ዳዒ።

8 ዳና፣ ሳታው ካሆ ገገሳ፣ ታኒ ማዳ፣ ኡያዳ አጋና ጋካናው ኤቃዳ ሙዛ። ሄሳፌ ጉዬ፣ ኔኒ ቃሲ ማሳኔ ኡያሳ» ያገለገሉ።

9 ሃዛ፣ ጎዳይ፣ አይሌይ ከታ ፖሊዳ ገሾ አንጂዬ?

10 ሄሳ ገሾ፣ ሂንቲካ ከቲቶይሳ ኡባ ፖሊዳ ዋዴ ሳታ ፓላና አይሌታ፣ ኦላናው ቤሲያ ኦሱዋ ፖሊዳ» ያገለገሉ።

ባር ሃርገያፌ ጌዩዳ ታሙ አሳታ

- 11 ዩሱሲ ዩሩሳሌም ቢሼ ሳማሪኤ ጋሊላ ቢታስ ጊዶራ ካንሲ ዳኒኤል።
- 12 ኢሲ ጉታ ጌሊያ ዋዴ ባሮ ሃርጌን ኦይኬቲዳ ታሙ አሳቲ ኢያ ዳሚዶሶና። ኢንቲካ ሃሆን ኤቁዲ፤
- 13 «ጎዳ ዩሱሳ፣ ኩስ ቃዴታርኪ» ያጊዲ ዋሲዶሶና።
- 14 ኢ ኢንታ ቤዒዳ ዋዴ «ቢዲ ሂንቴናቴላ አይሁዴ ካሂኔ ቤሲቴ» ያጊሰ። ኢንቲ ኦጊያ ቦላ ቢሼ ፓዲዶሶና።
- 15 ኢንታፌ ኢሶይ ባ ፓፀዋ ቤዒዳ ዋዴ ጶቁ ጊዳ ቃላን ያሳ ቦንቸሼ ዩሱሳኮ ሲሚሰ።
- 16 ኢ ሳማሪ ቢታ አሲ፣ ሺን ዩሱሳ ቶሁዋ ቦላ ጉፋኒዲ ኢያ ጋላቲሰ።
- 17 ዩሱሲ፣ «ፓዲዳይ ታሙ አሳታ ጊዶኮናዬ? ያቲን፣ ኡዱፋናቲ አው ቢዶና?
- 18 ሃ አላጋ ኡራፔ \* አቲን ሃሪ ሲሚዲ ያሳ ጋላቲይ ዳና ጉሴዬ?» ያጊዲ አይቸሰ።
- 19 ኡራኮ፣ «ኔ አማናይ ኔና ፓሊሰ፤ ዳንዳዳ ባ» ያጊሰ።

የሳ ካዎቴላ ዩሳ  
(ማቶ 24:23-28፣ 37-41)

- 20 ፋሪሳዊቲ፣ «የሳ ካዎቴላይ አዉዴ ያኔ?» ጊዲ ዩሱሳ አይቸዶሶና። ኢ፣ «የሳ ካዎቴላይ ቤንቲያ ማላን ዩና።
- 21 ቃሲካ ኢዮ፣ «ሃኒና ዋይኮ ሂኒና ያጋናው ዳንዳዔና። አይሰ ጊኮ፣ ያሳ ካዎቴላይ ሂንቴ ጊዶን ዳዔሰ» ያጊዲ ዛሪሰ።
- 22 ዩሱሲ ባ ታማራታኮ፣ «አሳ ናዓ ጋላሳታፔ ኢሱዋ ቤዓናው ሂንቴ አዎቲያ ዋዴይ ያና፣ ሺን ሂንቴ ቤዔኬታ።
- 23 አሳይ፣ «ኢ ያን ዳዔሰ» ዋይኮ፣ «ሃይሳን ዳዔሰ» ያጋና፣ ሺን ኢንታና ካሊዲ ቦፒቴ።
- 24 ዋልዓንሳ ዋልዓሚዲ ሳሉዋ ጋፃፔ ጋፃ ፖዒሲያ ሜላ አሳ ናዓ ዩሳ ጋላሳይ ሄሳዳ ሃናና።
- 25 ሺን ሄሲ ሃናናፔ ሲንሐ አሳ ናዓይ ዳሮ ዋያናዉኔ ሃ ዩሌቴላን ኢዳታናው ቤሴሰ።
- 26 ሮሂ ዋዴ ሃኒዳይሳ ሜላ አሳ ናዓ ዋዲያንካ ሄሳዳ ሃናና።
- 27 ሮሂይ ማርካቢያን ጌሊዳ ቃማ ጋካናው አሳይ ሚሼኔ ኡዱሼ፣ ኤኪሼኔ ጌሊሼ ዳዒሺን ዳዮ ሃላይ ዩዲ ኡባ ዳይሲሰ።

---

17:14 ለዋ 14:1-32 \* 17:18 ሃ አላጋ ኡራፔ፣ ባሮ ሃርጌፌ ፓዲዳ ኡራይ አላጋ ጌቲዳይ ኢ አይሁዴ ጊዶና ጊሾሳ። 17:26 ሜዴ 6:5-8 17:27 ሜዴ 7:6-24



28 ሎጼ ላይላንካ ሄሳዶ ሃኒሰ። አሳይ ሚሸኔ ኡዪሸ። ሻሚሸኔ ባይዚሸ። ቶኪሸኔ ከጊሸ። ጋምዒዶሶና።

29 ሎጼይ ሶዶሚፔ ኬዪዳ ጋላሰ ዲኔ ጌቴቴያ ፀ-ጊያባይ ሳሎፔ ቡኪዲ ኡባ ጳይሲሰ።

30 አሳ ናዒይ ቆንጪያ ዎዴካ ሄሳዳ ሃናና።

31 «ሄ ጋላሳን ኦኒካ ካሬን ዴዔይ ኬላ ጊዶን ዴዒያባ ኤካናው ሶ ጌሎፖ። ሄሳዳካ፣ ጋዴን ዴዒያ አሲ አይኮሰካ ሶ ሲሞፎ።

32 ሎጼ ማቸው አኬከቲ፤

33 ባ ሸምፕው አሻናው ኮያ አሲ ኦኒካ ጳይሳና፤ ባ ሸምፕው አላ ኢሚያ ኦኒካ ኢ አሻና።

34 ታ ሂንቴው ኦዳይሰ፤ ሄ ጋላሳን ናምፀ አሳቲ ኢሲ አርሳን ዚንዳና። ኢሶይ ኤኬታና፣ ሃንኮይ አታና።

35 ናምፀ ማጨሳቲ ዎላ ጋጨሽን ኢሲያ ኤኬታና፣ ሃንኪያ አታና።

36 ናምፀ አሳቲ ዎላ ጋዴን ጎዬይሳታፔ ኢሶይ ኤኬታና፣ ሃንኮይ አታና» † ያጊሰ።

37 ኤንቲ፣ «ጎዳው አው ኤኬታኔ?» ያጊዲ አይቺዶሶና።

ኢ፣ «ባወቲ ዴዒያ ቤሳን አንኮቲ ሸቆሶና» ያጊሰ።

# 18

## ሚኒዲ ዎሳና ሜላ ታማርሲሰ

1 ዬሱሲ ባ ታማሬታ አዛሎና ኡባ ዎዴ ዎሳና ሜላ ታማርሳናው ኮዪዲ ያጊዲ ለሚሶ ኦዲሰ።

2 «ኢሲ ካታማን ያሳሰ ያሸቶና አሳሰካ ዬላቶና ኢሲ ዳይኒ ዴዔሰ

3 ሄ ካታማን ኢሲ አምዒያ ዳዓወሱ። ኢያካ፣ ሳታወኔ ታ ሞርኪያሰ ጊዶን ዴዒያ ሞቱዎ ፒርዳ) ያጋዳ ኡባ ዎዴ ሄ ዳይናኮ ሲሚሬታወሱ።

4 ዳይናይ ጉላ ዎዴሰ ኢ ኦዳ ሲያና ኢጊሰ፣ ሸን ጉዬፔ ባ ዎዛናን፣ ሳታኒ ያሳሰ ያዮና፣ አሳሰ ዬላቶና ኢጊኮካ።

5 ሃ አምዒያ ታና ዎይሲያ ጊሾ ኢው ፒርዳና፤ ያቶና ኢጊኮ ኡባ ዎዴ ያዳ ታና ሳሌላና) ያጊዲ ቆፒሰ» ያጊሰ።

6 ጎዳይካ፣ «ጌላ ዳይናይ ጊዳይሳ ሲዒዴታ፤

---

17:28 ሜዴ 18:20-19:25      17:31 ማቶ 24:17-18፤ ማር 13:15-16  
17:32 ሜዴ 19:26      17:33 ማቶ 10:39፤ 16:25፤ ማር 8:35፤ ሉቃ 9:24፤ ዮሃ 12:25      † 17:36 ኢሲ ኢሲ ማፃፋታን ፓይዶ 36 ዳና።

7 ያሳይ ቃማኔ ጋላስ ኢያኮ ዋሲያ ባ ደሪዳይሳታስ ፐርዴኔዬ? ኤንታና ማዳናው ጋምቢዬ?

8 ታ ሂንቴው ኦዴይሳ ሰዒቲ፣ ኤሌሲዲ ፐርዳና። ገደሺን፣ ኣሳ ናዓይ ያ ዋዳ ሳዓ ቦላ ኣማኖ ዴማንዴሻ?» ያገሰ።

**ፋሪሳዊያኔ ቃራፃ ቃንዲሴይሳ**

9 ቃሲ ዛሪዲ፣ ዬሱሲ፣ ባንታና ዲሎ ኣሳዳ ኦሊዲ ጩቁቴይሳታሲኔ ሃራታ ካዴይሳታስ ሃይሳዳ ያገዲ ለሚሶ ኦዲሰ።

10 «ናምዑ ኣሳቲ ዋሳናው ያሳ ኬላ ቢደሶና። ኢሶይ ፋሪሳዊ ሃንኮይ ቃሲ ቃራፃ ቃንዲሴይሳ ኣሲ።

11 ፋሪሳዊይ ኤቁዲ ባው ዋሲሹ፣ «የሳው ታኒ ሃራታ ማላ ቦንቃንቸ፣ ጌላኔ ላይማቲያ ኣሲ፣ ኣዲዳ ቃሲ ሃ ቃራፃ ቃንዲሴይሳ ኡራ ማላ ገደና ገሽ ኔና ጋላታይሰ።

12 ሳሚንታፊ ናምዑ ቶሆ ያማይሰ፣ ታ ዴሚያባ ኡባፊ ኣሲራታ ኬሳይሰ» ያገሰ።

13 «ሺን ቃራፃ ቃንዲሴይሴ ቃሲ ሃሆን ኤቁዲ ሃሪ ኣቶሺን ሳሎ ዶቁ ገዲ ያላናወካ ያዩዲ ባ ቲራ ኢጨሽ «የሳው፣ ታና ናጋራንቸዋ ማራርኪ» ገዲ ዋሲሰ።

14 ታ ሂንቴው ኦዴይሳ ሰዒቲ፣ ፋሪሳዊያፔ ሃይሲ ቃራፃ ቃንዲሴይሴ ያሳ ሲንሳን ዲሎ ገዲዲ ባ ሶ ሰሚሰ። ኣይሰ ገኮ፣ ባና ዶቁ ዶቁ ኦሊያ ኣሲ ካወያና፣ ባና ካወሺያ ኣሲ ዶቁ ዶቁ ጋና» ያገሰ።

**ዬሱሳኔ ዮጋ ናይታ**

(ማቶ 19:13-30፤ ማር 10:13-31)

15 ዬሱሲ ዮጋ ናይታ ቦላ ባ ኩሺያ ዋሊዲ ኣንጃና ማላ ኣሳይ ኢያኮ ኤሆሶና። ዬሱሳ ታማሬቲ ሄሳ ቤዒዲ ኣይሰ ዬሱሳኮ ኤሄቲ ያገዲ ካጨደሶና።

16 ሺን ዬሱሲ ናይታ ባኮ ያገዲ፣ «ዮጋ ናይቲ ታኮ ያናይሳ ዲጎሬቲ፤ ዮ ገቲ። ኣይሰ ገኮ፣ ያሳ ካዋቴሳይ ኤንታዳ ሃኒዳይሳታሳ።

17 ታኒ ሂንቴው ቱማ ኦዳይሰ፤ ያሳ ካዋቴሳ ዮጋ ናይታላ ኤኮናይ ኦኒካ ያ ጌሌና» ያገሰ።

**ዲሬ ኡራ ኦይሻ**

(ማቶ 19:16-30፤ ማር 10:17-31)

18 አይሁዳ ሃላቃታፔ ኢሶይ፡ «ኬሃ አስታማሪያው፡ ሜሪና ዴዑቀ ዴማናው አይ ኦሉ?» ያጊዲ ኦይቸሰ።

19 ዬሱሲ ኢያኮ፡ «አይሰ ታና ኬሃው ያጋዳ ዪጋይ? ኢሲ ያሳፌ አቲን ሃሪ ኬሂ ባዋ።

20 ለሞፋ፡ ዎጵፓ፡ ካይሶቶፓ፡ ዎርዶ ማርካቶፋ፡ ኔ አዋኔ ኔ አዪው ቦንቻ ያጊያ ኪታ ኤራይ» ያጊዲ ኦይቸሰ።

21 ኡራይካ፡ «ሄሳታ ኡባ ታኒ ናዓቴላፌ ዶማዳ ናጋሼ ጋሞዓስ» ያጊሰ።

22 ዬሱሲ ሄሳ ሲዲዳ ዎዴ «ሂዛ፡ ኔው ኢሲባይ ፓጩስ፤ ኔው ዴዒያባ ኡባ ባይዛዳ ማንቆታስ ኢማ፤ ሳሎን ኔና ሻሎይ ናጌስ። ያታ ሲማዳ ታና ካላ» ያጊሰ።

23 ሺን ኡራይ ሄሳ ሲዲዳ ዎዴ ኢያው ዳሮ ሻሎይ ዴዒያ ጊሾ ዳሮ ቁሮቲሰ።

24 ዬሱሲ ኡራ ቤዲዲ፡ «ዱሬ አሳስ ያሳ ካዎቴላ ጌሎይ ዎኒዲ ኡንዓንዴሻ?

25 ዱሬይ ያሳ ካዎቴላ ጌላናይሳፌ ገማሌይ ናርፔ ለሆራ ካንጼይሲ ካወዬስ» ያጊሰ።

26 ሄሳ ሲዲዳ አሳይ፡ «ሄሳ ጊዲኮ ኦኒ አታኔ?» ያጊዶሶና።

27 ዬሱሲ፡ «አሳስ ዳንዳዔቶናባይ ያሳስ ዳንዳዔቴስ» ያጊሰ።

28 ጳዲሮሲ፡ «ሂኮ ኦኒ ኦባ ኡባ አጊዲ ኔና ካሊዳ» ያጊሰ።

29 «ዬሱሲ ቱማ ታ ሂንቴው ኦዳይስ፤ ያሳ ካዎቴላስ ጊዲ ባ ኬላ ዎይኮ ባ ማቸው ዎይኮ ባ ኢሻታ ዎይኮ ባ አዋኔ ባ አዪው ዎይኮ ባ ናይታ አጊዳይ፤

30 ሃ ዎዲያን ዳኮ ዳር፡ ያና አላሚያን ሜሪና ዴዑቀ ኤኮናይ ኦኒካ ባዋ» ያጊሰ።

**ዬሱሲ ባ ሃይቁዋባ ዛሪ ኦዲስ**  
(ማቶ 20:17-19፤ ማር 10:32-34)

31 ዬሱሲ ታማኔ ናምዓታ ባኮ ዪጊዲ፡ «አኔ ዬሩሳሌሜ ቦስ፡ ናቤቲ አሳ ናዓባ ያዕዳባ ኡባይ ያን ፖሌታና።

32 ኢ አይሁዳ ጊዶና አሳስ አጲዲ አሜታና። ኤንቲ ኢያ ቶቻና፡ ጩያናኔ ኢያ ቦላ ጩታና።

33 ኢያ ጋራፊዳፔ ጉዬ ዎጳና፡ ሺን ሄቫንሉ ጋላሳን ኢ ሃይቆፔ ዴንዳና» ያጊሰ።

34 ሺን ኢያ ታማሬቲ ሄሳ ኡባፌ ኢሲባካ አኬኪቦኮና። ኢያ ፀራይ ኤንታው ቆሴቲዳ ጊሾ ኢ ዎይጊዳኮ ኤሪቦኮና።

ቆቄ ኡራይ ያለሰ  
(ማጥ 20:29-34፤ ማር 10:46-52)

35 ዩሱሲ ኢየርሱ ማታቲያ ዋዴ ኢሲ ቆቄ ኡራይ ኦጌ ጋፃን ኡቲዲ ዋሴሰ።

36 ቆቄ ኡራይ አሳይ ሄ ቤሳራ አዲሽን ሲዒዲ፥ «ኢ አይቤ?» ጊዲ አይቺሰ።

37 ኤንቲ፥ «ናዚሬቴ ዩሱሲ ሃይሳራ አዴሰ» ያጊደሶና።

38 ኢ፥ «ዳዋቴ ናዓው፥ ዩሱሳ፥ ታና ማራርኪ» ያጊዲ ዋሲሰ።

39 ሲንጤ ሲንጤ ቢያ አሳቲ፥ «ሲዒ ጋ» ጊዲ ሃንቁቲደሶና። ሽን ኢ፥ «ዳዋቴ ናዓው፥ ታና ማራ» ያጊዲ ዳርሲ ዋሲሰ።

40 ዩሱሲ ኤቁዲ ኡራ ባኮ ኤሃና ሜላ ኪቲሰ። ኡራይካ፥ ኢያኮ ሸቁን።

41 «ታ ኔው አይ ኦላና ሜላ ኮያይ?» ያጊዲ ኦይቺሰ።

ቆቄይ፥ «ጎዳው ታ ያላናው ኮያይሰ» ያጊሰ።

42 ዩሱሲ፥ «ያ፥ ኔ አማኖይ ኔና ፓሊሰ» ያጊሰ።

43 ኡራይ ሶሁዋራ ያለ አጊሰ። ያሳ ቦንቺሽ ዩሱሳ ካሊሰ። አሳ ኡባይ ሄሳ ቤዒዲ ያሳ ጋላቲደሶና።

# 19

ቃራፃ ቃንዲሲያ ዛኪዮሳ

1 ዩሱሲ ኢየርሱ ጌሊዲ አዴሰ።

2 ያን ዛኪዮሳ ጌቴቲያ ቃራፃ ቃንዲሴይሳታ ሃላቃይ ዴዔሰ። ኢ ዳሮ ዲሬ።

3 ኢ ዩሱሲ ኦኔኮ ቤዓናው ኮዩሰ። ኢ ቃንጤ ጊዲያ ጊሾ አሳ ዳሮቴላሬ ዴንደይሳን ዩሱሳ ቤዓናው ዳንዳዒቤና።

4 ዩሱሳ ቤዓናው ኮዩዲ ኢ ቢያ ኦጊያሰ ሲንጤ ዋዲ ቢዲ ኢሲ ቦባ ሚላ ቦላ ኮዩሰ።

5 ዩሱሲ ሄ ቤሳ ጋኪሽ ጾቁ ጊዲ ቤዒዲ፥ «ዛኪዮሳ፥ ሃቺ ታ ኔ ሶን ፔዓናው ቤሲያ ጊሾ ኤሌ ዋዳ» ያጊሰ።

6 ኢ ኤሌሲ ዋዳዲ ኡፋይሳን ዩሱሳ ሞኪሰ።

7 ሄ ቤሳን ዴዒያ አሳ ኡባይ ሄሳ ቤዒዲ፥ «ናጋራንቺዋ ሶ ጌሊዲ ሞኬታጎው ሃኔሰ» ያጊዲ ዙዙሚደሶና።

8 ጊደሽን፥ ዛኪዮሲ ኤቁዲ ጎዳኮ፥ «ጎዳው፥ ሃኮ ታው ዴዒያ ሻሎ ኡባሬ ባጋ ማንቆታስ አማና። አሳፔ አይባካ ዋርደን ባሌላዳ ኤኪዳባ ጊዲኮ ኦይዲ ኩሽ ዛራና» ያጊሰ።

9 ዩሱሲ ቃሲ፥ «ሃ ኡራይ ኣብራሃሜ ናዓ ጊዲዳ ጊሾ ሃቺ አቶቴላይ ሃ ሶ ዩሰ።

10 አሳ ናዓይ ዩዳይ ቆዩዳይሳ ኮያናሳኔ አሻናሳ» ያገለገለ።

ታሙ ሚናኔታ ለሚሱዋ  
(ማቶ 25:14-30)

11 አሳይ ሄሳ ሲዒያ ዋዴ ዩሱሲ ዩሩሳላሚ ማታቲዳ ገሾኔ ያሳ ካዎቴላይ ሃዒ ማታራ ቆንጫና ዳኒዳ ገሾ ከንታው ለሚሱ ኦዲሰ።

12 ሄሳ ገሾ፣ ዩሱሲ፣ «ኢሲ ገታ አሲ ዳዔይሲ ባው ካዎቴላ ኤኪዲ ያናው ሃራ ቢታ ቢሰ።

13 ኢያው ኦሊያ አይሌታፔ ታማታ ጭዲ ኢሱዋሰ ኢሱዋሰ ታሙ ሚናኔ \* ኢሚዲ ሩታ ሲማዳ ያና ጋካናው ሃ ሚሺያራ ዛልዒቴ» ያገለገለ።

14 «ሄ ቢታ አሳይ ኢያ ኢጃያ ገሾ ሃ ኡራይ ኑ ቦላ ካዎታና ማላ ኑ ኮዮኮ ያገዲ አሴ ኢያ ጉዬራ ኪቲዶሰና።

15 «ገደሺን፣ ሄ ኡራይ ካዎ ገዲዲ ባ ቢታ ሲሚሰ። ሄ ታሙ አይሌቲ ኢ ኢሚዳ ሚሺያን አይ ማላ ዛልዒዲ ዋዲሲዳኮ ኡራናው ኮዩዲ ከንታና ጭሲሰ።

16 «ኮይሮይሲ ዩዲ፣ ሳዳው፣ ኔ ታው ኢሚዳ ሚሼይ ሃራ ታማ ዋዲሰ» ያገለገለ።

17 «ኢያ ጎዳይ፣ ሳኖ አማኔቲዳ አይሊያው ሎዎ ኦሳዳሳ። ኔኒ ጉላባን አማኔቲዳ ገሾ ኔው ታሙ ካታማታ ቦላ ማታ ኢማሰ» ያገለገለ።

18 «ናምዓንላይካ ዩዲ፣ ሳዳው፣ ኔ ታው ኢሚዳ ሚሼይ ሃራ ኢቻሻ ዋዲሰ» ያገለገለ።

19 «ጎዳይ ኢያኮ፣ ሳዔካ ቃሲ ኢቻሹ ካታማታ ቦላ ማታ ኢማሰ» ያገለገለ።

20 «ሄኮ ሄቫንላይ ዩዲ፣ ሳዳው፣ ታ ጨርቃን ፃፃዳ ናገዳ ኔ ሚሺያ ሃናሹ።

21 አይሰ ገኮ፣ ኔኒ ኔባ ገደናባ ኤኬይሳኔ ኔ ዜሮናባ ቡጨያ ኢታ አሲ ገዲያ ገሾ ኔው ያያሰ» ያገለገለ።

22 «ኢያ ጎዳይ ዛሪዲ፣ ሳኖ ኢታ አይሊያው ኔ ዶናታ ት ኔና ፒርዳና። ታ ዋሶናባ ኤኬይሳኔ ዜሮናባ ቡጨያ አሲ ገዳይሳ ኔ ኤሪኮ።

23 ታ ያዳ ታ ሚሺያ ዋዲራ ኤካና ማላ ዛልዒያ አሳሰ አይሰ ኢማቢኪ?»

---

19:10 ማቶ 18:10    19:11 ማቶ 25:14-30    \* 19:13 ሚናኔ፡ ሚናኔይ ገሪኬ ዶና። ኢሲ ሚናኔይ ኢሲ ጋላሳ ኦሳንቸሰ ሄቭ አጌና ዳሞዜ ገደሰ።

24 «ኢያ ጎዳይ ሄ ቤሳን ኤቂዳይሳታኮ፡ ለኢያራ ዳዒያ ሚሺያ ኤኪዲ ታማ ዎጂሲዳይሳሰ ኢሚቴ» ያገሰ።

25 «ኤንቲ፡ ሳዳው፡ ኢያው ካሴካ ታሙ ሚናኔይ ዳዔሰ» ያገደሶና።

26 «ጎዳይ፡ ታ ሂንቴው ኦዳይሰ፤ ለዳዒያ ኡባሰ ሃሪ ጉዠታና፡ ሺን ባይናይሳፌ ሃራይ አቶ ኢያው ዳዒያራካ ኤኬታና።

27 ገደሺን፡ ታ ኤንታ ቦላ ካዎቶና ሜላ ኮዪዳይሳታ ሄ ታ ሞርኬታ ሃ ታ ሲንጤ ኤሂዲ ጎይሪቴ» ገሰ።

ዩሱሲ ገታ ቦንቾን ዩሩሳሌሜ ጌሊሰ

(ማቶ 21:1-11፤ ማር 11:1-11፤ ዮሃ 12:12-19)

28 ዩሱሲ ሄሳ ኦዲዳይሳፌ ጉዩ ኤንታፌ ሲንጤ አጂ ሃሙቲዲ ዩሩሳሌሜ ቢሰ።

29 ሻማሆ ዳሪያ ተ ቦላ ዳዒያ ቤቴፋጌኔ ቢታኒያ ማታቲዳ ዎዴ ባ ታማራታፔ ናሞዓታ ያገዲ ከቲሰ።

30 «ሂንቴ ሲንጻን ዳዒያ ጉታ ቤቴ፡ ሂንቴ ያ ጋኪያ ዎዴ ኦኒካ ቶጎና ቃሼቴዲ ዳዒያ ሃሪ ማሪ ዳማና። ኢያ ቢሊዲ ሃ ኤኪ ዪቴ።

31 ኦኒካ፡ ለይሰ ቢሌቲ?» ገዲ ኦይቹኮ፡ ሳዳይ ኢያ ኮዩሰ» ያገቴ» ያገሰ።

32 ከቴቲዳይሳቲ ቢዲ ኢ ገዳይሳዳ ሃኒን ቤዒደሶና።

33 ኤንቲ ሃሪ ማራ ቢሊሺን ጎዳቲ ቤዒዲ፡ «ሃሪ ማራ ኣይሰ ቢሌቲ?» ያገደሶና።

34 ኤንቲ ዛሪዲ፡ «ጎዳይ ኢያ ኮዩሰ» ያገደሶና።

35 ያፔ ሃሪ ማራ ዩሱሳኮ ኤሂደሶና። ባንታ ማዑዎ ሃሪ ማራ ዘኮን ዩገዲ ዩሱሳ ሃሪ ማራ ቦላ ኡቲሲደሶና።

36 አሳይካ ኢ ቢያ ኦጊያ ቦላ ባንታ ማዑዎ ሂጂደሶና።

37 ሻማሆ ዳሪያ ዱጌላ ዎጂሲያ ኦጊያኮ ማቲያ ዎዴ ታይቦን ኬሂ ዳሮ አሳይ ኤንቲ ቤዒዳ ማላሊሲያባን ኡፋይቲዲ ባንታ ቃላ ጶቁ ኦሊዲ።

38 «ጎዳ ሱንጻን ያ ካዎይ አንጃቲዳይሳ ሳሉዋን ሳሮይ

ኡባፌ ጶቃ ሳሉዋን ቦንቾይ ያሳሰ ገደ።» ያገዲ ያሳ ጋላቲደሶና።

19:26 ማቶ 13:12፤ ማር 4:25፤ ሉቃ 8:18      19:27 ማቶ 25:14-30  
† 19:29 ሻማሆ ዳሪያ፡ ሻማሆይ ዳሮ ደሊያ ዳሬ ጉሱ።      19:38 ማዘ 118:26

- 39 አሳ ጊደፌ ኢሲ ኢሲ ፋሪሳዊት ዩሱሳኮ፡ «አስታማሪያው፡ ኔ ታማሪታ ሃይዚቲ ጋዳ ሃንቄታ» ያጊደሰና።
- 40 ኢ ኤንታኮ፡ «ኤንቲ ሲዒ ጊኮ ሹቻቲ ዋሳና» ያጊሰ።
- 41 ዩሱሲ ዩሩሳላሜ ማቲሼ ካታማ ቤዒዲ ኢያው ዩኪሰ።
- 42 «ኔው ሳሮ ጊዳናይሳ ሃቺ ኔ ኤሪዳባ ጊዲያኮሺን፡ ሃዒ ኔ አይፊያፔ ጌሚሰ።
- 43 ኔ ሞርኬቲ ኔ ዩሹዋ ዲሪዲ ዲማ ዲማ ኦጊያሪ ኔና ቲቂዲ ኡንዔሌያ ዋዴይ ያና።
- 44 ኔና ኔ ዲርሳ ጋርሳን ዴዒያ ኔ ናይታ ቆይሳና። ኢሲ ኢሲ ሹቹ ዴንሌዲ ላላና፡ አይሰ ጊኮ ያሳይ ኔና አሻናው ያ ዋዲያ ኤሪባካ» ያጊዲ ኢው ዩኪሰ።
- 45 ሄሳፌ ጉዬ፡ ዩሱሲ ያሳ ኬሌ ጌሊዲ ዛልዔይሳታ ያፔ ጎዲሰ።
- 46 ቃሲ፡ « ታ ኬላይ ያሳ ዋሲያ ኬሌ ጊዳና፡ ጊዲ ፃፊቲሰ፡ ሺን ሃንቲ ታ ኬላ ፓንጋታ ጎንጎሎ ኦሊዳታ» ያጊሰ።
- 47 ጋላስ ጋላስ ያሳ ኬላን ታማርሴሰ። ካሂኔታ ሃላቃቲ፡ ሂጌ አስታማሪቲኔ ዴሪያ ጨማቲ ኢያ ዋቆናው ኦጌ ኮዮሶና።
- 48 ጊደሺን፡ አሳ ኡባይ ኢያ ቲማርቲያ ባንታ ዋዛና ዩጊዲ ሲዒያ ጊሾ ኤንታው ኦላናባይ ቆይሰ።

## 20

ዩሱሳ ማታይ አይሁዳታስ ኦይሾ ጊዲሰ  
(ማቶ 21:23-27፤ ማር 11:27-33)

- 1 ኢሲ ጋላስ ዩሱሲ ያሳ ኬላን አሳ ታማርሲሺኒኔ ዋንጌላ ማርካቲሺን፡ ካሂኔ ሃላቃቲ፡ ሂጌ አስታማሪቲኔ ዴሪያ ጨማቲ ኢሲፌ ኢያኮ ዩዲ፡
- 2 «ኔኒ ሃይሳታ አይቢ ማታን ኦሊያኮ ኩስ ኦዳ። ሃ ማታ ኔው አሚዳይ ኦኔ?» ያጊዲ ኦይቺደሶና።
- 3 ኢ ኤንታኮ፡ «ታካ ሃንቲና ኢሲባ ኦይቻና፡ አኔ ታው ዛሪቲ።
- 4 ፃማቂያ ዮሃኒሳ ጂንቃቲይ ያሳፊዬ አሳፔ?» ያጊሰ።
- 5 ኤንቲ ዋሊ ጊደን ያጊዲ ዘሬቲደሶና፡ «ያሳፊ ጊኮ ያቲን፡ አይሰ አማኒቤኬቲ?» ያጋና።
- 6 «አሳፔ ጊኮ፡ አሳ ኡባይ ዮሃኒሲ ናቤ ጊዴይሳ አማኒያ ጊሾ ኦና ሹቻን ጫዳና።»
- 7 ያኒያ ጊሾ፡ «አጧፔኮ ኦ ኤርኮ» ያጊዲ ዛሪደሶና።

8 ዩሱስ ዛሬዲ፡ «ሂዛ፡ ታካ ኣይ ማታን ሃይሳታ ኦሊያኮ ሂንቴው ኦዲኬ» ያገሰ።

ጎሻንቸታ ለሚሱዋ  
(ማቶ 21:33-46፤ ማር 12:1-12)

9 ሄሳፌ ጉዩ፡ ዩሱስ ያገሊዲ ሃ ለሚሱዋ ኣሳሰ ኦዲሰ፡ «ኣሲ ኣሲ ወይን ቶኪሰ። ጎሻንቸታሰ ኬራ ኢሚዲ ዳር ዋዴ ጋምዒዲ ያናው ሃራ ቢታ ቢሰ።

10 ወይን ኣይፊያ ማዲያ ዋዴይ ጋኪን ወይንያ ኣይፊያፔ ኢያው ዩዳና ማላ ጎሻንቸታኮ ባ ኣይሊያ ከቲሰ። ሺን ጎሻንቸቲ ሄ ኣይሊያ ኦይኪዲ ዋዲዲ ማላ ኩሼ ዩዲደሶና።

11 ካሊዲካ ሃራ ኣይሊያ ከቲሰ። ቃሲ ጎሻንቸቲ ኢያ ዋዲዲ፡ ካዉሺዲ ማላ ኩሼ ዩዲደሶና።

12 ሃዒካ ዛሬዲ ሄቫንሉ ኣይሊያ ከቲሰ። ጎሻንቸቲ ኢያካ ማዲንዲሲዲ ወይንያ ገደፌ ጋፃ ኬሲዲ ዩገደሶና።

13 «ወይንያ ጎዳይ፡ ሳቲን ታ ኣይ ኦሉ? ኣኔ ቃሲ ታ ደሲያ ታ ናዓ ዩዳና፤ ኦኒ ኤሪ ኤንቲ ኢያ ቦንቸና ኣጎኮና» ያገሰ።

14 «ሺን ጎሻንቸቲ ኡራ ናዓ ቤዒዳ ዋዴ ሳይሲ ኢያ ላቲይሳ፡ ሃ ዩቲ ኢያ ዋዲና፡ ያቲኮ ላታይ ኦሰ ገዳና» ያገሊዲ ዘሬቲደሶና።

15 ወይንያ ገደፌ ጋፃ ኬሲዲ ዋዲደሶና።

«ያቲን፡ ወይንያ ጎዳይ ሄ ኣሳታ ዋታኔ?»

16 ዩዲ ሄ ጎሻንቸታ ዳይሳና፡ ወይንያ ቤሳ ሃራ ኣሳታሰ ኢማና። ኣሳይ ሄሳ ሲዒዳ ዋዴ «ሺንቻሌ ሄሳ ማላባ ኤሆፖ» ያገደሶና።

17 ዩሱስ ኤንታ ጫዲ ያሊዲ፡

«ያቲን ሪምቤ ኬዲያ ኣሳቲ ቦሪዳ ሹቻይ፡

ኬላሰ ማላኔ ሚኖቴሲ ኢሚያ ኡባፌ ኣዲያ ሹቹ ገዲሰ»

ጌቲቲዲ ፃፊቲዳይሳ ቢርሼላይ ኣይቤ?»

18 ሄ ሹቻ ቦላ ኩንዲያ ኡባይ ቆፃታና፡ ሹቻይ ኢያ ቦላ ዋዲያ ኡባይ ሊቃና» ያገሰ።

19 ሂጌ ኣሰታማሬቲኔ ካሂኔ ሃላቃቲ ሃ ለሚሶይ ኦዴቲዳይ ኤንታ ቦላ ገዴይሳ ኤሪዲ ሄ ዋዴ ኢያ ኦይካናው ኮዩደሶና፡ ሺን ኣሳሰ ባቢደሶና።

ገራባ  
(ማቶ 22:15-22፤ ማር 12:13-17)



20 ሄሳ ጊሾ፡ ዩሱሳ ዳሪያ ሃሪያ ሮሜ ካወዋ ማታስ አሏ ኢየሱስ ከዩዲ ኢያ ደናፔ ባላ ቃላ ናጎሶና። ሄሳ ፖሊሳናው ዲሎ ዳኒዲ ጨሚያ አሳታ ኢያኮ ከተደሰና።

21 ከቴቲዲ ቢዳ አሳቲ፡ «አስታማሪያው፡ ነኒ ኦዴይሲኔ ታማርሴይሲ ሊኬ ጊዴይሳ፡ ቃሲ ያሳ ኦጊያ ቱማቴላን ታማርሴይሳኔ ኦናካ ቫኮናይሳ ኑ ኤርሰ።

22 ሃናሺን፡ ሮሜ ካወዋሰ ገራ ገራናው ቤሲ ቤሴኔ?» ያጊዲ ኢያ ኦይቺደሶና።

23 ሺን ኢ ኤንታ ዋዛና ኢታቴላ ኤሪዳ ጊሾ

24 «አኔ ታና ኢሲ ሳንቲሜ ቤሲቴ፡ ኢያ ቦላ ዳዲያ ሚሲሌይኔ ሱንሳይ ኦዳባዬ?» ያጊሰ።

ኢንቲ ዛሪዲ፡ «ሮሜ ካወዋ ቁሳሪይሳ» ያጊደሶና።

25 ኢ ዛሪዲ፡ «ያቲኮ፡ ቁሳሪይሳ ቁሳሪሰ፡ ያሳይሳ ያሳሰ ኢሚቴ» ያጊሰ።

26 ሄሳ ጊሾ፡ ኢ ዛሪዳ ዛሩዋን አሳ ሲንላን ባላ ዳማናው ዳንዳሲቦኮና። ኢያ ዛሩዋን ማላሌቲዲ ሲዒ ጊደሶና።

**ሃይቆፔ ዴንደባ**

(ማቶ 22:23-33፤ ማር 12:18-27)

27 ሃይቆፔ ዴንደይ ባዋ ያጊያ ሳዲቃዌታፔ ኢሶቲ ኢሶቲ ዩሱሳኮ ዩዲ፡

28 «አስታማሪያው፡ ኢሲ አሲ ማቾ ኤኪዲ ናዓ ዩሎና ሃይቁኮ፡ ኢያ ኢሻይ ሄ ማጫሲው ኤኪዲ ናይታ ዩሊዲ ባ ኢሻሰ ዜሬላ አሻና ሜላ ሙሴይ ፃፊሰ።

29 ሄኮ ላፑን ኢሻቲ ዳዖሶና። ኮይሮይሲ ማቾ ኤኪዲ ናዓ ዩሎና ሃይቁሰ።

30 ናሞዓንላይ ኢዮ ኤኪዲ ናዓ ዩሎና ሃይቁሰ።

31 ሄቫንላይካ ሄሳላ ሃኒሰ። ላፑናቲ ኡባይ ሄሳዳ ሃኒዲ ኢዮ ኤኪደሶና፡ ሺን ናዓ ዩሎና ሃይቁደሶና።

32 ዉርሴላን ማጫሲያ ሃይቃሱ።

33 ሂዛ፡ ላፑን አዳይ ኢዮ ኤኪዲ ጊሾ ሃይቆፔ ዴንዲያ ዋዴ ኢያ ኦዴ ማቾ ጊዳኔ?» ያጊዲ ኦይቺደሶና።

34 ዩሱሲ ዛሪዲ፡ «አሳይ ሃ ዋዲያን ኤኮሶናኔ ጌሎሶና።

35 ሺን ሃይቆፔ ዴንዲዲ ያና አላሚያን ዳናው ቤሴይሳቲ ኤኮኮናኔ ጌሎኮና።

36 ኤንጅት ከታንቸ ሜላ ጊዲያ ገሾ ሲንጻፈ ሃይቆኮና። ሃይቆፔ ዴንዲዳ ገሾ ኤንጅት ያሳ ናይታ።

37 ሙሴይ ጎዳ፣ ለአብራሃሜ ጎዳ፣ ዩሳቃ ጎዳ፣ ያይቆባ ጎዳ) ጊዲ ቱሺያ ጊዲን ፀጌቲያ ታማ ታሪኪያ ፃፊዳይሳን ሃይቂዳ አሳይ ዴንዴይሳ ቤሴሰ።

38 ኡባይ ኢያው ዴዎን ዴዔይሳታ ጊዲያ ገሾ ኢ ዴዎን ዴዔይሳታ ጎዳፔ አቲን ሃይቂዳይሳታ ጎዳ ጊዴና» ያጊዲ ዛሪሰ።

39 ሂጌ አስታማሬታፔ ኢሶቲ ኢሶቲ፣ «አስታማሬያው፣ ሎዎባ ኦዳዳሳ» ያጊደሶና።

40 ሄሳፌ ጉዬ፣ ሃራ ኦይሾ ኦይቻናው ያዩደሶና።

ኪሪሰቶሲ ኦዴ ናዔ

(ማቶ 22:41-46፤ ማር 12:35-37)

41 ኢያፔ ካሊዲ ዬሱሲ ኤንታኮ፣ «አሳይ ኪሪሰቶሳ ዋቲዲ ዳዊቲ ናዔ ያሳና?

42-43 አይስ ገኮ፣ ዳዊቲይ ባ ሁዔን ባ ማፃፋን፣

፣ፃሳይ ታ ጎዳኮ «ታ ኔ ሞርኬታ

ኔ ቶሆይ ዬዲያሶ አፋና ጋካናው

ታፔ ኡሻቻ ባጋን ኡታ» ገሰ) ያጊሰ።

44 «ሂዛ፣ ዳዊቲይ ኪሪሰቶሳ፣ ሳዳ ጊዲ ያጊሼ ኢያው ናዔ ዋኒዲ ጊዲ?» » ያጊሰ።

45 ዴሬይ ኡባይ ሲዒሺን ባ ታማሬታኮ፣

46 «አዲሳ ማዎ ማዒዲ ዩሼ ደሴይሳታፔ፣ ጊያን ቦንቸ ሳርፉ፣ አይሁዴ ዋሳ ኬፋን ቦንቸ ኦይዴ፣ ሞኬቲያ ሶንካ ቦንቸ ቤሲ ኮያ ሂጌ አስታማሬታፔ ናጌቲፔ።

47 ኤንጅት አምዔታ ኬሳ ካሎዮሶና፣ ያሎ አሲ ዳኒዲ ዋሳ አዲሶሶና። ኤንጅት ኢታ ፐርዳ ኤካና» ያጊሰ።

# 21

አምዔ ሙፃታ

(ማር 12:41-44)

1 ዱሬ አሳይ ያሳ ኬፋን ሙፃታ ሳዒኒያን ዩጊሺን ዬሱሲ ቶቁ ጊዲ አሳ ቤዒሰ።

2 ቃሲ ኢሲ ማንቆ አምዒያ ናምዑ ሲከና ዩጊሺን ቤዒዲ፣

3 «ታ ሂንቴው ቱማ ኦዳይሰ፤ ሃ ማንቆ አምዒያ ኡባፌ አፋዳ ኢማሱ።

4 አይስ ጊኮ፡ ሃ አሳ ኡባይ ባንታው ዴዲያባፔ ኢሚዶሶና፡ ሺን ኢያ ባ ፓጩያፔ፡ ባው ዴዲያ አቁዋ ኡባ ኢማሱ» ያጊሱ።

ወርሴላ ዋዲያ ማላታታ  
(ማቶ 24:3-14፤ ማር 13:3-23)

5 ዬሱሳ ታማሬታፔ ኢሶቲ ኢሶቲ ያሳ ኬላይ ዳሮ ሎዲያ ሹቻኒኔ አሳይ ያሳሰ ኢሚዳ ኢሞታን ሎዲዳይሳ ኦዴቶሶና።

6 ሺን ዬሱሱ፡ «ሃ ሂንቲ ቤዲያባይ ኡባይ ላሌቶና፡ ሹቺ ሹቻ ቦላ ጊምቤቲዳ ሜላ እቶና ዋዴይ ያና» ያጊሱ።

7 ኤንቲካ፡ «አስታማሪያው፡ ሃ ኡባይ ሃናይ ኣወዴ? ቃሲ ሃይሲ ሃናይሳሰ ማላታይ አይቤ?» ያጊዲ ኦይቺዶሶና።

8 ዬሱሱ ያጊዲ ኤንታው ዛሮ ኢሚሰ፡ «ባሌቶና ሜላ ናፔቲቲ። ዳሮቲ፡ ታኒ ኪሪሰቶሳ፡ ዋዴይ ማታቲሰ) ያጊሼ ታ ሱንላን ያና፡ ሺን ሂንቲ ኤንታ ካሎፊቲ።

9 ሂንቲ ኦላባኔ አሳ ጌላቴላ ሲዲያ ዋዴ ዳጋሞፊቲ። ሄሲ ሲንላቲዲ ሃናይሲ አቶናባ ጊዲያ ጊሾ ዋዲያ ወርሴላይ ኤሌሲዲ ዬና» ያጊሱ።

10 ካሊዲካ፡ «ዴሬይ ዴሪያ ቦላ፡ ካዋቴላይ ካዋቴላ ቦላ ዴንዳና።

11 ጊታ ቢታ ቃይይ ሃናና፡ ኮሻይኔ ጋዶይ ዲማ ዲማ ቤሳን ዳራና፡ ያሺያባይኔ ጊታ ማላታቲ ሳሎፔ ቆንጫና።

12 ሺን ሃ ኡባይ ሃናናፔ ሲንሌ ታ ሱንላ ጊሾ ጊዲ አሳይ ሂንቲና ጎዳናኔ ኦይካና። አይሁዴ ዋሳ ኬላኒኔ ቃሾ ኬላን ሂንቲና ዬጋና። ካዋታ ሲንሌኔ ዴሪያ ሃሬይሳታ ሲንሌ ሂንቲና ኤፋና።

13 ሄሲካ ታባ ሂንቲ ኤንታው ማርካታናው ሎዎ ኦጌ ጊዳና።

14 ሃሳ ጊሾ፡ ሂንቲ ኦይሹቲያ ዋዴ ዋይጊዲ ዛሮ ኢማኔ ጊዲ ሂንቲ ዋዛናን ኡንዔቶና ሜላ ኣኬኪቲ።

15 አይስ ጊኮ፡ ሂንቲ ሞርኬቲ ሂንቲራ ኤቁታናወኔ ፓላማናው ዳንዳባ ደናኔ ጨንጫቴሊ ታ ሂንቲው ኢማና።

16 ሃሪ አቶሺን፡ ሂንቲና ዬሊዳይሳቲ፡ ሂንቲ ኢሻቲ፡ ሂንቲ ዳቦቲኔ ላጌቲ ሂንቲና አሊ ኢማና። ሂንቲ ጊዶሬ ኢሶታ ኢሶታ ዋዳና።

17 ታ ሱንላ ጊሾ አሳ ኡባ ሲንላን ሂንቲ ኢፀቲዳይሳታ ጊዳና።

18 ሺን ሃሪ አቶሺን፡ ሂንቲ ቢናናፔ ኢሶይካ ጳዩና።

19 ፖሎ ዳንዳባን ሂንቲ፡ ሂንቲ ሺሞፑዋ አሻና።»

20 «ዬሩሳሌሜ ካታማይ ዋታዳሬን ዲሬቲዲ ኡቲዳሺን ሂንቲ ቤዒኮ ኢያው ጳዮይ ማታቲዳይሳ ኤሪቲ።

21 ሕ ዋዴ ዪሁዳን ዴዒያ ኡባይ ዴሪያኮ ባቃቶ፥ ካታማን ዴዒይሳቲ ያፔ ከዮ፥ ጋፃሪያን ዴዒይሳቲ ካታማ ጌሎፖ።

22 ኣይስ ጊኮ፥ ሃ ፃፊቲዳባይ ፖሌታና ሜላ ሄሲ ያሳይ ኩሼ ዛሪያ ዋዴ።

23 ሳዓ ቦላ ጊታ ሜቶይ ያና፥ ሄሳንካ ኣሳ ቦላ ያሳ ሃንቆይ ያና። ሄሳ ጊሾ፥ ቃንጻቲዳይሳታኔ ቆንጮይሳታ ኣይ።

24 ኤንቲ ማሻን ሃይቃና፥ ኣሳ ኡባይ ኣላጋ ቢታ ዲዒታና። ኣይሁዴ ጊዶና ኣሳ ዋዴይ ፖሌታና ጋካናው ዬሩሳላሜይ ኤንታናን ዬዴቲዳይሳ ጊዳና።

25 «ኣዋን፥ ኣጌናጌኔ፥ ያለንቶታ ቦላ ማላታቲ ሃኒዲ ቤንታና። ኣባፊኔ ዙሊያ ዴሹዋፔ ዴንዶይሳን ቢታን ዴዒያ ኣሳይ ኡንዒታናኔ ያርካና።

26 ሳሉዋ ዋልቃቲ ቡቄታና ጊሾ ኣሳይ ያሻጌኔ ቢታ ቦላ ኣይቢ ሃናንዴሻ ጊዲ ናጎን ባንታና ባሌታና።

27 ሕ ዋዴ ኣሳ ናዓይ ዋልቃኒኔ ጊታ ቦንቹዋን ሻራራ ዪሺን ኤንቲ ቤዓና።

28 ሂንቴ ኣቶቴላይ ማታቲዳ ጊሾ ሃ ሃናቲ ፖሌቲሊ ኦይኪያ ዋዴ ጊቤቲ ኤቁቲ፥ ሂንቴ ሁዒያ ቶቁ ኦሊዲ ያሊቲ» ያጊሱ።

29 ካሊዲካ፥ ሃይሳዳ ጊዲ ሌሚሶ ኦዲሱ፥ «ባላሴ ሚላኔ ሃራ ሚላታ ኡባ ቤዒቲ።

30 ኤንቲ ኣጪያ ዋዴ ቶርቼይ ማታቲዳይሳ ሂንቴ ኤሬታ።

31 ሄሳዳ ሃ ሃናቲ ፖሌቲሺን ሂንቴ ቤዒኮ ያሳ ካዋቴላይ ማታቲዳይሳ ኤሪቲ።

32 «ታ ሂንቴው ቲማ ኦዲይሱ፤ ሃ ኡባይ ፖሌታና ጋካናው ሃ ዬሌቴላይ ኣዴና።

33 ሳሎይኔ ሳዓይ ኣቆና፥ ሺን ታ ቃላይ ኣዴና።

34 «ሃዛ፥ ቆሲ ባይና ዴዖን፥ ኡሻ ዳርጌኔ ዴሳባሰ ኡንዒቲላን ሂንቴ ዋዛናይ ኦይኪቶና ሜላኔ ሄ ቃማይ ኣኬኮና ዒሄዳ ሂንቴ ቦላ ጋኮና ሜላ ናጌቲቲ።

35 ሕ ቃማይ ቢታ ኩሜላን ዴዒያ ኡባ ቦላ ጋካና።

36 ሄሳ ጊሾ፥ ያ ኢታፔ ኣታናዉኔ ኣሳ ናዓ ሲንላን ኤቃናው ዳንዳዓና ሜላ ኡባ ዋዴ ሚኒዲ ዋሲቲ» ያጊሱ።

37 ጋላሰ ጋላሰ ዬሱሲ ያሳ ኬላን ታማርሲሹ፥ ቃማ ቃማ ሻማሆ ዴሪያ ቦላ ኬዪዲ ኣቁሰ።

21:22 ሆሴ 9:7    21:25 ኣሳ 13:10፤ ሂዝ 32:7፤ ኤር 2:31፤ ዮ.ቆ 6:12  
21:27 ዳኔ 7:13፤ ዮ.ቆ 1:7    21:37 ሉቃ 19:47

38 አሳይ ኡባይ ኢያ ሲዳናው ዋንታ ጉራ ኢያኮ ያሳ ኬሌ ዮሶና።

# 22

ዪሁዲ ዬሱሳ አሌ ኢማናው ማቄቲስ

(ማቶ 26:1-5፣ 14፣ 16፤ ማር 14:1-2፣ 10-11፤ ዮሃ 11:45-53)

- 1 ሄ ዎዴ «ፋሲካ» ያጊያ ኡይላ ባሌይ ማቲስ።
- 2 ካሂኔ ሃላቃቲኔ ሂጌ አስታማሬቲ አሳስ ያዪዳ ገሾ ዋቲዲ ዬሱሳ ባንታ ገደፌ ቆይሳኔኮ ኦጌ ኮዮሶና።
- 3 ያላሂይ ታማኔ ናምዓታፔ ኢሱዋ ገዲዳ አስቆርታ ዪሁዲ ጌቲቲይሳ ገደ ጌሊስ።
- 4 ዪሁዲ ካሂኔ ሃላቃታኮኔ ያሳ ኬላ ናጌይሳታ ሃላቃታኮ ቢዲ ዬሱሳ ዋቲ አሌ ኢማኔኮ ኤንታራ ማቄቲስ።
- 5 ኤንቲካ ሃሳን ኡፋይቲዲ ሚሼ ኢማናው ኢያራ ዘሬቲዶሶና።
- 6 ኢካ ዘሬቲላን ገገሰ። አሌ ኤንታው ኢማናው አሲ ባይና ኢንጃ ዎዴ ናገሼ ዳዔስ።

ወርሴላ ካሁዋ

(ማቶ 26:17-25፤ ማር 14:12-21፤ ዮሃ 13:21-30)

- 7 ሃሳፌ ጉዬ፣ ፋሲካ ዶርሳይ ሹኬቲያ ኡይላ ባሌይ ጋኪስ።
- 8 ዬሱሱ፣ «ፋሲካ ካሁዋ ማና ማላ ቢዲ ኑስ ገገሲቲ» ያገዲ ጳዕርሳኔ ዮሃኒሳ ኪቲስ።
- 9 ኤንቲ፣ «ኑ አዉን ገገሳና ማላ ኔ ኮያይ» ያገዲ ኦይቺዶሶና።
- 10 ኢ ኤንታኮ፣ «ሃኮ ሂንቲ ካታማ ጌሊሺን ሃላ ኦቶ ቶኪዳ አዳይ ሂንቲራ ጋሂታና። ኢ ቢዲ ጌሊያ ኬላ ኢያ ካሊዲ ጌሊቲ።
- 11 ኬላዋኮ አስታማሬይ፣ ታ ታ ታማሬታራ ዋላ ፋሲካ ካሁዋ ማናው ኢማላ ኬሌ አዉኔ? ያገሰን ገቲ።
- 12 ኢ ፖቂያ ቦላ ሂፃቲዲ ገገዲ ዳዔያ ዳልጋ ኪፊሌ ሂንቲና ቤሳና፣ ያን ገገሲቲ» ያገሰ።
- 13 ኤንቲ ቢዲ ዬሱሱ ገዳይሳዳ ሃኒን ዳሚዶሶና። ፋሲካ ባሌ ካሁዋ ያን ገገሲዶሶና።
- 14 ሳቲይካ ጋኪዳ ዎዴ ዬሱሱ ሃዋሬታራ ዋላ ካሁዋ ቦላ ኡቲስ።
- 15 ኢ ኤንታኮ፣ «ታ ዋዬ ኤካናፔ ሲንፍ ሃ ካሁዋ ሂንቲራ ማናው ዳር አሞታስ።

16 ሂዛ፡ ሲዲቲ! ያሳ ካዎቴላን ሃይሳስ ቢርሼላይ ፖሌታና ጋካናው ሃ ካሁዋ ዛራዳ ሚኬ» ያገሰ።

17 ኡሻ ኤኪዲ ጋላቲ ሲሚዲ፡ «ሄዲቲ ሃይሳ ሂንቴ ገደን ሻኬቲቲ።

18 ሲዲቲ! ያሳ ካዎቴላይ ያና ጋካናው ሃቺፌ ደማዳ ሃ ዎይኔ ኡሻፌ ዛራዳ ኡዩኬ» ያገሰ።

19 ኡይላ ኤኪዲ፡ ጋላቲ ሲሚዲ፡ «ሃይሲ ሂንቴው እሜቲያ ታ አሹዋ። ሃይሳ ኦሊሼ ታና ቆፒቲ» ያገዲ ሜንሊዲ ኤንታው እሚሰ።

20 ሄሳዳካ፡ ካሁዋፕ ጉዬ ኡሻ ኤኪዲ፡ «ሃ ኡሻይ ሂንቴው ጉኪዳ ታ ሱላን ገዲያ ኦራላ ጫቁዋ።

21 ገደሺን፡ ታና ኦሊ እማና ኡራ ኩሼይ ታራ ኢሲፌ ጋይታና።

22 አሳ ናዓይ ኢያው ጌቴቶይሳ ሜላ ሃይቃናው ዴዔስ፡ ሺን ኢያ ኦሊ ኡሚያ ኡራ ኦዬ» ያገሰ።

23 ኤንቲ ባንታ ገደን፡ «ሃይሳ ኦኒ ኦላኔ» ገዲ ዋሊ ኦይቺደሶና።

24 ቃሲ ኤንታ ገደን ገታ ገዳናይ ኦኒ ገያ ፓላሚ ሜዴቲስ።

25 ዬሱሲ ኤንታኩ፡ «ዴሪያ ካዎቲ ባንታ አሳ ዎልቃን ሃርሶና፤ ባንታ ዴሪያ ቦላ ጎዳቴይሳታሰካ ባንታና፡ ሎ? ኦሊይሳታ) ያገዲ ያጎሶና።

26 ሺን ሂንቴ ገደን ሄሳ ሜላ ገደፖ። ሂንቴ ገደን ባይራቴይ ካሎዳ ሃኖ፤ ካሌሌይሲ ካሌይሳዳ ሃኖ።

27 ሃኖሺን፡ ሞኬይሳፌኔ ሞኬቴይሳፌ ኣዉሲ ኣዲ? ሞኬቴይሳ ገዴኔዬ? ሺን ታኒ ሂንቴ ገደን ሞኬይሳ ሜላ።

28 «ሂንቴካ ታ ሜቴዋን ታፔ ሻኬቶና ታራ ሚኒዲ ኤቁዳይሳታ።

29-30 ሂንቴ ታ ጋይታፔ ማና ሜላ፡ ኡያና ሜላኔ ኣራታታ ቦላ ኡቲዲ ታማኔ ናሞዑ ኢሰራዔሌ ሼሻታ ቦላ ፒርዳና ሜላ ታ አዋይ ታና ሹሚዳይሳዳ ታካ ሂንቴና ታ ካዎቴላን ሹማና» ያገሰ።

31 ካሊዲካ ዬሱሲ፡ «ሲሞና፡ ሲሞና፡ ያላሄይ ሂንቴና ገሰቴዳ ሃርቃናው ዎሲሰ።

---

22:20 ኤር 31:31    22:21 ማዝ 41:9    22:24 ማቶ 18:1፤ ማር 9:34፤ ሉቃ 9:46    22:25 ማቶ 20:25-27፤ ማር 10:42-44    22:26 ማቶ 23:11፤ ማር 9:35    22:27 ዮ.ቆ 13:12    22:29-30 ማቶ 19:28

32 ሺን ታኒ ኔ አማኖይ ጳዮና ሜላ ኔው ጋናታስ። ኔካ ሲሚዳ ዋዴ ኔ አሻታ ሚንላ» ያገሰ።

33 ሲሞኒ፥ «ጎዳው፥ ታኒ ኔራ ቃሼታናውኔ ሃይቃናው ጊኔታስ» ያገሰ።

34 ዩሱሲ ጳደርሳኮ፥ «ታ ኔው ኦዳይስ፤ ሃቺ ኩቶይ ዋሳናፔ ሲንጤ ኔ ታና ሄሽ ቶሆ ካዳና» ያገሰ።

35 ካሊዲካ፥ ዩሱሲ ኤንታኮ፥ «ታኒ ሂንቴና ኮርጅይ፥ ካርዲቲይኔ ጫሚ ባይና ከቲዳ ዋዴ ሂንቴው ፓጩዳባይ ዴዒ?» ያገዲ ኦይቺስ።

ኤንቲ ዛሪዲ፥ «አይኮይካ ፓጩቤና» ያገደሶና።

36 ኢ ኤንታኮ፥ «ሃዒ ኮርጅይኔ ካርዲቲይ ዴዒይ ኦይኮ፤ ማሺ ባይናይ ባ አፊላ ባይዚዲ ማሻ ሻሞ።

37 ሃ ሰዒቲ! (ጌላታራ ታይቤቲስ) ጌቲቲዲ ፃፊቲዳይሲ ታናን ፖሌታናው ቤሴስ። ኤ፥ ታ ጊሾ ፃፊቲዳባይ ፖሌቲይሲ ቱማቲስ» ያገሰ።

38 ኢያ ታማሬቲ፥ «ጎዳው ሃይሳን ናሞው ማሺ ዴዒስ» ያገደሶና።

ኢ፥ «ጊዳና» ያገሰ።

ዩሱሲ ሻማሆ ዴሪያ ቦላ ዋሲስ  
(ማቶ 26:36-46፤ ማር 14:32-42)

39 ዩሱሲ ካሴ ሜዜቲዳይሳዳ ዴንዲዲ ሻማሆ ዴሪያ ቦላ ከዩሰ። ኢያ ታማሬቲ ኢያ ካሊደሶና።

40 ሄ ቤሳ ጋኪዳ ዋዴ «ፓጩን ጌሎና ሜላ ዋሲቲ» ያገሰ።

41 ኤንታፊ ሹቺ ሆሊን ጋኪያ ሶ ሜላ ሃኪዲ ጉልባቲዲ ዋሲስ።

42 «ታ አዋው፥ ኔ ሼኔ ጊዲኮ ሃ ሜቱዋ ታፔ አላ። ሺን ታ ሼኔ ጊደፖ ኔ ሼኔይ ሃና» ያገዲ ዋሲስ።

43 ኪታንቺይ ሳሎፔ ቆንጨዲ ሚንላስ።

44 ዳር ኡንዔቲዲ ሚንላዲ ዋሴስ። ኢያ ጫዋይካ ሱላ ያኪያዳ ሳዒን ያኮስ።

45 ዩሱሲ ዋሳ ዉርሲዲ ባ ታማሬታኮ ዩሰ። ኤንቲ፥ አዛኒያፔ ዴንደይሳን ዳቡሪዲ ጳሰኪዳሺን ዴሚዲ፥

46 «አይስ ጳሰከቲ? ፓጩን ጌሎና ሜላ ዴንዲዲ ዋሲቲ» ያገሰ።

ዩሱሲ ኦይኬቲስ

(ማቶ 26:47-56፤ ማር 14:43-50፤ ዮሃ 18:3-11)

47 ኢ ቡሮ ኦዳ ቦላ ዴቢሽን ዳሮ አሳቲ ዩዶሶና። ታማኔ ናምዓታፔ ኢሶይ ዩሁዳ ጌቴቴይሲ ኤንታና ካሌሌስ። ኢ ዩሱሳ ዩራናው ማቲ ሸቂስ።

48 ሺን ዩሱሲ፥ «ዩሁዳ፥ አሳ ናዓ ዩራዳ አላ አማኔ?» ያገሰ።

49 ዩሱሳ ታማሬቲ ሄ ሃኑዋ ቤቢዲ፥ «ጎዳው ማሻን ሸጪኖ?» ያገደሶና።

50 ኤንታ ገደፌ ኢሶይ ካሂኔ ሃላቃ ኦሳንቸዋ ሸጪዲ ኡሻቻ ሃይላ ቃንጃዲ ዩገሰ።

51 ሺን ዩሱሲ፥ «አጋ! ዲጎፊቴ» \* ያገሰ። ኡራ ሃይላ ቦቺዲ ፓሊስ።

52 ሄሳፌ ጉዬ፥ ዩሱሲ ባና ኦይካናው ዩዳ ካሂኔ ሃላቃታኮ፥ ያሳ ኩላ ናጌይሳታ ሹማታኮኔ ጪማታኮ፥ «ፓኖ ኦይኪያ አሳዳ ማሼኔ ፃምዓ ኦይኪዲ ዩዳቴ?»

53 ኡባ ጋላስ ያሳ ኩላን ታ ሂንቴራ ዴቢያ ዋዴ ታ ቦላ ኩሼ ዋሊቤኬታ። ሺን ሃይሲ ቋማ ካዎቴላይ ሃራዳ ዋዴኔ ሂንቴ ዋዴ» ያገሰ።

ጳዊሮሲ ዩሱሳ ካዲስ

(ማቶ 26:57-58፥ 67-75፤ ማር 14:53-54፥ 66-72፤ ዮሃ 18:12-18፥ 25-27)

54 ሄሳፌ ጉዬ፥ ዩሱሳ ኦይኪዲ ካሂኔ ሃላቃ ዛባ ኤፊዶሶና። ጳዊሮሲ ሃሆን ዩሱሳ ካሌስ።

55 አሳቲ ካሂኔ ሃላቃ ዛባን ታማ ኤሊዲ ዋላ ኡቲዳሺን ጳዊሮሲ ኤንታራ ኢሲፌ ኡቲስ።

56 ኢሲ አይሊያ ጳዊሮሲ ታማ ማታን ኡቲዳይሳ ጫዳ ፃላዳ፥ «ሃ ኡራይ ኢያራ ዴዔስ» ያጋሱ።

57 ሺን ጳዊሮሲ፥ «ሃ ማጫሴቴ ታ ሄ ኡራ ኤሪኬ» ያገዲ ካዲስ።

58 ጉላ ዋዴፔ ጉዬ ኢሲ ሃራ አዳይ ኢያ ቤቢዲ፥ «ኔካ ኤንታፌ ኢሱዋ» ያገሰ።

ሺን ጳዊሮሲ፥ «ሃ አዲያው ታና ገዲኬ» ያገሰ።

\* 22:51 አጋ! ዲጎፊቴ፡ ዩሱሲ ሃ ቤሳን አጋ ያገዳይ ኢያ አሻናው ገዲ አሳቲ ኡራ ሃይላ ቃንጃይሳ አጋ ቃንጃ፡ ገዳይሳኔ፥ ሃራቲ ኢያ ኦይካናው ዩዳይሳታ ዲጎፊቴ ሃሲ ኤንታ ዋዴ ያገዳይሳ ናምዑ ቆፋታ ዋሊ ጋሊዲ ኦይኪስ። 22:53 ሉቃ 19:47፤ 21:37



59 ኢሲ ሳቲ ማላ ጋምባዳ፣ ጉዬ ኢሲ ሃራ አዳይ ቲሊሲዲ። «ሃ ኡራይ ጋሊላ፣ ገዲያ ገሾ ሲዴይ ባይና ኢያራ ዴዕስ» ያገሰ።

60 ሺን ጳዳርሲ። «ሃ አዲያው። ኔ ጌይሳ ታ ኤሪኬ» ያገሰ። ኢ ሄ ኦዳ ኦንጎና ዴዒሺን ኩቶይ ዋሲስ።

61 ጎዳይ ጉዬ ሲሚዲ ጳዳርሳ ያሊስ። ጳዳርሲ። «ሃቺ ኩቶይ ዋሳና፣ ሲንጤ ኔ ታና ሄዙ ቶሆ ካዳና» ያገዲ። ጎዳይ ኦዲዳ ቃላ እኬኪስ።

62 ጳዳርሲ ካሬ ከዱዲ ዳሮ ኮኮሪዲ ዩኪስ።

63 ዩሱሳ ናገያ አሳቲ ኢያ ለቁሶኔ ዴሼሌ ኦይኪዶሶና።

64 ኢያ አይፊያ ጎዚዲ «እኔ ቲንቢቲ ኦዳ፤ ኔና ዴቺዳይ ኦኔ?» ያገዲ ኦይቸሶና።

65 ሃራ ዳሮ ጫሼ ጫዱዲ ካዉሾሶና።

ዩሱሲ ጲላዖሳ ሲንጤኔ ሄርዲሳ ሲንጤ ሺቁስ  
(ማቶ 26:59-66፤ ማር 14:55-64፤ ዮሃ 18:19-24)

66 ሳዒ ዋንቲያ ዋዴ አይሁዴ ቢታ ጩማቲ፣ ካሂኔ ሃላቃቲኔ ሂጌ አስታማሬቲ ሺቁዲ፣ ዩሱሳ ባንታ ሲንጤ ሺሺዶሶና።

67 ኤንቲ። «ኔኒ ኪሪስቶስ? እኔ ኩስ ኦዳ?» ያገዲ ኦይቸዶሶና።

ዩሱሲ። «ታ ኦዲያኮ አማኔኬታ።

68 ታ ኦይቸዶሶ ካሬኬታ።

69 ሺን አሳ ናባይ ሃይሳፊ ጌዴ ባጋን ዋልቃማ ዖሳ ኡሻቻ ባጋን ኡታና» ያገሰ።

70 ሄ ዋዴ ኡባይ። «ያቲን፣ ኔኒ ዖሳ ናዔ?» ያገደሶና።

ኢ። «ታ ዖሳ ናባ ገዴይሳ ሂንቲ ገዴታ» ያገሰ።

71 ኤንቲ። «ሂዛ፣ ሃራ ማርካ አይ ኮሺ? ኢ ባ አንግርሳን ኦዲሺን ኦ ሲዒዳ» ያገደሶና።

# 23

ዩሱሲ ጲላዖሳ ሲንጻን  
(ማቶ 27:1-2፤ 11-14፤ ማር 15:1-5፤ ዮሃ 18:28-38)

1 ሄ ቤሳን ሺቁዳ ሻንጎቲ ኡባይ ዴንዲዲ ዩሱሳ ጲላዖሳኮ ኤፊዶሶና።

2 «ሃ ኡራይ ኦ አሳ ባሌሊሺን፣ ካዉዋስ ገራ ገርና ማላ ዲጊሺኒኔ ቃሲ፣ ታኒ ኪሪስቶሳ ሂንቲ ካዉዋ) ያገሺን ዴሚዳ» ያገዲ ሞቲዶሶና።

3 ጲላጾሲ ዩሱሳ፡ «ኔኒ አይሁዳታ ካዎዬ?» ያጊዲ ኦይቺሰ።  
ዩሱሱ፡ «ኤ፡ ኔ ጊዳይሳ ማላ» ያጊሰ።

4 ጲላጾሲ ካሂኔ ሃላቃታኮኔ አሳኮ፡ «ሃ ኡራ ቦላ ታኒ ኢሲ ባላካ ዳማቢኬ» ያጊሰ።

5 ሺን ኤንቲ፡ «ሃ ኡራይ ጋሊላፔ ደሚዲ ሃይሳ ጋካናው ዪሁዳ ኩሚሳ ኢታባሰ ዳንጮሴሰ» ያጊዲ ሚንሉ ኦዲደሶና።

6 ጲላጾሲ ሄሳ ሲዒዳ ዎዴ ዩሱሱ ጋሊላ አሴኮ ኤራናው ኮዪዲ ኢያ ኦይቺሰ።

7 ዩሱሱ ሄሮዲሳ ቢታፌ ዪዳ አሲ ጊዳይሳ ጲላጾሲ ኤራዳ ዎዴ ሄሮዲሱ ሄ ዎዴ ዩሩሳላሚን ዳዒያ ጊሾ ኢያኮ ዩዲሰ።

8 ሄሮዲሱ ዩሱሳ ቤዓናው ዳር ዎዴፔ ኮዪሹ ዳዒያ ጊሾ ኢያ ቤዒዳ ዎዴ ዳር ኡፋይቲሰ። አይሰ ጊኮ፡ ኢያባ ሲዒዳ ጊሾ ማላሊሲያባ ኦሊን ቤዓናው አሞቲሼ ዳዒሰ።

9 ሄሮዲሱ ዩሱሳ ዳር ኦይሾታ ኦይቺሰ፡ ሺን ኢ አይኮካ ዛሪቤና።

10 ካሂኔታ ሃላቃቲኔ ሂጌ አሰታማሬቲ ያን ኤቂዲ ሚንሉዲ ኢያ ሞቶሶና።

11 ሄሮዲሳራኔ ኢያ ዎታዳሬታራ ዩሱሳ ካዲደሶናኔ ለቂሲደሶና። ቦንቾ አፊላ ማይዚዲ ጲላጾሳኮ ዛሪዲ ዩዲደሶና።

12 ሄሮዲሳራኔ ጲላጾሳራ ካሴ ሞርኬሺን ሄ ጋላሰ ዎላ ጊጊደሶና።

13 ጲላጾሲ ካሂኔ ሃላቃታ፡ አሳ ሃሬይሳታኔ አሳ ፃጊዲ፡

14 « ሳ ኡራይ አሳ ጌላቲላሰ ዳንጮሴሰ) ጊዲ ታኮ ኤሂዳታ። ታካ ሂንቲ ሲንላን ፒልጋዳ ሂንቲ ሺሺዳ ሞቲዎሰ አይቢ ባላካ ዳማቢኬ።

15 ሄሮዲሱ፡ ሄሳሶ አይቢ ባላካ ኢያ ቦላ ዳሚቦና ጊሾ ኩኮ ዩዲሰ። ቱማካ ሃ ኡራይ ሃይቆሰ ጋሊያ አይቢ ባላካ ኦሊቤና።

16 ሄሳ ጊሾ፡ ኢያ ጋራፋዳ ቢላ ዩዳና» ያጊሰ።

17 ሄሳ ኢ ጊዳይ ፋሲካ ባሌ ዎዴ ኢሲ አሲ ኤንታው ቢላናይሲ ኢያው አቶናባ ጊዲያ ጊሾሳ።

18 ዳሬይ ኡባይ ኢሲ ቦላ፡ «ሃ ኡራ ጌዴ ዲጋ፡ ኑሰ ባርባና ቢላ» ያጊዲ ዋሲደሶና።

19 ባርባኒ ካታማ ጊደን አሳ ኢታባሰ ዳንጮሊዲ አሴ ዎዲዲ ቃሹቲዳ አሲ።

20 ጲላጾሲ ዩሱሳ ቢላናው ኮዪዲ አሳሰ ዛሪ ኦዲሰ።

21 ጊደሺን፡ አሳይ፡ «ካቃ! ካቃ!» ያጊዲ ዋሲደሶና።

22 ጲላዎሲ ሄሸን፡ «ሃ ኡራይ ቆሃዳባይ ኣይቤ? ዎጵስ ጋሊያ ባላ ታ ዳማቢኪ። ሄሳ ጊሾ፣ ጋራፋዳ ዬዳ ኣጋና» ያጊሰ።

23 ኤንቲ ባንታ ቃላ ጶቁ ኦሊዲ፣ «ካቂታናው ቤሴስ» ጊዲ ሚንሉ ዋሲደሶና። ኤንታ ዋሶይካ ያጊሰ።

24 ኤንታ ኦይሻ ጊሾ ጊዲ ጲላዎሲ ኢያ ቦላ ፒርዲስ።

25 ኣሳ ኢታባሰ ዳንጮይሳኔ ኣሴ ዎጲዲ ቃሼቲዳይሳ ቢላና ማላ ዋሲዳ፣ ሄ ኡራ ኤንታው ቢሊስ። ሺን ዬሱሳ ኤንቲ ኮዬዳባ ኦላና ማላ ኤንታው ኣሉ ኢሚስ።

ዬሱሳ ካቂደሶና

(ማቶ 27:31-44፤ ማር 15:21-32፤ ዮሃ 19:17-27)

26 ዬሱሳ ኦይኪዲ ኤፊሺን ሲሞና ጊያ ቄሬና ቢታ ኣዳይ ጋዳሬፔ ዬሺን፣ ዳሚዲ ማሰቃሊያ ቶሲዲ ዬሱሳ ካሊዲ ባና ማላ ኡንዔሊደሶና።

27 ዳር ኣሳይኔ ባንታ ቲራ ኢጪሺ ዬኪያ ማጫሳቲ ኢያ ጉዬያራ ካሎሶና።

28 ሺን ዬሱሲ ኤንታኮ ጉዬ ሲሚዲ፣ «ሂንቴኖ፣ ዬራሳላሚ ማጫሳቶ፣ ሂንቴ ሁዔሲኔ ሂንቴ ናይታስ ዬኪቴፔ ኣቲን ታው ዬኮፊቴ።

29 ለሃኮ ማይንላቲ፣ ዬሎና ኡሎቲኔ ቋንሶና ቋንላቲ ኣንጃቲደሶና) ሂንቴ ያጋና ጋላሳይ ያና።

30 ሄ ዎዳ ዳሬታ፣ ሉ ቦላ ከንዲቴ)፣ ዙማታካ፣ ሉና ካሚቴ) ያጋና።

31 ሂዛ፣ ቃዬ ሚላ ሄሳሉ ኦሊኮ ማላ ሚላ ዋታንዳሻ?» ያጊሰ።

32 ኢያራ ዎቋናው ሃራ ናሞዑ ዎራንሸታ ኤፊደሶና።

33 ቄራኒዮ \* ጌቴቲያ ቤሳ ጋሊዲ ካቂደሶና። ዎራንሸታፔ ኢሱዋ ኡሻቻ ባጋራ ሃንኩዋ ሃዲርሳ ባጋራ ካቂደሶና።

34 ዬሱሲ፣ «ታ ኣዎው፣ ኤንቲ ኣይ ኦሊያኮ ኤርና ጊሾ ኔኒ ኤንታው ኣቶ ያጋ» ያጊሰ።

ኤንቲ ኢያ ኣፊላ ቦላ ሳማ ዬጊዲ ሻኬቲዲ ኤኪደሶና።

---

23:30 ሆሴ 10:8፤ ዮ.ቆ 6:16 \* 23:33 ቄራኒዮ፣ ቄራኒዮ ጌይሲ ጊሪኬ ደና። ኣራማይኬ ደናን «ሳላጎታ» ዎይኮ «ሁዔ ጉኔ» ጉሱ። ቄራኒዮ ጊያ ሱንላይ ኣሚቲዳይ ዬሱሲ ካቂቲዳይ ኣሳ ሁዔ ጉኔ ዳኒያ ቤሳን ጊዲያ ጊሾሳ። ሄ ቤሳይ ሮሚ ካዎቴላይ ዎራንሸታ ካቂያ ቤሲ። (ማቶ 27: 33፤ ማር 15:22፤ ዮሃ 19:17) 23:34 ማዝ 22:18

35 አሳይ ኤቁዲ ያሉሶና፡ ሺን ዳሪያ ሃሪይሳቲ፡ «ሃራታ አሺሰ፤ ያሳይ ዶሪዳ ኪሪሰቶሲ ኢያ ገዲኮ ኣኔ ባና አሾ» ያገዲ ሌቂሲደሶና፡

36 ዎታዳሪቲ ኢያኮ ሺቂዲ፡ ጫላ ዎይኔ ኡሻ ኢሚደሶና፡

37 ያቲዲ፡ «ኔኒ ኣይሁዳታ ካዎ ገዲኮ ኔ ሁዒያ አሻ» ያገዲ ሌቂሲደሶና፡

38 ኢያው ሁዒ ባጋራ፡ «ሃይሲ ኣይሁዳታ ካዎ» ያገዲ ጸፊይ ዴዒሰ፡

39 ካቂቲዳ ዎራንዞታ፤ ኢሶይ ጫሼ ሳዓራ ጎቺሼ፡ «ኣኔ ኔኒ ኪሪሰቶሳ ገዲኮ፡ ኔናካ ኦናካ አሻ» ያገሲ፡

40 ሺን ሃንኮ ዎራንዞይ፡ «ኔኒ ሃይሳ ሚላ ፒርዳን ዳዓሼ ሃሪ አቶሺን፡ ያሳሰ ያዩኪ?»

41 ኦኒ ኦ ባላሰ ቤሲያ ፒርዳ ኤኮሰ፡ ሺን ሃ ኡራይ ኢሲ ኢታባካ ኦሊቤና» ያገዲ ሃንቂቲሰ፡

42 ቃሲካ፡ «ዩሱሳ፡ ኔ ኔ ካዎቴላራ ያ ዎዴ ታና ቆፓ» ያገሲ፡

43 ዩሱሲ፡ «ታ ኔው ቱማ ኦዳይሰ፤ ሃቺ ኔኒ ታራ ጋናቴን ገዳና» ያገሲ፡

44-45 ሄ ጋላሰ ኡሱፑን ሳቴፔ ቢዲ ኡዲፋን ሳቴ ጋካናው አዎይ ፖዑዎ ዲገዲ ገሾ ቢታ ኡባ ቦላ ፉማ ገዲሰ፡ ያሳ ኬላ ማጋራጃይ ዳኬቴዲ ናምዓን ሻኬቲሰ፡

46 ዩሱሲ፡ ቃላ ጶቁ ኦሊዲ፡ «ታ አዎው፡ ታ ታ ሼምፒው ኔ ኩሼን ሼጳይሰ» ያገዲ ሃይቂሰ፡

47 ማቶ ሃላቃይ፡ ሃኒዳይሳ ቤዒዲ፡ «ሃይሲ ኡራይ ቱማካ ዪሎ» ያገዲ ያሳ ጋላቲሰ፡

48 ሃ ሃኒያባ ቤዓናው ሄ ቤሳ ሺቂዳ አሳ ኡባይ ሃኒዳባ ቤዒዳ ዎዴ ባንታ ቲራ ኢጨሼ ባንታ ሶ ሰሚደሶና፡

49 ገደሺን፡ ዩሱሳ ማታን ኤሪያ አሳ ኡባይ፡ ሄሳዳካ ጋሊላፔ ካሊዲ ዩዳ ማጫሳቲ ሄሳ ቤዒሼ ሃሆን ኤቂደሶና፡

50-51 ኣይሁዳ ሻንጎታ፤ ኢሶይ፡ ዮሴፋ ጌቴቲያ ኡራይ ዴዒሰ፡ ኢ አርማቲያሳ ጌቴቲያ ዩሁዳ ካታማፔ ዩሰ፡ ኢ ሎዎኔ ዪሎ አሲ ገዲያ ገሾ ያሳ ካዎቴላ ዩሳ ናጌሰ፡ ሻንጎታ፤ ኢሱዎ ገዲሼ ኤንታ ዘሪቴላኒኔ ኦሱዋን ዴና፡

52 ሄ ኡራይ ጲላዎሳኮ ቢዲ፡ ዩሱሳ ኣሃ ሞጋናው ታው ኢማ ገዲ ዎሲሰ፡

---

23:35 ማዘ 22:18፤ ማዘ 22:7      23:36 ማዘ 69:21      23:44-45 ኬሳ 26:31      23:46 ማዘ 31:5      23:49 ሉቃ 8:2

53 ጲላጎሲ ኤካ ያገን፤ ዩሱሳ ኣሃ ዋጲሲ ደራሲ ኣፊላራ ፃፂሰ።  
 ዛላፊ ዋጪዲ ኬሲዳ ሃራ ኣሲ ሞጌቶና ኦራሳ ዲፎን ዋሊሰ።  
 54 ሳሞባቲ ጌላና ሃኒያ ገሾ ሄ ጋላሳይ ገጌቴላ ቃማ።  
 55 ጋሊላፔ ዴንዲዲ ዩሱሳ ካሊዲ ዪዳ ማጫሳቲ ዮሴፋራ  
 ቢዲ ኢያ ኣሃ ዋቲ ሞጊያኮ ዲፋዋ ኣኬኪዲ ቤዲደሶና።  
 56 ያፔ ሲሚዲ ሺቶኔ ቁባቲያ ገገሲደሶና። ሂጌይ ከቴይሳ  
 ሜላ ሳሞባታ ጋላሰ ሸምፒ ፔዲደሶና።

# 24

ዩሱሲ ሃይቆፔ ዴንዲሰ  
 (ማቶ 28:1-10፤ ማር 16:1-8፤ ዮሃ 20:1-10)

1 ሳሚንታፊ ኮይሮ ጋላሰ፤ ዋጋ ዋዴ ዋንታ ዳሮ ጉራ፤ ማጫሳቲ  
 ባንታ ገገሲዳ ሸቱዋ ኤኪዲ ዲፋዋ ቢደሶና።  
 2 ኤንቲ ያ ጋኪያ ዋዴ ዲፋዋ ዶናን ዴዲያ ሹቻይ ጎንዳሬቴዲ  
 ኪቾይሳ ዴሚደሶና።  
 3 ኤንቲ ዲፋዋ ጋሊ ጌሊደሶና፤ ሸን ጎዳ ዩሱሳ ኣሃ  
 ዴሚሶኮና።  
 4 ኤንቲ ያን ኤቁዲ ኣይቢ ሃኒዴ ገዲ ቆፒሺን ኣኬኮና ዳሮ  
 ጲሊያ ኣፊላ ማዲዳ ናምዑ ኣሳቲ ኤንታ ማታን ኤቁደሶና።  
 5 ማጫሳቲ ያሹቴዲ ባንታ ሁዲያ ሳዓን ዘቁ ኦሊዲ ዴዲሺን፤  
 ኣሳቲ ኤንታኮ፤ «ዴጎን ዴዴይሳ ሃይቆፔ ገደን ኣይሰ ኮዩቲ?  
 6-7 ኢ ሃይሳን ዴና፤ ሃይቆፔ ዴንዲሰ፤ «ኣሳ ናዓይ ናጋራንቾታ  
 ኩሼን ኣጲ ኢሜታና፤ ኤንቲካ ኢያ ካቃና። ኢ ሄሻንሉ ቃማን  
 ሃይቆፔ ዴንዳና) ያገዲ፤ ኢ ሂንቴራ ጋሊላን ዴዲሺ ሂንቴው  
 ኦዲዳ ቃላ ቆፒቴ» ያገሰ።  
 8 ማጫሳቲ ሄ ዋዴ ኢያ ቃላ ቆፒደሶና።  
 9 ማጫሳቲ ዲፋዋፔ ሲሚዲ ሃኒዳባ ኡባ ታማኔ ኢሶታሲኔ  
 ሃራታሲካ ኦዲደሶና።  
 10 ሄሳ ሃዋሬታሰ ኦዲዳይ ማግዴላ ማይራሞ፤ ዮሃና፤ ያይቆባ  
 ኣዪው ማይራሞኔ ኤንታራ ዴዲያ ሃራ ማጫሳታ።  
 11 ሸን ኤንታው ማጫሳቲ ኦዲዳይሲ ኤልሞ ዳኒን  
 ኣማኒሶኮና።

---

23:56 ኬሳ 20:10፤ ዛሬ 5:14 24:6-7 ማቶ 16:21፤ 17:22-23፤ 20:18-19፤  
 ማር 8:31፤ 9:31፤ 10:33-34፤ ሉቃ 9:22፤ 18:31-33

12 ሺን ጳጳርሲ ዳንዲ ዋዲዲ ዲፎ ቢስ። ሄ ቤሳ ጋኩዲ ሆኪ ጋላ ያለያ ዋዴ ሞጎ ኣፊላ ፃላላ ቤዒስ። ሃኒዳባን ማላሉቲሼ ባ ሶ ሲሚስ።

ኤማሁሴ ኦጊያ ቦላ  
(ማር 16:12-13)

13 ሄ ጋላስ ካሊያ ታማሬታፔ ናምዓቲ ዩሩሳላሜፔ ታማኔ ኢሲ ኪሎ ሚቲሬ ሃኪያ ኤማሁሴ ጉታ ቦሶና።

14 ኤንቲ ዋላ ሃኒዳባ ኡባ ኦዴቶሶና።

15 ኤንቲ ሄ ሃናታባ ቆፒሼኔ ኦዴቲሼ ቢያ ዋዴ ዩሱሲ ባ ሁዔን ሸቂዲ ኤንታሩ ቤስ።

16 ሃናሺን፣ ኤንቲ ኢያ ኤሮና ሜላ ኤንታ ኣይፊይ ኦይኬቲስ።

17 ኢ፣ «ሂንቲ ዋላ ኦጌ ቦላ ዳዒሼ ኦዴቲይሲ ኣይቤ?» ያገሰ።

ኤንቲ ኣዛኒዲ ሲዒ ገዲ ኤቂዶሶና።

18 ኤንታፊ ኢሶይ ቁለዮጳ ጌቲቲይሲ፣ «ሃ ቃማታ ገደን ዩሩሳላሜን ሃኒዳባ ኤሮናይሲ፣ ኔ ቢታስ ኢማሌዬ?» ያገሰ።

19 ኢ ዛሪዲ፣ «ኢ ሃኒዳይሲ ኣይቤ?» ያገዲ ኦይቺሰ።

ኤንቲ፣ «ፆሳ ሲንሳኒኔ ኣሳ ሲንሳን ኦሶኒኔ ኦዳን ሚኖ ናቤ ገዲዳ ናዚሬቲ ዩሱሳባ።

20 ኢያ ካሂኔ ሃላቃቲኔ ኦና ሃሬይሳቲ ሃይቆ ፒርዳስ ኣሉ ኢሚዲ፣ ካቂዶሶና።

21 ኦኒ ኢስራዔሌ ኣሳ ዋዛንዴ ገዲ ኡፋይቲዲ ናገዳሺን ሃይሲ ሃኒን ሃቺ ሄሸንሖ ቃማ።

22 ቃሲ ኦ ገዶፊ ኢሲ ኢሲ ማጫሳቲ ኦና ማላሊሲዶሶና። ኤንቲ ሃቺ ዋንታ ጉራ ዲፋዋ ቢዶሶና።

23 ኢያ ኣሃ ጳዩዳ ዋዴ ሲሚ ዩዲ፣ «ኢ ፓፃ ዳዔስ» ያገያ ኪታንቸቲ ቆንጨን ቤዒዳ ያገዲ ኦዲዶሶና።

24 ኦ ገዶፊካ ኢሶቲ ኢሶቲ ዲፋዋ ቢዲ ማጫሳቲ ኦዲዳይሳሖ ሃኒን ቤዒዶሶና፣ ሺን ኢያ ቤዒቦኮና» ያገሰ።

25 ኢ ኤንታኮ፣ «ሂንቲኖ፣ ኣኬኮና ኣሳው፣ ሂንቲ ዋዛናይ ናቤቲ ኦዲዳባ ኡባ ኣማናናው ጋምዔይሳቶ፣

26 ኪሪሰቶሲ ሃ ሜቱዋ ኤካናዉኔ ባ ቦንቹዋን ጌላናው ቤሴኔ?» ያገሰ።

27 ሙሴፔኔ ናቤታ ኡባፊ ዳንዲዲ ጌሻ ማፃፋን ኢያባይ ፃፊቲዳይሳ ኡባ ኤንታው ቆንጨሲስ።

28 ኤንቲ ቢያ ጉታኮ ማታቲዳ ዋዴ ዩሱሲ ኣጂዲ ሃሆ ሶ ቢያ ዳኒን፣

29 ኤንቲ፣ «ሳዓይ ቃሚዳ ጊሾ ኑራ ኣቃ» ያጊዲ ሚንሉዲ ምሲዶሶና። ሃሳ ጊሾ፣ ኤንታራ ኣቃናው ጌሊሰ።

30 ኤንታራ ኢሲፊ ጋይታ ቦላ ኡቲዲ፣ ኡይላ ዳንሉዲ፣ ሚንሉ ኣንጂዲ ኤንታው ኣሚሰ።

31 ሄ ዎዴ ኤንቲ ኤራና ሜላ ኤንታ ኣይፊይ ዶዩቲሰ። ኤንቲካ ኤሪዶሶና። ሺን ኢ ኤንታፊ ጌሚሰ።

32 ኤንቲ፣ «ኑ ኦጊያ ቦላ ዳዒሺን ኢ ኑሰ ጌሻ ማፃፋ ቢርሺሺኒኔ ኑና ሃሳዩሲሺን ኑ ዎዛናይ ፀጌቲቤኔ?» ያጊዶሶና።

33 ሄ ዎዴ ዳንዲዲ ጉዬ ዩሩሳላሜ ዩዶሶና። ታማኔ ኢሶቲኔ ሃራቲ ኢሲ ቦላ ሺቂዲ ዳዒሺን ዳሚዶሶና።

34 ኤንቲ፣ «ሳዳይ ቱማ ዳንዲሰ፤ ሲሞናስ ቆንጨሰ» ያጊዶሶና።

35 ሄ ናሞሀ ታማሬቲ ኤማሁሴ ኦጊያ ቦላ ዳዒሺን ሃኒዳይሳኔ ኡይላ ሚንሉዲ ዎዴ ዋቲ ኢያ ኤሪዳኮ ኤንታው ኦዲዶሶና።

ዩሱሲ ባ ታማሬታስ ቆንጨሰ

(ማቶ 28:16-20፤ ማር 16:14-18፤ ዮሃ 20:19-23፤ ሃ.ኦ 1:6-8)

36 ናሞሀ ታማሬቲ ሃሳ ኦዳ ቦላ ዳዒሺን፣ ዩሱሲ ኤንታ ጊዶን ኤቂዲ፣ «ሳሮይ ሂንቴው ጊዶ» ያጊሰ።

37 ጊዶሺን፣ ኤንቲ ዳጋሚዲ፣ ሞይቲሌ ቤዒዳ ዳኒን ያዩዶሶና።

38 ኢ ኤንታኮ፣ «ኣይሰ ባቢዴቲ? ኣይሰ ሲጼይ ሂንቴ ዎዛናን ጌሊዴ?»

39 ታ ኩሺያኔ ታ ቶሁዋ ቤዒቲ፤ ታኒ ታና። ቃሲ ኦይኪዲ ቤዒቲ፤ ታናን ሂንቴ ቤዒይሳዳ፣ ሞይቲሌሰ ኣሾይኔ ሜቁሌ ባዋ» ያጊሰ።

40 ያጊዲ፣ ባ ቶሁዋኔ ባ ኩሺያ ኤንታ ቤሲሰ።

41 ኤንቲ ኡፋይሳፊ ዳንዶይሳን ኣማናና ማላሌቲላን ዳዒሺን፣ ዩሱሲ ኤንታኮ፣ «ሃይሳን ሂንቴው ሚያባይ ዳዒ?» ያጊሰ።

42 ኤንቲ ኢሲ ጫጩቲዳ ሞሎ ኢያው ኣሚዶሶና።

43 ኢ ኤኪዲ ኤንታ ሲንሳን ሚሰ።

44 ኢ፣ «ታ ሂንቴራ ጋሞዒዳ ዎዴ ኡባን ሙሴ ማፃፋታን፣ ናቤታ ማፃፋታኒኔ ማዘሙሬ ማፃፋታን፣ ታ ጊሾ ፃፊቲዳባይ ኡባይ ፖሌታናው ቤሴሰ ያጋዳ ታ ሂንቴው ኦዲዳ ቃላይ ሃይሳ» ያጊሰ።

45 ሄ ዎዴ ጌሻ ማፃፋታ ኣኬካና ሜላ ዎዛና ኤንታ ዶዩሰ።

46 ሃሳዳካ፣ «ኪሪሰቶሲ ዋዬ ኤካና፣ ሄሻንሎ ቃማን ሃይቆፔ ዳንዳና ያጊዲ ፃፊቲሰ።

47 ዩሩሳሌም ጳጳራዊ እና ኡባስ ናጋራፔ ማርቲላይኔ አቶቲላይ ኢያ ሱንላን ማርካታና።

48 ሂንቲ ሄሳስ ማርካታ።

49 ሄን፣ ታካ ታ አዋይ ኢሚዳ ኡፋይሳ ሂንቲው ዩዳና። ሂንቲ ሳሎፔ ዋልቃ ማዳና ጋካናው ዩሩሳሌም ካታማን ጋምቢቲ» ያገሰ።

ዩሱሲ ዳንዲስ

(ማር 16:19-20፤ ሃ.ኦ 1:9-11)

50 ሄሳፌ ጉዬ፣ ቢታኒያ ካታማ ኤንታና ኤኪዲ ቢስ። ባ ኩሺያ ዳንሲዲ አንጂስ።

51 ኤንታና አንጂሼ ኤንታፌ ቫኬቲዲ ፑዴ ሳሎ ኤኬቲስ።

52 ኤንቲ ዚጊ ጎይኒዲ ዳሮ ኡፋይሳን ዩሩሳሌም ሲሚዶሶና።

53 ጾሳ ኡባ ዋዴ ጋላቲሼ ጾሳ ኬላን ጋምቢዶሶና።



**ኦራሳ ጩቂዋ ጎፋላ**  
**New Testament in Gofa**

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source  
files dated 29 Jan 2022

c35d6c73-3843-5482-b53e-7559d35deee5